

जाणेयाचेनि विश्वासें । मृत्यु येकु असे ।
 हें जेयाचेनि मानसें । मानिजे ना ॥ ३६ ॥
 श्रवणोदकिचा मासा । नाटे ऐसिया आशा ।
 न वचे चि कां जैसा । अगाधा डोहा ॥ ३७ ॥
 कां गोरिचिया भूली । मृग व्याधा दीठि न घली ।
 गळु न पाहतां गीली । उंडी मीनु ॥ ३८ ॥
 दीपाचेया झगमगा । जालील हें पतंगा ।
 नेणवे चि पै गा । जिया परी ॥ ३९ ॥
 कां गांवारु निद्रासुखें । घर जलत नेदखे ।
 नेणतां जेवि विपें । रांधिलें अन्न ॥ ७४० ॥
 तैसा जीविताचेनि मीसें । हा मृत्यु चि ना आला असे ।
 हें नेदखे चि राजसें । सुखें जाणा ॥ ४१ ॥
 शरीरिची वाढि । अहोरात्रिची जोडि ।
 विषयसुखें प्रौढि । साच चि मानी ॥ ४२ ॥
 पारि बापुडा ऐसा नेणे । जें वेश्येसि सर्वस्व देणें ।
 तें चि नांगवणें । रूप एथ ॥ ४३ ॥
 सवंचोराचें साजणें । तें चि तें प्राणु घेणें ।
 लेपासि स्नपन करणें । तो चि नाशु ॥ ४४ ॥
 पांढू आंग सूटलें । तेया चि नावं खुंटलें ।
 तैसें नेणे जें भूललें । आहारनिद्रा ॥ ४५ ॥
 सन्मुखा सूला । धावंतेया पायला ।
 प्रतिपदि जचला । मृत्यु जेवि ॥ ४६ ॥
 तेवि देहा जवं जवं वाहु । जवं दीसांचा पवाडु ।
 जवं जवं सुरवाडु । भोगाचा हा ॥ ४७ ॥
 तवं तवं अधिकें । मरण आयुष्यातें जीके ।
 मीठ जैसें उदकें । ग्रासिजतसें ॥ ४८ ॥

तैसें जीवित जाये । तेया अस्तवे काला पाहे ।
 हें हातोहातीं नोहे । ठाउवें जेया ॥ ४९ ॥
 किंबहुना पांडवा । हा आंगिचा मृत्यु नीच नवा ।
 नेदखे चि जो मावा । जीवितासाया ॥ ७५० ॥
 तो अज्ञानदेशिचा राउ । या बोला महाबाहो ।
 न पडे गा वंठाउ । आणिचा हा ॥ ५१ ॥
 पै जीविताचेनि मुखें । जैसा कां मृत्युतें नेदखे ।
 तैसा चि तारुण्याचेनि तोपें । जरेतें न गणी ॥ ५२ ॥
 कडाडिं लोटिला गाडा । मिखरौनि सूटला ढोंडा ।
 तैसें नेदखे पुढां । वृद्धाप्य आहे ॥ ५३ ॥
 कां आडवोहला पाणी आलें । हैसेयाचें जूझ मातलें ।
 तैसें तारुण्याचें चढलें । भुररें जैया ॥ ५४ ॥
 पुष्टि लागे विघरां । कांति पाहे निसरां ।
 माथा आदरी सिरों । बागीबल ॥ ५५ ॥
 दाढी साउल धरी । मान हालउनि वारी ।
 तन्हीं जो करी । प्रायेचा आवेशु ॥ ५६ ॥
 पुढील उरीं आदले । नेदखे जैसें आंधलें ।
 कां डोलेया वरिलें निगलें । आलसी तोखे ॥ ५७ ॥
 तैसें तरुणेपण आजिचें । भोगितां वृद्धाप्य पाहिचें ।
 नेदखे चि तो साचें । अज्ञानु गा ॥ ५८ ॥
 देखे अक्षमें कुबुजें । किं विपलाचों लागे फुंजे ।
 परि नेणे पाहे माझे । हे चि भावे ॥ ५९ ॥
 आंगि वृद्धाप्याची । संज्ञा एउनि मरावें चि ।
 परि जेया तारुण्याची । भूलि न फिटें ॥ ७६० ॥
 तो अज्ञानाचें घर । हें साच चि घे उत्तर ।
 तेचि चि परियसैं थोर । चिन्ह आणिक ॥ ६१ ॥

तरि वाघाचिये अडवे । येकोल चरौनि आला दैवें ।
 तेणें विश्वासें पुडुति धांवें । वसो जैसा ॥ ६२ ॥
 कां सर्प वरा आंतु । अवचटें देवो गेला स्वस्थु ।
 येतुलिया साठि निश्चंतु । नास्तिकु होण ॥ ६३ ॥
 तैसेनि टंवच दियें । थेक दोनि चि बेल लाहे ।
 येथ लागु एकु आहे । हें मानी ना जो ॥ ६४ ॥
 वैरियां नीद आली । आणि दंदें माझि सरळि ।
 हें मानी तो सर्पीली । मूकला जेवि ॥ ६५ ॥
 तैसी आहारनिद्रेची उजिरी । रोग निवांत जवं वेन्हीं ।
 तवं जो न करी । व्याधिचिंता ॥ ६६ ॥
 आणि स्त्रीपुत्रादिमेलें । संपत्ति जवं फले ।
 तेणें रजें डोले । जाति जेयाचे ॥ ६७ ॥
 सवले चि वियोगु पडेल । विलौनि विपत्ति होइल ।
 हें दुःख पुढेल । नेदखे जो ॥ ६८ ॥
 तो अज्ञानु गा पांडवा । तो ही तो चि जाणावा ।
 जो इंद्रियें अव्हासव्हा । चारी एथ ॥ ६९ ॥
 वयसेचेनि उवायें । संपत्तिचेनि सावायें ।
 सेव्यासव्य जाये । सरकटीतु ॥ ७० ॥
 न करावें तें करी । असंभाव्य मनी धरी ।
 चित्तू नये तें विवरी । जेयाची मति ॥ ७१ ॥
 रिगे तेथ न रिगावें । मागे जें नेघावें ।
 स्परिसें जेथ न लगावें । आंग मन ॥ ७२ ॥
 न वचावें तेथ जाये । न पाहावें तें पाहे ।
 न खावें तें खाये । तेवि चि तोखे ॥ ७३ ॥
 न धरावा तो संगु । न लगावा तेथ लागु ।
 न चरावा जो मार्गु । आचरे जो ॥ ७४ ॥

नाइकावें तें आइके । न बोलावें तें भाखे ।
 परि दोष्ट होईल हें नेदखे । प्रवर्त्ततां ॥ ७५ ॥
 आंगा मना रुची येयावें । येतुलें कृत्याकृत्य नाठवे ।
 जो करणेयांचेनि नावें । भलेतें करी ॥ ७६ ॥
 परि पाप मज होईल । कां नरकयातना येइल ।
 हें काहिं चि पुढेल । देखे ना जो ॥ ७७ ॥
 तेयाचेनि आंगलगें । अज्ञान जगिं दाटुगें ।
 जें सज्ञानासि हि संगें । झोंबों शके ॥ ७८ ॥
 परि असो हें आइक । अज्ञानचिन्ह आणिक ।
 कां तुज सम्यक । जाणवें जें ॥ ७९ ॥
 तरि जेयाची प्रीति पुरी । गुंतली देखसी घरिं ।
 नवगंधकेसरी । अमरी जैसी ॥ ८० ॥
 साकरेचिये रासी । बैसली नुडे मासी ।
 तैसें निषण्ण आवासिं । जेयाचें मन ॥ ८१ ॥
 वेलाभेड बेडकु अडिं । मशकु गुंपला सेंबुडीं ।
 ढोर सबडबुडी । पंकिं गेला ॥ ८२ ॥
 तैसें घरौनि निगणें । नाहिं जीतेनि मरणें ।
 जेया सापां होउनि असणें । भाटिं तिये ॥ ८३ ॥
 प्रियोत्तमाचां कंठिं । प्रमदा घे आंटी ।
 तेसा जीवेंसि कोंपटी । धरुनि जो ठाके ॥ ८४ ॥
 मधुरसादोषें । मधुकारि जचें जैसें ।
 गृहसंगोपन तैसें । करी जो गा ॥ ८५ ॥
 झांतारपणिं जालें । माणिक एक उपाइलें ।
 तेयाचें कां जेतुलें । मातापितरां ॥ ८६ ॥
 तेतुलेनि पाडें पार्था । घरिं जेयाची आस्था ।
 आणि झों बांचौनि सर्वधा । जाणे ना जो ॥ ८७ ॥

महापुरुषाचें चित्त । जालेयां वस्तुगत ।
 ठाके व्यवहारजात । जेया परीं ॥ ८८ ॥
 तैसा स्त्रीदेहीं जो जीवें । पडौनियां सर्वभावें ।
 कोणु मी काय करावें । हें काहिं नेणे ॥ ८९ ॥
 हाणि लाभु नदेखे । लोकापवादु नाइके ।
 जेयाचिं इंद्रियें एकमुखें । स्त्रिया केलीं ॥ ७९० ॥
 चित्त आराधी स्त्रियेचें । स्त्रियेचेनि संदे नाचे ।
 मर्कट गारुडियाचें । जैसें होए ॥ ९१ ॥
 आपण चि पासिं दावी । इष्टा मैत्रा दुरावी ।
 मग कवडा चि वाढवी । लोभी जैसा ॥ ९२ ॥
 तैसें दानपुण्य खांची । गोत्रकुटुंबा वंची ।
 परि वायणी स्त्रियेची । उणी हो न ये ॥ ९३ ॥
 पूजितें दैवतें जोगावी । गुरुतें बोलें झांकवी ।
 मायेबापा दावी । निदारपण ॥ ९४ ॥
 स्त्रियेचां तरि विखिं । भोगसंपत्ति अनेकी ।
 आणिकि वस्तु नीकी । जे जे देखे ॥ ९५ ॥
 प्रेमाधिलेनि भगते । भजिजे कुलदेवतेतें ।
 तैसा एकाग्रचित्तें । स्त्रि जो उपासी ॥ ९६ ॥
 ह्येतें कोणही देखेल । इयेसि वेग्यासें जाइल ।
 तरि युग चि बुडेल । ऐसें जेया ॥ ९७ ॥
 साच आणि चोख । तें स्त्रियेसी चि अशेष ।
 एरी विधिं जोगावणुक । ते ही नाहिं ॥ ९८ ॥
 नाइटेयां भेण । न मोडी नागाची आण ।
 तैसी पाळी उणखुण । स्त्रियेची जो ॥ ९९ ॥
 किंबहुना बनजया । स्त्री चि सर्वस्व जेया ।
 आणि तियेचेया जालेया । लागि प्रेम ॥ ८०० ॥

आणिक ही जें समस्त । तेथिचें संपत्तिजात ।
 तें जीवाहूनु आत । मानी जो गा ॥ १ ॥
 तो अज्ञानासि मूल । अज्ञाना तेणें बल ।
 हें असो केवल । तें चि तो रूप ॥ २ ॥
 मातलिये सागरि । फोकिलियां तरि ।
 लाटाचां धरझारि । आंदोळे जेवि ॥ ३ ॥
 तैसी प्रिय वस्तु पावे । आणि सुखें जो उंचावे ।
 तैसा अप्रिया सर्वे । तडु खाए ॥ ४ ॥
 ऐसी जेयाचां चित्ति । वैषम्यसाम्याची वोखती ।
 वाहे तो महामती । अज्ञानु गा ॥ ५ ॥
 आणि माझां ठांड भगति । फला लागि जेया आथि ।
 धना दोसें विरगति । नटणें जेवि ॥ ६ ॥
 कां कांताचां मानसि । रिगौनु स्वैरिणी जैसी ।
 राहाटे आणिकेसि । जावेया लागि ॥ ७ ॥
 तैसैं मातें किरीटी । भजती गा पाउटी ।
 करूनि जो दीठी । विषो सुये ॥ ८ ॥
 आणि भजिनलेया वरि । तो विषयो न पवे जरि ।
 सांडि ह्मणे तरि । आघवें टवाल हें ॥ ९ ॥
 कुणबटु कुलवाडी । तैसा आनु देऊ मांडी ।
 आदिलाची पिडी । करी तेयातें ॥ ८१० ॥
 तेया गुरुमार्गी टेंके । जेयाचा सुगुरुवां देखे ।
 तरि तेयाचा मंत्रु सीखे । एर नेवे ॥ ११ ॥
 प्राणिजातेंसि निष्ठुरु । स्थावारिं बहुत भरु ।
 तेथि चि नाहिं एकसरु । निर्वाहो जेया ॥ १२ ॥
 माझी मूर्ति आपजवी । घराचां कोनि बैसवी ।
 आणि देवादेवीं । यात्रे जाए ॥ १३ ॥

नीच आराधन माझे । कार्जी कुलदेवति भजे ।
 पर्वविशेषे भोजे । पूजा आन ॥ १४ ॥
 माझे अधिष्ठान घरी । आणि वैसे आनाचे करी ।
 पितरकार्यअवसरी । पितरांचा होए ॥ १५ ॥
 एकादशिचां दिसि । जेतुला पाडु आमसि ।
 तेतुला चि नागांसि । पंचमीसि ॥ १६ ॥
 चौथि मोटकी पाहे । आणि गणेशाचा चि होए ।
 चाउदासें हणें माए । तूझा चि वो दुर्गे ॥ १७ ॥
 नवमीतें मांडी । आणि वैसे नवचंडी ।
 आदित्यवारि वाढी । भैरवां भरीं ॥ १८ ॥
 पाठिं सोमवार पावे । आणि बेलेंसिं लिंगा धावे ।
 ऐसें एकला चि आघवे । जोगावी जो ॥ १९ ॥
 अखंड भजन करी । उगा न राहे क्षणभरी ।
 आघवेनि गांवदारी । ऐहेव जैसी ॥ २० ॥
 तैसेनि जो गा भगतु । वेखासिं सैरा धावतु ।
 जाण अज्ञानाचा भूर्तु । अवतार तो ॥ २१ ॥
 आणि एकांतें चोखटें । तपोवनें तीर्थें तटें ।
 देखौनि जो वीटे । तो ही तो चि ॥ २२ ॥
 ओणि आत्मा गोचरु होए । ऐसी जे विद्या आहे ।
 तें आइकौनु डौरु वाहे । विद्वांसु जो ॥ २३ ॥
 उपनिषदांकडे न वचे । योगशास्त्र न रुचे ।
 अध्यात्मज्ञानाचे । मनीं चि नाहिं ॥ २४ ॥
 आत्मचर्चा एकि आधि । ऐसिये बुद्धीची भीति ।
 पाड्ढनि जेयाची मति । वोढाल जाली ॥ २५ ॥
 कर्मकांड तरि जाणे । मुखोद्वर्ते पुराणे ।
 ज्योतिषि तो हणें । तैसे चि होए ॥ २६ ॥

शिल्पि अतिनिपुण । सूपशास्त्रि प्रवीण ।
 विधि अथर्वणु । हार्ति जेया ॥ २७ ॥
 कोकि नाहि ठेलें । भरतु करी ह्यणितलें ।
 आगम उपासिले । मूर्त्त होति ॥ २८ ॥
 नीति सुक्षे । वैदिक बुक्षे ।
 काव्यनाटकि दूजें । चतुर नाहि ॥ २९ ॥
 स्मृतिची चर्चा । डंगु जाणे गारुडाचा ।
 निघंटु प्रज्ञेचा । पाइकु करी ॥ ८३० ॥
 व्याकरणि चोखडा । तर्की अतिगाढा ।
 एकि अध्यात्मी चि फुडा । जाल्यधु ॥ ३१ ॥
 तें वांचूनु आघवां शास्त्रि । सिद्धान्तनिर्वाणसूत्री ।
 परि जलो तें नक्षत्री । न पाहे गा ॥ ३२ ॥
 मोराचां आंगि असोसें । पिसें आहाति डोलसें ।
 आणि एकली दीठि नसे । तैसें तें गा ॥ ३३ ॥
 जरि परमाणू एवडें । संजीवनीमूल जोडे ।
 तारि बहू गाडे । भरणें केवि ॥ ३४ ॥
 तैसें शास्त्रजात जाण । आघवें चि अप्रमाण ।
 अध्यात्मज्ञानें विण । एकलेनि ॥ ३५ ॥
 या लागि अर्जुना पाहि । अध्यात्मज्ञानाचां ठांड ।
 जेया निश्चयबुद्धि नाहि । शास्त्रमूढां ॥ ३६ ॥
 तेया शरीर जें जालें । तें अज्ञानाचें बि विरुढलें ।
 जेयाचिये विपत्ती गेलें । अज्ञानवेलीं ॥ ३७ ॥
 तो जें जें बोले । तें अज्ञान चि फूललें ।
 तेयाचें पुण्य तें फललें । अज्ञान चि ॥ ३८ ॥
 अध्यात्मज्ञान कहि । जेणें मानिलें चि नाहि ।
 तो ज्ञानार्थु न देखे काहीं । हें बोलावें असे ॥ ३९ ॥

ऐली चि थडी न पवतां । मले जो माघौता ।
 तेया पैली तीरिची वार्त्ता । केवि जाणवे ॥ ८४० ॥
 कां दाखठां चि जेयाचें । पाये बांधले साचे ।
 तो केवि परिवरिचें । ठेविलें जाणे ॥ ४१ ॥
 तेवि अध्यात्मज्ञान जेया । अनोलख धनंजया ।
 तेया ज्ञानार्थु देखावेया । काइ काज ॥ ४२ ॥
 क्षणौनि आतां विशेषें । तो ज्ञानाचें सार न देखे ।
 हें सांगावें आंखें लेखें । न लगे तुज ॥ ४३ ॥
 जेधवां सगर्भें वाढिलें । तेधवां चि पोटिचें धालें ।
 तैसें मागिलें पदें बोलिलें । तें चि होए ॥ ४४ ॥
 वांचूनु या वेगलें । रूप करणें हें न मिले ।
 घेइ आवंतिलें आंधलें । तैसें जालें ॥ ४५ ॥
 एवं इये उपरती । ज्ञानचिन्हें माघौती ।
 अमानिष्वादिप्रभृती । वाखाणिलीं ॥ ४६ ॥
 जियें ज्ञानपदें अठरा । केलियां एरी मोहरा ।
 अज्ञान ऐसें आकारा । येथ आहे ॥ ४७ ॥
 मागां श्लोकाचेनि अर्द्दादें । ऐसें सांधितलें मुकुंदें ।
 ना उपराठि ज्ञानपदें । तें चि अज्ञान ॥ ४८ ॥
 क्षणौनि इया वाहाणी । मियां केली उपलवणी ।
 वांचौनि दूधा मेलउनि पाणी । फार कीजे ॥ ४९ ॥
 तैसें जी न बडबडीं । पदाची कोर न संडी ।
 मूळध्वनिचिये वाढी । निमित्त जालां ॥ ८५० ॥
 तव श्रोते क्षणति राहे । कें परिहारा ठाऊ आहे ।
 भीसि कां वायां हें । कविपोषका ॥ ५१ ॥
 तूतें श्रीमुरारी । क्षणितलें प्रकटें करी ।
 जे अभिप्राय गव्हरीं । झांकिले आझीं ॥ ५२ ॥

तें देवाचें मनांगत । दावितु आहासि मूर्त ।
 हें इ हणतां चित्त । दाटेल तूजें ॥ ५३ ॥
 हणौनि असो हें न बोलें । परि सवियां चि गा तोखलें ।
 जें लोकत्रया मेलविळें । श्रवणमुखा ॥ ५४ ॥
 आतां या वार । जें तो श्रीहार ।
 बोलिळा तें करी । कथन वेगळें ॥ ५५ ॥
 या संतवाक्या सरिसें । हणितलें निवृत्तिदासें ।
 जी अवधारां ऐसें । बोलिले देउ ॥ ५६ ॥
 हणो तुवां पांडवा । हा चिन्हसमुच्चयो आघवा ।
 आइकिला तो जाणावा । अज्ञानभागु ॥ ५७ ॥
 येया अज्ञानविभागा । पाठि देउनियां पै गा ।
 मग ज्ञानविधि चांगा । दटा होइजे ॥ ५८ ॥
 मग निर्वाललेनि ज्ञानें । ज्ञेय भेटेल मनें ।
 तें जाणावेया अर्जुने । आश केली ॥ ५९ ॥

ज्ञेयं यत्तत्प्रवक्ष्यामि यज्ज्ञात्वामृतमश्नुते ॥

अनादि मत्परं ब्रह्म न सत्सं नासदुच्यते ॥ १२ ॥

तवं सचक्षांचा राउ ॥ हणो जाणौनि तेयाचा भाउ ॥
 परिसैं गा ज्ञेयअभिप्राउ ॥ सांघों आतां ॥ ८६ ॥
 तरि ज्ञेय ऐसें हणणें । वस्तूतें येणें चि कारणें ।
 जें ज्ञानें वांचूनि कव्हणें । उपाया न ये ॥ ६१ ॥
 आणि जाणितलेया वरौतें । जाणणें नाहिं जेथें ।
 जें जाणणें चि तन्मयते । आणी जेयाचें ॥ ६२ ॥
 जें जाणितलेया साठि । संसारा काढुनि कांठी ।
 जिरौनि जाइजे पोटी । नित्यानंदाचा ॥ ६३ ॥
 तें ज्ञेय गा ऐसें । आदि चि जेया नसे ।
 परब्रह्म आपैसें । नांव जेया ॥ ६४ ॥

नाहिं हणों जाइजे । तहं विश्वाकारें देखिजे ।
 विश्व ऐसें हणिजे । तरि हे माया ॥ ६५ ॥
 रूप वर्णु व्यक्ति । नाहिं दृश्यद्रष्टस्थिति ।
 तरि कोणें कैसें आधि । हणावें पां ॥ ६६ ॥
 आणि साच चि जरि नाहिं । तरि महर्दीदि कवणी ठाई ।
 स्फुरत कैचें काइ । तेणें विण ॥ ६७ ॥
 हणौनि आधि नाहिं हे बोली । जें देखौनि मूकें जालिं ।
 विचाराची मोडली । वाट जिय ॥ ६८ ॥
 भांडवटशराविं । जैसी तदाकार असे पृथ्वी ।
 तैसें सर्व होउनि सर्वीं । असे जें वस्तु ॥ ६९ ॥
 आघवां चि देशिं कालिं । नोहे चि देशकाला बेगलीं ।
 जे क्रिया स्थूलास्थूलीं । ते चि हात जेया ॥ ८७० ॥

सर्वतः पाणिपादं तत्सर्वतोक्षिशिरोमुखं ।

सर्वतः श्रुतिमल्लोके सर्वमावृत्य तिष्ठति ॥ १३ ॥

तेयातें एया कारणें । विश्वबाहु हें हणणें ।
 जें सर्व चि सर्वपणें । सदा करी ॥ ७१ ॥
 आणि समस्ता ही ठाया । एकी चि कालिं धनंजया ।
 आलें असे हणौनियां । विश्वांनि नावं ॥ ७२ ॥
 पै सवितेया आंग डोले । हें नाहिं वेगलवेगलें ।
 तैसें सर्वदृष्टें सकळें । स्वरूपें जें ॥ ७३ ॥
 हणौनि विश्वतश्चक्षु । हा अचक्षुचा ठाई पक्षु ।
 बोलवेयां दक्षु । जाला वेदु ॥ ७४ ॥
 पै गा मूर्ति तें चि मुख । हुताशना देख ।
 तैसें सर्वत्र अशेष । भोक्तें जें ॥ ७५ ॥
 एया लागि तेथ पार्था । विश्वतोमुख हे व्यवस्था ।
 आली बाह्यपथा । श्रुतीचेया ॥ ७६ ॥

भाणि वस्तुमार्त्ति गगन । जैसे असे संलग्न ।
 तैसे शब्दजार्त्ति कान । सर्वत्र जेया ॥ ७७ ॥
 झणौनि आझीं तेयातें । झणों सर्वत्र बाइकतें ।
 एवं जें सर्वातें । आवरूनि असे ॥ ७८ ॥
 यन्हविं तन्हीं संहामती । विश्वतश्चक्षु या श्रुती ।
 तेयाचिये व्याप्ती । रूप केलें ॥ ७९ ॥
 वांचूनि हस्तनेत्रपाए । हे भाक काय तेथ आहे ।
 सर्व शून्याचा साहे । निष्कर्ष जें ॥ ८० ॥
 पै कळोळातें कळोलें । प्रसिजतसें ऐसें केलें ।
 परि प्रसितें प्रासा वेगलें । असे काइ ॥ ८१ ॥
 तैसें सर्वादि जें एक । तेथ कें व्याप्यव्यापक ।
 परि झोलावेया नावें एक । करावें लागे ॥ ८२ ॥
 पै शून्य जें दावावें जालें । तें बिंदुलें एक केलें ।
 तैसें अद्वैत दावावें बोलें । द्वैत चि कीजे ॥ ८३ ॥
 झणौनि गा पार्था । गुरुशिष्यसत्पथा ।
 भाडळ पडे सर्वथा । बोलु खुंटे ॥ ८४ ॥
 झणौनि गा श्रुती । द्वैतभावे अद्वैती ।
 निरोपणा वाहाती । वाट केली ॥ ८५ ॥
 तें चि आतां अवधारीं । ये नेत्रगोचरे आकारिं ।
 तें ज्ञेय जेया परीं । व्यापूनि असे ॥ ८६ ॥
 तरि तें गा ऐसें । अवकाशि आकाश जैसें ।
 पटीं पटु होउनि असे । तंतु जेवि ॥ ८७ ॥
 उदक होउनि उदकिं । रसु जैसा अवलोकीं ।
 दीपपणें दीपकीं । तेज जैसें ॥ ८८ ॥
 कप्ररत्नं कापुरीं । सौरभ्य असे जिया परीं ।
 शरीर होउनि शरीरीं । कर्म जेवि ॥ ८९ ॥

किंबहुना ऐसैं पांडवा । सोनें सोनयांचा रवां ।
 तैसैं जें या सर्वा । सर्वागीं असे ॥ ८२० ॥
 पारि रवेपणा माशिवडें । तबं रवा ऐसैं आवडे ।
 बांचूनि सोनें सोनेयां सांगडे । सोनें चि जेवि ९१ ॥
 पै गा वोघू चि वांकुडा । पारि पाणी उजू सुहाडा ।
 बन्हि आला लोखंडा । लोह नव्हे ॥ ९२ ॥
 घटाकारें वेंटाललें । तें नभ गमे वाटुलें ।
 मठि तारि चौफलें । आयें दीसे ॥ ९३ ॥
 पारि ते आकार जैसे । नोहिजव्ही चि आकाशें ।
 तेवि विकारु होउनि तैसैं । विकारी नोहे ॥ ९४ ॥

सर्वेन्द्रियगुणाभासं सर्वेन्द्रियविषयजितं ।

असक्तं सर्वभुक्चैव निर्गुणं गुणभोक्तृ च ॥ १४ ॥

मन मुख्य इंद्रियां । सत्त्वादि गुणा येया ।
 सारिखें ऐसैं धनंजया । आवडे कीर ॥ ९५ ॥
 पै गुलाची गोडी । नव्हे बांधेया सांगडी ।
 तैसीं गुणेंद्रियें फुडी । नाहिं तेथ ॥ ९६ ॥
 आगा क्षीराचिये दशे । घृत चि क्षीराकारें असे ।
 पारि क्षीर चि नव्हे जैसैं । कपिध्वजा ॥ ९७ ॥
 तैसैं जें इये विकारिं । विकारु नव्हे अवधारिं ।
 पारि आकारु नावं भवरी । सोनें तें सोनें ॥ ९८ ॥
 या उघड मन्हाटिया । तें वेगलेपणें धनंजया ।
 जाण गुणेंद्रियां । पासौनियां ॥ ९९ ॥
 नामरूपसंबंधु । जातिक्रियाभेदु ।
 हा आकारासि चि प्रवादु । वस्तुसि नाहिं ॥ १०० ॥
 जें गुण नोहे कहिं । गुणा तेया पाडु नाहिं ।
 पारि तेयाचां चि ठांड । आभासति ॥ १ ॥

एतुल्येया सांठि । सभ्रांताचा पोटी ।
 ना ऐसें गमे किराटी । जें हें धरी ॥ २ ॥
 तरि तें गा धरणें ऐसें । अभ्रातें जेवि आकाशें ।
 कां प्रतिवदन जैसें । आरिसेनि ॥ ३ ॥
 नावारि सूर्यप्रतिमंडल । जैसें धरी सलील ।
 रश्मिकरें मृगजल । धरिजे जेवि ॥ ४ ॥
 तैसें गा संबंधें विण । यां सर्वातें निर्गुण ।
 परि तें वायां जाण । मिथ्या दृष्टी ॥ ५ ॥
 आणि इया परी निर्गुणें । गुणातें भोगणें ।
 रंका राज्य करणें । स्वप्नि जेवि ॥ ६ ॥
 हणौनि गुणाचा संगु । अथवा गुणभोगु ।
 हा निर्गुणि लागु । बोलों चि न ये ॥ ७ ॥
 बहिरन्तश्च भूतानामचरं चरमेव च ।
 सूक्ष्मत्वात्तदविज्ञेयं दूरस्थं चादिके च तत् ॥ १५ ॥
 जें चराचर भूतां । माझि असे पांडुसुता ।
 नाना बन्धि उष्णता । अभेद जेवि ॥ ८ ॥
 तैसेनि अविनाभावें । सूक्ष्मदशे आघवें ।
 व्यापूनि असे तें जाणावें । ज्ञेय एथ ॥ ९ ॥
 जें एक आंतु बाहिरि । जें एक जवळें दूरी ।
 जें एक वांचूनि परि । दुसरी नाहिं ॥ १० ॥
 अविभक्तं च भूतेषु विभक्तमिव च स्थितं ।
 भूतभर्तृ च तज्ज्ञेयं त्रसिष्णु प्रभविष्णु च ॥ १६ ॥
 क्षीरसागरिची गोडी । माजि बहुत थडिये थोडी ।
 हें नाहिं तेया परवडी । पूर्ण जें गा ॥ ११ ॥
 स्वेदजादिप्रभृती । वेगलालां भूति ।
 जेयाचिये अनस्यूती । खोमणें नाहिं ॥ १२ ॥

पैं श्रोतेमुखटिलका । घटसहस्रां अनेका ।
 बिंबोनियां चंद्रिका । न भेदे जेवि ॥ १३ ॥
 नानां लक्षणकणाचिया रासी । क्षारता एकि जैसी ।
 कां कोडी एके उंसीं । एकु चि रसु ॥ १४ ॥
 तैसी अनेकिं भूतजाति । असे एक चि व्याप्ति ।
 विश्वकार्या सुमती । कारण जें ॥ १५ ॥
 ह्यणौनि हा भूताकार । जेथौनि तें चि आधार ।
 कह्योलि सागर । जेया परी ॥ १६ ॥
 पैं बालादि तिहि वयसि । काया एकी चि जैसी ।
 तैसें आदिस्थितिप्राप्ति । अखंड जें ॥ १७ ॥
 सायंप्रातमध्याह्नी । होत जात दिनिदिनी ।
 जैसें कां गगनीं । पालटु नाहिं ॥ १८ ॥
 आगा श्रृष्टिवेले प्रियोत्तमा । जेया नावं ब्रह्मा ।
 व्याप्ति जें नामा । पत्र जालें ॥ १९ ॥
 मग आकार हा हारपे । तेधवां रुद्र जें ह्यणिपे ।
 तें हिं गुणत्रयलोपे । तै जें शून्य ॥ २० ॥

ज्योतिषामपि तज्ज्योतिस्तमसःपरमुच्यते ।

ज्ञानं ज्ञेयं ज्ञानगम्यं हृदि सर्वस्य विद्यते ॥ २१ ॥

जें अग्निचें दीपन । जें चंद्राचें जीवन ।
 सूर्याचे नयन । देखति जेणें ॥ २१ ॥
 आदीसि जे अग्नि । जे वृद्धीसि वृद्धि ।
 बुद्धिसि बुद्धि । जीवाचा जीउ ॥ २२ ॥
 जेयाचेनि उजियेडें । तारागण उघडे ।
 महातेज सुरवाडें । जेणें राहाटे ॥ २३ ॥
 मनाचें मन । जें नेत्राचे नयन ।
 जें घ्राणाचें घ्राण । वाचेची वाचा ॥ २४ ॥



भाषार्थदीपिका

जें प्राणाचे प्राण । जें गतिचे चरण ।
 क्रियोसि कर्चेपण । जेयाचेनि ॥ २५ ॥
 आकार जेणें आकारे । विस्तार जेणें विस्तारे ।
 संहार जेणें संहारे । पांडुकुमरा ॥ २६ ॥
 जें मेदिनियेची मेदिनी । जें पाणी पीडनि असे पाणी ।
 तेजा दिवेल्लावणी । जेणें तेजें ॥ २७ ॥
 जें वायुचा श्वासोश्वास । जें गगनाचा अवकाश ।
 आघवा चि आभास । आभासे जेणें ॥ २८ ॥
 किंबहुना पांडवा । जें आघवें चि इये आघवां ।
 जेथ नाहिं रिगाव्हां । द्वैतभावां ॥ २९ ॥
 जें देखिलेवा चि सर्वे । दृष्टादृश्य आघवें ।
 एकवाट कालवे । सामरस्ये ॥ ३० ॥
 मग तें चि होये ज्ञान । ज्ञाता ज्ञेय हान ।
 ज्ञानें गमिजे स्थान । तें हि तें चि ॥ ३१ ॥
 सरलेयां लेख । जैसैं आंख होंति एक ।
 तैसैं साध्यसाधनादिक । ऐक्यते ये ॥ ३२ ॥
 अर्जुना जिये ठांड । सरे द्वैताची लिही ।
 हें असो हृदयी । सर्वाचां असे ॥ ३३ ॥
 इति क्षेत्र तथा ज्ञानं ज्ञेयं चोक्तं समासतः ।
 मद्भक्त एतद्विज्ञाय मद्भावायोपपद्यते ॥ १८ ॥
 एवं तुज पुढां । आदि क्षेत्र सुहाडा ।
 दाविलें फाडोवाडां । विवंचूनि ॥ ३४ ॥
 तैसैं चि क्षेत्रपाठि । जैसैं देखिलें दीठी ।
 तैसैं चि ज्ञान किरीटी । सांगितलें ॥ ३५ ॥
 अज्ञाना हिं कवातिकें । रूप केलें नीकें ।
 जवं आणि टेंके । पुरे झणसी ॥ ३६ ॥

अध्याय १३ वा

३५७

आणि आतां हें रोकडें । उपपत्तिचेनि सुरवाडें ।
 निरोपिलें उघडें । ज्ञेय पै गा ॥ ३७ ॥
 हे आघवी चि विवंचना । बुद्धी भरुनि अर्जुना ।
 मग सिद्धिभुवना । माक्षि येति ॥ ३८ ॥
 देहादि परिग्रहीं । सन्यासु घेउनि जिहि ।
 जीउ माझां ठाई । वृत्तिकु केला ॥ ३९ ॥
 ते गा माझे किरीटी । हें जाणौनि सेवटी ।
 आपणपेया साथी । मी चि होंति ॥ ४० ॥
 तारि मी होती परी । हे मुख्य अवधारि ।
 सोहपी सर्वा परी । रचिली आक्षि ॥ ४१ ॥
 कडां पायेरी कीजे । निरालि मांचु बांधिजे ।
 अथावि सूयिजे । तारितें जेवि ॥ ४२ ॥
 यन्हवि आघवें चि आत्मां । हें सांघौनु वीरोत्तमा ।
 तें तूझेया मनोधर्मा । मीलैल ना ॥ ४३ ॥
 ह्मणौनि एक चि संचलें । आक्षि चतुर्धा केलें ।
 जें अदलपण देखिलें । तूझिये प्रज्ञे ॥ ४४ ॥
 पै बालक जें जेवविजे । तें घांसु विसें ठाई कीजे ।
 तैसें एक चतुर्व्याजें । कथिलें आक्षि ॥ ४५ ॥
 एक क्षेत्र एक ज्ञान । एक ज्ञेय एक अज्ञान ।
 हे भाग केले अवधान । जाणौनि तूझें ॥ ४६ ॥
 आणि ऐसेन हिं पार्था । जरि हा अभिप्राउ तुज हाता ।
 न ये चि तारि हे वेवस्था । पुढुति सांगों ॥ ४७ ॥
 आतां चौं ठाई न करुं । एक चि ह्मणौनि न सरुं ।
 आत्म्यां अनात्म्यां धरुं सरिसा पाडु ॥ ४८ ॥
 परि तुवां एतुलें करावें । मागौनि तें आक्षां देयवें ।
 जें काना चि नावें ठेवावें । आपणयातें ॥ ४९ ॥

एया श्रीकृष्णाचेया बोला । पार्थु रोमांचितु जाला ।
तेथ देउ० ह्मणति उगला । उचंबल ना ॥ ९५० ॥

प्रकृति पुरुष चैव विध्यनादी उभावपि ।
विकारांश्च गुणांश्चैव विद्धि प्रकृतिसंभवान् ॥ १९ ॥

ऐसेनि तो एता वेगु । धरुनि ह्मणे श्रीरंगु ।
प्रकृतिपुरुषां विभागु । परियस सांघों ॥ ५१ ॥
जेया मार्गातें जर्गी । सांख्य ह्मणति योगी ।
जेयाचिये भाटिवे लागि । मी कपिलु जालां ॥ ५२ ॥
तो आइक निर्दोषु । प्रकृतिपुरुषविवेकु ।
ह्मणतसे आदिपुरुषु । अर्जुनातें ॥ ५३ ॥
तारि पुरुषु अनादि आधि । आणि तैं चि लागौनि प्रकृति ।
समरसिं जैसीं दिवोराति । दोन्हीं असति ॥ ५४ ॥
का रूप नव्हे वायां । रूपा लागली छाया ।
निकण वाढे धनंजया । कर्णेंसि कोंडा ॥ ५५ ॥
तैसिं जाण लवलटें । दोन्ही जियें एकवटें ।
प्रकृतिपुरुषु प्रकटें । अनादिसिद्धें ॥ ५६ ॥
पैं क्षेत्र एणें नावें । जें सांघितलें आघवें ।
तें चि येथ जाणावें । प्रकृति पैं गा ॥ ५७ ॥
क्षेत्रज्ञ ऐसें । जेयातें ह्मणितलें असे ।
तो पुरुषु अनारिसें । न बोलों घेइ ॥ ५८ ॥
इयें अनानें नावें । परि नित्य आन नव्हे ।
हें लक्ष्य न चुकावें । पुडुतिं पुडुतिं ॥ ५९ ॥
तारि केवल जे सत्ता । तो पुरुषु पांडुसुता ।
प्रकृति ते समस्ता । क्रिये नावें ॥ ९६० ॥
बुद्धि इंद्रियें अंतःकरण । इत्यादि विकारभरण ।
आपि तीन्ही गुण । सत्त्वादिक ॥ ६१ ॥

हा आघवा चि मेळावा । प्रकृती जाला जाणावा ।
हे चि हेतु संभवा । कर्माचेया ॥ ६२ ॥
तेथ इछा आणि बुद्धि । घडवी अहंकारोंसि आदी ।
मग तिया लावीति वेधीं । कारणाचा ॥ ६३ ॥
तें चि कारण टाकावेया । जें सूत्र धरणें उपाया ।
तेया नावं धनंजया । कार्यकारण ॥ ६४ ॥

कार्यकारणकर्तृत्वे हेतुः प्रकृतिरुच्यते ।

पुरुषः सुखदुःखानां भोक्तृत्वे हेतुरुच्यते ॥ २० ॥

आणि इछामदाचां धाविं । लागली मनातें उठवी ।
जें इंद्रिय राहाटवी । तें कर्तृत्व गा ॥ ६५ ॥
झणौनि तीन्ही इयें जाणा । कार्यकर्तृत्वकारणा ।
प्रकृति मूल हें राणा । सिद्धांचा हणें ॥ ६६ ॥
एवं तिहिंचेनि समवायें । प्रकृति कर्मरूप होये ।
परि जेया गुणां तराये । तेयां चि सारिखें ॥ ६७ ॥
जें सत्वां अधिष्ठिजे । तें सत्कर्म ह्मणिजे ।
रजोगुणें निफजे । मध्यम तें ॥ ६८ ॥
केवल जरि तमें । जियें निफजति कर्म ।
निषिद्धें अधमें । जाणाविं तियें ॥ ६९ ॥
ऐसि संतासतें । कर्म प्रकृति होतें ।
तेया तव निफजतें । सुखदुःखें गा ॥ ७० ॥
असति दुःख निफजे । सत्कर्मि सुख उपजे ।
तेयां दोहिंचा बोलिजे । भोगु पुरुषा ॥ ७१ ॥

पुरुषः प्रकृतिस्थो हि भुङ्क्ते प्रकृतिजान् गुणान् ।

कारणं गुणसंगोऽस्य सदस्यो निजन्मसु ॥ २१ ॥

प्रकृतिपुरुषांची कुलवाडी । सांगतां देखें असंघडी ।
जे आमुली जोडी । आमुळा खाये ॥ ७२ ॥

सुखदुःखें जवं वेन्हीं । निफजति साचोकारिं ।
 तवं प्रकृति उद्यमु करी । मग पुरुष भोगी ॥ ७३ ॥
 आमुलेया आबुलिये । संगति ना सोये ।
 कां आबुलि जग विये । चोज आइकां ॥ ७४ ॥
 अनंगु हा पेंधा । निकवडा नमुधा ।
 जीर्णु अतिवृद्धा । पासौनि वृद्धु ॥ ७५ ॥
 तेया अडिनावं पुरुष । एन्हविं स्त्री ना नपुंसकु ।
 हें एक ही न्हवे लोक । प्रकृती तव ॥ ७६ ॥
 अचक्षु अश्रवणु । अहस्तु अचरणु ।
 रूप ना वर्णु । नावं आथि ॥ ७७ ॥
 आगा जेथ काहिं चि नाहिं । प्रकृतिच भर्ता पाहिं ।
 किं भोगणें ऐसेया ही । सुखदुःखाचें ॥ ७८ ॥
 तो तरि अकर्ता । उदासु अभोक्ता ।
 परि इया चि पतिव्रता । भोगविजे ॥ ७९ ॥
 जियेतें अलुमालु । रूपागुणाचा ढालु ।
 ते भलेतैसा खेलु । लेखा आणी ॥ ८० ॥
 मा इये प्रकृती तव । गुणमई हें चि नावं ।
 किंबहुना सावेव । गुण ते चि हे ॥ ८१ ॥
 हे प्रकृति क्षणीं नवी । रूपागुणाची आघवी ।
 जडातें ही माजवी । इयेचा माजु ॥ ८२ ॥
 नावें इया प्रसिद्धें । सखेहें इया सखिगधें ।
 इंद्रियें प्रबुद्धें । इयेचेनि ॥ ८३ ॥
 काइ मन नपुंसक । किं ते भोगी तीन्ही लोक ।
 ऐसेसैं अलौलिक । करणें इयेचें ॥ ८४ ॥
 हे भ्रमाज्जें महाद्वीप । हे व्यासिचें चि रूप ।
 विकार उमप । इया केले ॥ ८५ ॥

हे कामाची मांडवी । मोहवनिची माधवी ।
 जे प्रसिद्ध दैवी । माया ऐसी ॥ ८६ ॥
 हे वाङ्मयाची वाढि । हे साकारपणा जोडि ।
 प्रपंचाची धाडि । अभंग हे ॥ ८७ ॥
 कला येथौनि जुलिया । विद्या इया चि केलिया ।
 इच्छा ज्ञान क्रिया । वियाली हे ॥ ८८ ॥
 हे नादाची टांकसाल । हे चमत्काराचें वेळाउल ।
 किंबहुना सकल । खेळु इयेचा ॥ ८९ ॥
 हे उत्पत्ति प्रलयो होत । ते इयेचे सायं प्रात ।
 हें असो आतां बहुत । मोहन हे ॥ ९० ॥
 हे अद्वयाचे दूसरें । हे निःसंगाचें सोयरें ।
 हे निराळेंसि घरें । नांदति असे ॥ ९१ ॥
 इयेतें एतुले वेन्हीं । सौभाग्याची व्याप्ति थोरी ।
 क्षणौनि तेया आवरी । अनावरातें ॥ ९२ ॥
 तेयाचां तवं ठांड । निपटौनि काहिं चि नाहिं ।
 किं तेया आघवें हिं । आपण होये ॥ ९३ ॥
 तेया स्वयंभाची संभूति । तेया अमूर्त्ताची मूर्त्ति ।
 आपण होये स्थिति । ठाऊ तेया ॥ ९४ ॥
 तेया अनर्त्ताची आर्त्ति । तेया पूर्णाची तृप्ति ।
 तेया अकुलाची जाति । आपण होये ॥ ९५ ॥
 तेया अचर्चाचिन्ह । तेया अपाराचें मान ।
 तेया अमनस्थाचें मन । बुद्धि होये ॥ ९६ ॥
 तेया निराकाराचा आकार । तेया निर्व्यापाराचा व्यापार ।
 निरहंकाराचा हंकार । होउनि ठाके ॥ ९७ ॥
 तेया अनामाचें नाम । तेया अजन्माचें जन्म ।
 आपण होये कर्म । अक्रिया तेया ॥ ९८ ॥

तेया निर्गुणाचे गुण । तेया अचरणाचे चरण ।
 तेया अश्रवणाचे श्रवण । चक्षु ही होये ॥ ९९ ॥
 तेया भावातीताचे भाव । तेया निरवयवाचे अवयव ।
 किंबहुना होये सर्व । पुरुषाचे हे ॥ १००० ॥
 ऐसें इया प्रकृती । आपुलिया सर्वव्याप्ती ।
 तेया अविच्छिन्नते विच्छिन्नी । माजि कीजे ॥ १ ॥
 तेथ पुरुषत्व जें असे । तें ये इये प्रकृतिदशे ।
 चंद्रमा अवसे । पडिला जैसा ॥ २ ॥
 विदल बहू चोखा । मीनलेया वाला एका ।
 कसु होये पांचिका । जिया परीं ॥ ३ ॥
 कां साधुतें गोंदलिं । संचरौनि सुये मेलिं ।
 नाना सुदिनाचां आभालिं । दुर्दिनु कीजे ॥ ४ ॥
 तेथ पय पशुचां पोटीं । कां बन्दि जैसा काष्टीं ।
 गूडनि घेतला पटीं । रत्नदीपु ॥ ५ ॥
 राजा पराधीनु जाला । सिंहुं रोगें रुंधला ।
 तैसा पुरुष प्रकृती आला । स्वतेजा मुके ॥ ६ ॥
 जागता नरु सहसा । निद्रा पाडौनि जैसा ।
 स्वमिचिया ही सोसा । वश्यु कीजे ॥ ७ ॥
 तैसें प्रकृति जालेपणें । पुरुषा गुण भोगणें ।
 उदासु अंतौरिगुणें । आंतुडविजे ॥ ८ ॥
 तैसें अजा नित्या होए । आंगिं जन्ममृत्युचे घाए ।
 वाजति जें लाहे । गुणसंगु हा ॥ ९ ॥
 पारि तें ऐसें पांडुसुता । तातलें लोह पीटितां ।
 जेवि वन्हीसी चि घाता । बोलिजति ॥ १०१० ॥
 कां आंदोललेया उदक । प्रतिभा होये अनेक ।
 तें नानात्व स्मरति लोक । चंद्रिं जेवि ॥ ११ ॥

दर्पणाचिया जवलिका । दूजेपण जैसैं मुखा ।
 कुंकुमें स्फटिका । लोहिव्व होए ॥ १२ ॥
 तैसा गुणसंगमें । हा अजन्मा जन्में ।
 पावतु ऐसा गमे । यन्हविं नाहिं ॥ १३ ॥
 अधमोत्तमा योनी । या ऐसिया मानी ।
 जैसा संन्यासी स्वप्नी । अंत्यु होये ॥ १४ ॥
 लणौनि केवल पुरुषां । नाहिं होणें भोगणें देखां ।
 एथ गुणसंगू चि अशेषा । लागां मूल ॥ १५ ॥

उपद्रष्टानुमंता च भर्ता भोक्ता महेश्वरः ।

परमात्मेति चाप्युक्तो देहेस्मिन्पुरुषः परः ॥ २२ ॥

हा प्रकृती माझि उभा । परि जुइं जैसा बोथंबा ।
 प्रकृति पृथ्वी नभा । तेतुला पाडू ॥ १६ ॥
 प्रकृतिचां तटीं । मेरु हा किरीटी ।
 मांजि बिंबे पारि लोटीं । लोटीं नेणे ॥ १७ ॥
 आणि प्रकृति होये जाये । हा तों असतू चि आहे ।
 लणौनि आब्रह्माचें होए । शासन हा ॥ १८ ॥
 प्रकृति येणें जिये । या सत्ता जग विये ।
 या लागि इये । वरैतु हा ॥ १९ ॥
 अनंत काल किरीटी । जिया मिलति इया श्रृष्टि ।
 तिया रिगति एयाचां पोटीं । कल्पांतसमई ॥ १०२० ॥
 हा महद्ब्रह्मा गोसांवि । हा ब्रह्मगोल लाघवी ।
 अपारपणें मवी । प्रपंचातें ॥ २१ ॥
 पै या देहा माझारि । परमात्मा ऐसी जे परि ।
 बोलिजे ते अवधारिं । एयातें चि ॥ २२ ॥
 अगा प्रकृती परौता । एकु आधि पांडुसुता ।
 ऐसा प्रवादु तो तत्वता । पुरुष हा पै ॥ २३ ॥

यएवं वेत्ति पुरुषं प्रकृतिं च गुणैः सह ।

सर्वथा वर्तमानोपि न स भूयोभिजायते ॥ २३ ॥

जो निखलपणें येणें । पुरुषा तेया जाणे ।

आणि गुणाचें करणें । प्रकृतिचें जें ॥ २४ ॥

हें रूप हे छाया । पैल जल हे माया ।

ऐसें जो धनंजया । निवाडु करी ॥ २५ ॥

तेणें पाडें अर्जुना । प्रकृतिपुरुषविवंचना ।

जेयाचआ मना । गोचर जाली ॥ २६ ॥

तो शरीराचेनि मेलें । करू कां कर्में सकलें ।

परि आकाश धूमें न मैले । तैसा असे ॥ २७ ॥

आथिलेनि देहें । नेघेपे देहमोहें ।

देहं गेलेयां नोहे । पुनरपि तो ॥ २८ ॥

ऐसा तेया एकु । उपकारु अलौलिकु ।

प्रकृतिपुरुषविवेकु । करी पै गा ॥ २९ ॥

ध्यानेनात्मनि पश्यति केचिदात्मानमात्मना ।

अन्ये सांख्येन योगेन कर्मयोगेन चापरे ॥ ३० ॥

परि हा चि अंतरि । विवेकु भानुचिया परी ।

उदैजे ते अवधारीं । उपाये बहुत ॥ १०३० ॥

कोणही एक सूभटा । विचाराचां आगिठां ।

आत्मानात्मकीटा । पुट देउनि ॥ ३१ ॥

सतीस ही बानी भेद । तोडूनियां निर्विवाद ।

निवडीति शुद्ध । आत्मतत्व ॥ ३२ ॥

तेया आपणपेयाचां पोटीं । आत्मध्यानाचेया दीठी ।

देखति गा किरीटी । आपणपें ॥ ३३ ॥

आणिक पै दैवबर्गे । देखति सांख्ययोगें ।

एक ते आंगलगें । कर्माचेनि ॥ ३४ ॥

अध्याय १३ वा

५५३

अन्ये त्वेवमजानंतः श्रुत्वान्येभ्य उपासते ।

ते पि चातितरंत्येव मृत्युं श्रुतिपरायणाः ॥ २५ ॥

येणें येणें प्रकारें । निस्तरति साचोकारें ।

हैं भय भाउरें । आववें चि ॥ ३५ ॥

परि ते करिति ऐसैं । अभिमानु दवडूनि देसैं ।

एकांचेया विश्वासैं । टेंकति बोला ॥ ३६ ॥

जे हिताहित देखति । हाणि कणवा घेपति ।

पूसौनि सीणु हरिति । देंति सुख ॥ ३७ ॥

तेयांचेनि मुखें निगे । तेतुलें आदरें चांगें ।

आइकौनियां आंगें । मनें होति ॥ ३८ ॥

तेयां आयिकणेयां चि नावें । ठेविति गा आववें ।

तेयां आखरांसि जीवें । करिति लोण ॥ ३९ ॥

तेया परीं कपिध्वजा । या मरणार्णवा समजा ।

पासौनि निगति वोजा । गोमटिया ॥ १०४० ॥

ऐसे हे उपाये । बहुवस एथ पाहे ।

जाणावेया होये । एकि वस्तु ॥ ४१ ॥

आतां असो हें बहुत । पैं सर्वार्थांचें मथित ।

सिद्धांतनवनीत । देऊं तुज ॥ ४२ ॥

ऐतुलेनि पांडुसुता । अनुभवु लाहणा आइता ।

येर तवं तुज होतां । सायास नाहिं ॥ ४३ ॥

यावत्संजायते किंचित्सत्त्वं स्थावरजंगमं ।

क्षेत्रक्षेत्रज्ञसंयोगात्तद्विद्धि भरतर्षभ ॥ २६ ॥

हणौनि ते बुद्धि रचूं । मतवाद हे खांचूं ।

सोलीवं निर्वचूं । फलितार्थु चि ॥ ४४ ॥

परि क्षेत्रज्ञ एणें बोलें । तुज आपणपें जें दाखविलें ।

आणि क्षेत्र सांधितलें । आववें चि ॥ ४५ ॥

तेषां येस्येरांचां मेलीं । होइजे भूतीं सकळिं ।
 अनिलसंगें सलीलीं । कल्लोल जैसे ॥ ४६ ॥
 कां तेजा आणि उखरा । भेटि जालेयां वीरा ।
 मृगजलाचेया पूरा । रूप होये ॥ ४७ ॥
 नाना धाराधरधारीं । झळवली वसुंधरी ।
 उठी जेवि अंकुरीं । नाना विधीं ॥ ४८ ॥
 तैसें चलाचल आघवें । जें काहिं जीउ नावें ।
 तें तो उभययोगें संभवें । ऐसें जाण ॥ ४९ ॥
 एया लागि अर्जुना । क्षेत्रज्ञा प्रधाना ।
 पासौनि न्हवति भिन्ना । भूतव्यक्ती ॥ १०५० ॥

समं सर्वेषु भूतेषु तिष्ठंतं परमेश्वरं ।

विनश्यत्स्वविनश्यंत यः पश्यति स पश्यति ॥२७॥

पै पटुत्व तंतु नोहे । तन्हीं तंतुवें चि तें आहे ।
 ऐसां खोळि डोलां पाहे । ऐक्य हें गा ॥ ५१ ॥
 भूतें आघविं चि होंति । एकाचि एकिं आहाति ।
 पै भूतपतीति । वेगलीक असे ॥ ५२ ॥
 याचि नावें आनानें । अनारिसि वर्तनें ।
 वेख ही सिनाने । आघवेयांचे ॥ ५३ ॥
 ऐसें देखौनि किरीटी । भेदु हान सूंसि पोटीं ।
 तरि जन्माचिये आटी । न लाहासि निगों ॥ ५४ ॥
 पै नामाप्रयोजनशीलें । दीघें वक्रें वर्तुलें ।
 होंति येकिचियें फलें । तुंबिणिये ॥ ५५ ॥
 होंतु कां उजू वांकुडे । परि वेलिचें हें न मोडे ।
 तैसिं भूतें अवघडें । वस्तू उजू ॥ ५६ ॥
 अंगारकणीं बहुवासिं । उष्णता समान जैसी ।
 तैसा जीवराशी । परेस्तु असे ॥ ५७ ॥

गगनभरिं धारा । परि पाणी एक वीरा ।
 तैसा या भूताकारा । सर्वांगी तो ॥ ५८ ॥
 हे भूतग्राम विषम । वस्तु येथ सम ।
 घटमठी ब्योम । जिया परीं ॥ ५९ ॥
 हा नासतां भूताभासु । एथ आत्मा अविनाशु ।
 जैसा केयूरादिकि कसु । सोनेयांचा ॥ १०६० ॥
 एवं जीवधर्महीनु । जीवांसि अभिनु ।
 जो देखे सुनयनु । ज्ञानियां माझि ॥ ६१ ॥
 ज्ञानाचां डोलां डोलसां । माझि डोलसु तो वीरेशा ।
 हे स्तुति नोहे बहुवसा । भाग्याचा तो ॥ ६२ ॥
 समं पश्यन् हि सर्वत्र समवस्थितमीश्वरं ।
 न हिनस्त्यात्मनात्मानं ततो याति परां गतिं ॥ २८ ॥
 जें इंद्रियबोकौटी । देहधातुची त्रिकुटी ।
 पांचमेलावेयाची बोग्गटी । दारुण हे ॥ ६३ ॥
 हे उघडी पांचवेउली । हे पंचधा आंगिं लागली ।
 जीवपंचानना सांपडली । हरिणिकुटी ॥ ६४ ॥
 ऐसां असौनि इये शरीरीं । कोणु अनन्यबुद्धीची सूरी ।
 अनिलभावाचां उदरीं । दाटी चि ना ॥ ६५ ॥
 परि इये देहीं असतां । तो नैये चि आपणपेयां घाता ।
 आणि शेषि पांडुसुता । तेथ मिले ॥ ६६ ॥
 जेथ योगज्ञानाचिया प्रौढी । बोलांझनि जन्मकोडी ।
 न निगों या भाषा बुडी । देंति योगी ॥ ६७ ॥
 जें आकाराचें पैल तीर । तुर्येचें माजिघर ।
 जे नादाची पैल मेर । परब्रह्म जें ॥ ६८ ॥
 मोक्षा सगट गती । जेथें एंति विश्रांती ।
 गंगादि अपांपती । सरिता जेनि ॥ ६९ ॥

तैं सुख येणें चि देहें । पाये पाखालणियां लहे ।
 जो भूतवैषम्य नोहे । विषमबुद्धी ॥ १०७० ॥
 दीपाचेया कोडी जैसैं । एक चि तेज प्रकाशे ।
 तैसा जो असतू चि असे । सर्वत्र ईशु ॥ ७१ ॥
 तेया समातें पांडुसुता । जीवें जो देखे समता ।
 तो मरणा आणि जीविता । नांगवे फुडा ॥ ७२ ॥
 ह्यणौनि तो दैवांगला । वानित असो वेलोवेलां ।
 साम्यसेजे डोला । लागला जेया ॥ ७३ ॥

प्रकृत्यैव च कर्माणि क्रियमाणानि सर्वशः ।

यः पश्यति तथात्मानमकर्तारं स पश्यति ॥ २९ ॥

आणि मनोबुद्धिप्रमुखें । कर्म जियें अशेखें ।
 करी प्रकृति चि जो देखे । साचें जो गा ॥ ७४ ॥
 घरिचीं चि राहाटति घरीं । घर काहिं न करी ।
 अभ्र धांवे अंबरीं । अंबर उर्गे ॥ ७५ ॥
 तैसी प्रकृति आत्मप्रभा । खेले गुणविधा शोभा ।
 येथ आत्मा तो वोथंबा । नेणों कोणु ॥ ७६ ॥
 ऐसेनि एणें निवाडें । जेयाचां जीविं उजिवडे ।
 अकर्तेयातें फुडें । देखिलें तेणें ॥ ७७ ॥

यदा भूतपृथग्भावमेकस्थमनुपश्यति ।

तत एव च विस्तारं ब्रह्म संपद्यते तदा ॥ ३० ॥

यन्हविं तैं चि अर्जुना । होइजे ब्रह्मसंपन्ना ।
 जैं इया भूताकृती भिन्ना । दीसति एकिं ॥ ७८ ॥
 लहरिया जैसिया जालें । परमाणु—कणिका स्थलीं ।
 रश्मिकर मंडलिं । सूर्याचां ॥ ७९ ॥
 नातारि देहिं अवयव । मनिं आंधवे भाव ।
 विस्फुलिंगिं सर्व । वन्हि एकि ॥ १०८० ॥

तैसे भूताकार एकाचे । एथ दृष्टि रिगे जै साचें ।
 तें चि ब्रह्मसंपत्तिचें । तारुं लागे ॥ ८१ ॥
 मग जिये तिये कडे । ब्रह्माची दृष्टि उघडे ।
 किंबहुना जोडे । अपार सुख ॥ ८२ ॥
 एतुलेनि तुज पार्था । प्रकृतिपुरुषवेवस्था ।
 ठायें ठाऊं प्रतीतिपंथा । माजि जाली ॥ ८३ ॥
 अमृत जैसें ये चूला । निधान जैसें देखिजे डोलां ।
 तेतुला जीवाला । मानावा हा ॥ ८४ ॥
 वांचूनि जालिये प्रतीती । घर बांधणें चिर्ति ।
 तें आतां ना सुभद्रापति । या वरि ॥ ८५ ॥
 तरि एक दोनि ते बोल । बोलिजति सखोल ।
 देइ मनाची बोल । मग तें घेइ ॥ ८६ ॥
 ऐसें देवें ह्यणितलें । मग बोलों आदरिलें ।
 तेथ अवधानाचें केलें । सर्वांग एरें ॥ ८७ ॥

अनादित्वाभिर्गुणत्वात्परमात्मायमव्ययः ।

शरीरस्थोपि कौंतेय न करोति न लिप्यते ॥ ३१ ॥

ह्यणे परमात्मा ह्यणिपे । तो ऐसा जाण सरूपें ।
 जलिं जलें न सिंपे । सूर्यु जैसा ॥ ८८ ॥
 कां जला आधि पाठिं । सूर्यु असतू चि किरीटी ।
 माजि बिंबे ते दीठी । आणिकाचिये ॥ ८९ ॥
 तैसा आत्मा देहिं । आधि ह्यणिपे हें काहिं ।
 साचें तरि नाहिं । तो जेथिचा तेथ ॥ १०९० ॥
 आरिसां मुख जैसें । बिंबलेया नावं असे ।
 देहिं वसणें तैसें । आत्मतत्व ॥ ९१ ॥
 तेया देहा ह्यणति भेटि । हे सपाइ नीजीव गोठि ।
 वारेयानि वालुवे गांठि । केहिं आहे ॥ ९२ ॥

आगि आणि पीसा । दोरा सुयी जैसा ।
 केउता सांदा आकाशा । पाखारोंसि ॥ ९३ ॥
 एक निगे पूर्वा कडे । एक तें पश्चिमें पडे ।
 तिये भेटिचेनि पाडें । संबंधु हा ॥ ९४ ॥
 उजियडा आंधरेया । जो पाडु मृता उभेया ।
 तो चि गा आत्मेयां । देहा जाण ॥ ९५ ॥
 रात्रि आणि दिवसा । कनका आणि कापुसा ।
 पाडु कां जैसा । तैसा चि हा ॥ ९६ ॥
 हें तवं पांचाचें जालें । कर्माचां गुणि गुंतलें ।
 भवंतसे चार्किं सुदलें । जन्ममृत्युचां ॥ ९७ ॥
 हे कालानलाचां कुंडीं । घातली लोण्यांची उंडी ।
 मासी पांख पाखडी । तवं हे सरे ॥ ९८ ॥
 हें विपाएं आगी पडे । तरि भस्म होनि उडे ।
 जालें श्वाना वरिपडें । तरि ते चि विष्टा ॥ ९९ ॥
 यां चूके दोन्ही काजां । तरि होये क्रिमिचा पुंजा ।
 ऐसा परिणामु कपिध्वजा । कश्मलु गा ॥ ११०० ॥
 या देहाची हे दशा । आणि आत्मा तो ऐसा ।
 पै सिद्धु नित्यु आपैसा । अनादिपणें ॥ १ ॥
 सकल ना निष्कल । अक्रियु ना क्रियाशील ।
 कृशु ना स्थूल । निर्गुणपणें ॥ २ ॥
 आभासु ना निराभासु । प्रकाशु ना अप्रकाशु ।
 अल्पु ना बहुवसु । अरूपपणें ॥ ३ ॥
 रीता ना भरितु । रहितु ना सहितु ।
 मूर्तु ना अमूर्तु । शून्यपणें ॥ ४ ॥
 आनंदु ना निरानंदु । एकु ना विविधु ।
 मोकला ना बद्ध । अत्मेपणें ॥ ५ ॥

एतुला ना तेतुला । आयिता ना रचला ।
 बोलता ना उगला । अलक्षपणें ॥ ६ ॥
 सृष्टिचां होणां न रचे । सर्वसंहारें न वेचे ।
 आथिनाथि यां दोहींचें । पंचत्व तो ॥ ७ ॥
 मवे ना चर्चे । वाढे ना खांचे ।
 वीटे ना वेचे । अव्ययपणें ॥ ८ ॥
 एवरूपु पै आत्मा । देहिं जे ह्मणति प्रियोत्तमा ।
 तें मठाकारिं व्योमा । नावं जैसें ॥ ९ ॥
 तैसें तियाचिये आनाभूती । होंती जाती देहाकृती ।
 तो घे ना सांडी सुमती । जैसा तैसा ॥ १११० ॥
 अहोरात्रें जैसीं । होंति जाति आकाशीं ।
 आत्मसत्ते तैसीं । देहें जाण ॥ ११ ॥
 ह्मणौनि इये शरीरीं । काहिं करवी नां करी ।
 आयितां हिं व्यापारिं । सज्जु नोहे ॥ १२ ॥
 या लागि स्वरूपें । उणा पुरा नेघेपे ।
 हें असो तो न लिपे । देहीं देहें ॥ १३ ॥

यथा सर्वगतं सौक्ष्म्यादाकाशं नोपलिप्यते ।
 सर्वत्रावस्थितो देहे तथात्मा नोपलिप्यते ॥ ३२ ॥

आगा आकाश कें नाहिं । हें न रिगे चि कंढणिये ठाई ।
 परि काइसेनि हिं काहिं । गादे चि ना ॥ १४ ॥
 तैसा सर्वत्र सर्वदेहीं । आत्मा असतू चि असे पाहीं ।
 परि संगदोषें एके हिं । लिप्तु नोहे ॥ १५ ॥
 पुडुतिं पुडुतिं एथें । हें त्रि लक्षण निरुतें ।
 जें जाणावें क्षेत्रज्ञातें । क्षेत्रविहीना ॥ १६ ॥
 संसर्गें चेतविजे लोहें । परि लोह चि भ्रामक नोहे ।
 क्षेत्रज्ञा आहे । तैसा पाडु ॥ १७ ॥

दीपकाचां अर्ची । राहाटि वाहे घरींची ।
 तन्हीं वेगलीक कोडीची । दीपा घरा ॥ १८ ॥
 असें काष्टाचां पोटी । वन्हि जैसा किरीटी ।
 काष्ट नोहे या दीठी । पाहिजे जेवि ॥ १९ ॥
 अपाडु नभा आभाला । रवी आणि मृगजला ।
 तैसा चि हा ई डोला । देखावा पै ॥ ११२० ॥

यथा प्रकाशयत्येकः कृत्स्नं लोकमिमं रविः ॥

क्षेत्र क्षेत्री तथा कृत्स्नं प्रकाशयति भारत ॥ ३३ ॥

हें आषवें चि असो एकु । गगनौनि जैसा अर्कु ।
 प्रकटवी लोकु । नावें नावें ॥ २१ ॥
 एथ क्षेत्रञ्च तैसा । प्रकाशकु क्षेत्राभासा ।
 या वरौतें हें न पुसा । शंका नेघां ॥ २२ ॥
 शब्दतत्त्वसारज्ञा । पै ते चि देखणी प्रज्ञा ।
 जे क्षेत्रा क्षेत्रज्ञा । अपाडु देखे ॥ २३ ॥
 एयां दोहिंचें अंतर । देखावेया चतुर ।
 ज्ञानियांचें दार । आराधिति ॥ २४ ॥
 या चि लागि सुमती । जोडीति तपसंपत्ती ।
 शास्त्रांचीं दुभती । पोसिति घरीं ॥ २५ ॥
 योगाचेया आकाशा । वलधिजे येवढा धिवंसा ।
 याचिया चि आशा । पुरुषासि गा ॥ २६ ॥
 शरीरादि समस्त । मानिताति अंतवंत ।
 जीव संतांचे करित । वाहाणधर ॥ २७ ॥
 ऐसिया ऐसिया परी । ज्ञानाचिया भरोवरी ।
 करूनियां अंतरीं । निरुते होंति ॥ २८ ॥
 मग क्षेत्रक्षेत्रज्ञाचें । ते अंतर देखति साचें ।
 ज्ञानें उन्मेष तेयांचे । वोवाळूं आह्मीं ॥ २९ ॥

आणि महाभूतादिकि । प्रभेदवेलि अनेकि ।
 पसरली असे लटकी । प्रकृति जे हे ॥ ११३० ॥
 ते शुक्नलिकान्याये । न लगती लागली आहे ।
 हे जैसी तैसी होए । ठाउवें जेया ॥ ३१ ॥
 जैसी माला ते माला । ऐसें चि देखिजे डोलां ।
 सर्पबुद्धि तवं टवाला । उखी होउनि ॥ ३२ ॥
 कां शुक्तिते शुक्ति । हें साच हे प्रतीति ।
 रूपेयाची भ्रांति । जाउनियां ॥ ३३ ॥
 तैसी वेगली वेगलेपणें । प्रकृति जै अंतष्करणें ।
 देखति ते मी हणें । ब्रह्म होति ॥ ३४ ॥
 जें आकाश होउनि वाड । जें अव्यक्ताची पैली कड ।
 जें भेटलेयां आहाडबाहाड । पडों नेंदी ॥ ३५ ॥

क्षेत्रक्षेत्रज्ञयोरेवमंतरं ज्ञानचक्षुषा ।

भूतप्रकृतिमोक्षं च ये विदु र्यति ते परं ॥ ३६ ॥

आकारु जेथ सरे । जीवत्व जेथ वीरे ।
 द्वैत जेथ नुरे । अद्वय जें ॥ ३६ ॥
 तें परत्व पार्था । होति ते सर्वथा ।
 जें आत्मानात्मवेवस्था- । राजहंस ॥ ३७ ॥
 ऐसा जी हा आघवा । श्रीकृष्णें तेया पांडवा ।
 उगाणा दीधला जीवा । जीवाचेया ॥ ३८ ॥
 परी कलशिचें परी । रिचविलें जेया परी ।
 आपणपें तेया हरी । दीधलें तैसें ॥ ३९ ॥
 आणि कोणा देता कोणु । तो नरु तैसा नारायणु ।
 वारि अर्जुनातें कृष्णु । हा मी हणें ॥ ११४० ॥
 परि असो हें नाधिलें । न पुसतां कां बोलें ।
 किंबहुना दीधलें । सर्वस्व देवें ॥ ४१ ॥

किं तो पार्थु मनीं । आह्नुइं धणि न मनी ।
 अधिकाधिक उतान्ही । वाढवितु असे ॥ ४२ ॥
 स्नेहाचिया भरोवरी । आबुथिला दीपु घे थोरी ।
 चाड अर्जुनाचां अंतरिं । परिसतां तैसी ॥ ४३ ॥
 येथ सुगराणि उदारें । रसज्ञें जेवणहारें ।
 मिलति मग अवतरे । हातु जैसा ॥ ४४ ॥
 तैसैं जी होंतसे देवा । तेया अवधानाचेया लवलवा ।
 वाखाण चढलें थावां । चौगुणे वेऱ्हीं ॥ ४५ ॥
 सुवायें मेघु सांवरें । जैसा चंद्रें सिंधु भरे ।
 तैसा मातला रसु आदरें । श्रोतेयाचेनि ॥ ४६ ॥
 आतां आनंदमय आघवें । विश्व चि कीजेल देवें ।
 तें रायें परिसावें । संजयो ह्मणे ॥ ४७ ॥
 एव जें महाभारतीं । व्यासें अप्रांतमती ।
 भीष्मपर्विं शार्ति । ह्मणितली कथा ॥ ४८ ॥
 तो कृष्णार्जुनसंवादु । नागारिं बोलिं विशदु ।
 सांघों दाउं बंधु । वोवियेचा ॥ ४९ ॥
 नसुदी चि शांतीकथा । आणिजेल किर वाक्यपथा ।
 परि श्रिंगाराचां माथां । पावो ठेविति ॥ ११९० ॥
 दाउं वेल्हाळ देशी नवी । जैसी साहित्यातें वोजावी ।
 अमृता ही चूकि ठेवी । गोडिसेपणें ॥ ५१ ॥
 बोलु वेल्हावितेनि गुणें । चंद्रासि घे उमाणें ।
 रसुभंगु भुलवणें । नादु लोपी ॥ ५२ ॥
 खेचरांचेया ही मना । आणिं सात्विकाचा पान्हा ।
 श्रवणा सवें सुमना । समाधि जोडे ॥ ५३ ॥
 तैसा वाग्विलासु विस्तारं । गीतार्था विश्व भरं ।
 आनंदाचें आवारं । मांडू जगा ॥ ५४ ॥

फीटो विवेकाची वाणि । हो काना मना जीणि ।
 देखो आवडे ते खाणि । ब्रह्मविद्येची ॥ ५५ ॥
 दीसो परतत्व डोलां । पाहो सुखाचा सोहळा ।
 रिगो महाबोधु सुकाला । माजि विश्व ॥ ५६ ॥
 हें निफजे आतां आघवें । ऐसें बोलिजेल बरवें ।
 जें अधिष्ठली असें परदेवें । निवृत्ती मीं ॥ ५७ ॥
 ह्मणौनि आखरीं सुभेदिं । उपमाश्लेषकोंदाकोंदी ।
 झाडा देईन प्रतिपदीं । ग्रंथार्थासि ॥ ५८ ॥
 हा ठाऊं बेरि मातें । पुरतेयां आहे सारस्वतें ।
 केलें असे श्रीमंतें । गुरुरायें ॥ ५९ ॥
 तेणें जी कृपासावायें । मी बोलें तेतुलें सामाये ।
 आणि तुमचिये सभे लाहें । गीतार्थ ह्मणों ॥ ११६० ॥
 वरि तुलां संतांचे पाये । आजि मी पातलां आहे ।
 ह्मणौनि जी नोहे । अटक काहिं ॥ ६१ ॥
 प्रभू काश्मिरिं मूकें । नुपजे जी कवतुकें ।
 नाहिं गुणिं सामुद्रिकें । लक्ष्मीयेसि ॥ ६२ ॥
 तैसी तुलां संतां पासि । अज्ञानाची गोठि काइसी ।
 या लागि नवरसि । वरिखैन मीं ॥ ६३ ॥
 किंबहुना आघवां । मज अवसरु देयावा ।
 ज्ञानदेऊं ह्मणे बरवा । सांघैन ग्रंथु ॥ ६४ ॥
 ॐ तत्सदितिश्रीमद्भगवद्गीतासूपनिषत्सु ब्रह्मविद्यायां
 योगशास्त्रे श्रीकृष्णार्जुनसंवादे क्षेत्रक्षेत्रज्ञयोगो
 नाम त्रयोदशोऽध्यायः ॥

॥ सर्वात्मकश्रीकृष्णार्पणमस्तु ॥



ज्ञानेश्वरी

अध्याय चौदावा

श्रीगणेशायनमः ॥

जय जय आचार्या । समस्तसुरवर्या ।
प्रज्ञाप्रभातसूर्या । सुखोदया ॥ १ ॥
जय जय सर्वविसावेया । सोहंभावमुहावेया ।
नानालोकहेलवेया । समुद्रा तूं ॥ २ ॥
आइकैं गा आर्त्तबंधू । निरंतरकरुणासिंधू ।
विशदविद्यावधू—वल्लभा जी ॥ ३ ॥
तूं जेया प्रतिलपसि । तेया जग हें दाविसि ।
प्रकट तैं करिसी । आघवें तूं ॥ ४ ॥
पुढैलां तरि चोरिजे । हा दृष्टिबंधु निफजे ।
नवल लाघव तूझें । घरिचां घरीं ॥ ५ ॥
जें तूं चि तूं सर्वा एया । कवणा बोधु कवणा माया ।
ऐसें आपें आपु लाघविया । नमो तूज ॥ ६ ॥
जाणों जर्गी आप वोळें । हें रस जी, तुवां केलें ।
तूझेनि क्षेमत्व आलें । पृथिव्येसि ॥ ७ ॥
रनिचंद्रादिशूक्ति । उदो करितां त्रीजगती ।
तें तूझिया दीसी । तेज तेजां ॥ ८ ॥

चलबलिजे अनिलें । तें देविकेनि जी बलें ।
 नभ तुज माजि खेले । लपीं थपीं ॥ ९ ॥
 किंबहुना माया असोस । ज्ञान तूझेनि डोलस ।
 असो वानणें सायास । श्रुतिसि हे ॥ १० ॥
 वेद जें वानूनि चांग । जवें न दिसे तूझें आंग ।
 मग आह्मा तेया मूग । एकी पांती ॥ ११ ॥
 जी एकार्णवाचां ठांइ । बुडडेयांचा पाडु नाही ।
 मग महानदी काई । जाणिजती ॥ १२ ॥
 कां उदैलेयां भास्वतु । चंद्र जैसा खद्योतु ।
 आह्मा श्रुती तुज आंतु । तेतुला पाडु ॥ १३ ॥
 आणि दूजेया थाउ मोडे । जेथ परेसि वैखरी बुडे ।
 तो तूं मां कवणें तोंडें । वानावासि ॥ १४ ॥
 येया लागि आतां । स्तुति सांडुनि निवांतां ।
 चरणीं ठेविजे माथा । हें चि भलें ॥ १५ ॥
 तरि तूं जो होसि तेया । नमो श्रीगुरुराया ।
 मज ग्रंथउद्यमु फलवेया । वेव्हारा होई ॥ १६ ॥
 आतां कृपाभांडवल सोडीं । भरिं मति माझी पोतडी ।
 करीं ज्ञानपदजोडी । थोर मातें ॥ १७ ॥
 मी सवंसरेनि तेणें । संतांसि करीं कर्णभूषणें ।
 लेववीन सुलक्षणें । विवेकाचीं ॥ १८ ॥
 जी गीतार्थनिधान । काढू माझें मन ।
 सुई स्नेहांजन । आपुलें तूं ॥ १९ ॥
 हे वागश्रुष्टि येकें वेलें । देखति छुट्टीचे डोले ।
 तैसा उदैजो निर्मलें । कारुण्यविबें ॥ २० ॥
 माझी प्रज्ञावेलिवें वेल्हाल । काव्यें होति सुफल ।
 तो बसंतु होई स्नेहाल । शिरोमणी ॥ २१ ॥

प्रमेयमहापुरे । हे मतिगंगा भरे ।
 तैसा वरिष उदारें । दीठिवेनि ॥ २२ ॥
 आगा विश्वैकधामा । तूझा प्रसादु चंद्रमा ।
 करू मज पूर्णिमा । स्फूर्तिची जी ॥ २३ ॥
 जिया पाहिलें मातें । उन्मेखसागरिचें भरितें ।
 वोसंडेल तें । रस-वृत्तिचें ॥ २४ ॥
 तवं तोखौनि गुरुराजें । ह्मणितलें विनतिव्याजें ।
 मांडिलें देखों दुजें । स्तवुं तुवां ॥ २५ ॥
 हें असो आतां वाजटा । तो ज्ञानकर्पूर गोमटा ।
 ग्रंथु दाविं उत्कंठा । भंगों नेंदीं ॥ २६ ॥
 हो कां जी जी स्वामी । हें चि पाहांतु असें मीं ।
 जें श्रीमुखें ह्मणां तुह्मीं । ग्रंथु सांघें ॥ २७ ॥
 जी दूर्वेचा हीरु । आंगें चि तवं अमरु ।
 वरि आला महापूरु । पीयुषाचा ॥ २८ ॥
 तरि आतां एणें प्रसादें । विन्यासें विदग्धें ।
 मूलशास्त्रपदें । वाखाणीन ॥ २९ ॥
 परि जीवा आंतुली कडे । जैसी संदेहडोणी बुडे ।
 मग श्रवणचाडे । आवाडि दीसे ॥ ३० ॥
 तैसां बोलीं साचारीं । अवतरो माझी माधुरी ।
 मालें मागें घरीं । गुरुकृपेचां ॥ ३१ ॥
 तरि ज्ञागां त्रयोदशीं । अध्याइ गोठि ऐसी
 जें श्रीकृष्ण अर्जुनेसीं । संवादले ॥ ३२ ॥
 जें क्षेत्रक्षेत्रज्ञयोगें । होइजे येणें जगें ।
 आत्मा गुणसंगें । संसारिया ॥ ३३ ॥
 आणि हा चि प्रकृतिगत्तु । सुखदुःखभोगीं हेतु ।
 अथवा गुणातीतु । क्लृप्त हा ॥ ३४ ॥

तारि कैसा यां असंगा संगु । कोणु तो क्षेत्रक्षेत्रज्ञयोग ।
 सुखदुःखादि भोगु । केवि तेया ॥ ३५ ॥
 गुण ते कैसे केती । बाधति कवणां रीती ।
 नातारि गुणातीती । चिन्हु काई ॥ ३६ ॥
 एवं येया आघवेया । अर्था रूप करावेया ।
 विषो एथ चौदावेया । अध्यायासि ॥ ३७ ॥
 तारि तो चि आतां ऐसा । प्रस्तुतु परियसां ।
 अभिप्राउ विधेशा । वैकुंठाचा ॥ ३८ ॥

श्रीभगवानुवाच ॥

परं भूयः प्रवक्ष्यामि ज्ञानानां ज्ञानमुत्तमं ॥
 यज्ज्ञात्वा मुनयः सर्वे परां सिद्धिमितो गताः ॥ १ ॥

तो हणो गा अर्जुना । अवधानांची सर्व सेना ।
 मेलउनियां ज्ञाना । झोंबावें हो ॥ ३९ ॥
 आर्क्षि मागां बह्नुति । दाविलें तुज उपपत्ती ।
 आञ्जुइं प्रतीती । कुंसि न निगे ॥ ४० ॥
 झणौनि गा पुढुती । सांघिजैल प्रतिपत्ती ।
 परि हणहणों श्रुती । डाहारिजे जें ॥ ४१ ॥
 एन्हविं ज्ञान हें आपुलें । परि पर हें ऐसें जालें ।
 जें अवर घेतलें । स्वर्गादि एणें ॥ ४२ ॥
 एणें चि गा कारणें । हें सर्वा उपरि मीं हणें ।
 तें वन्हि यें तृणें । एरें ज्ञानें ॥ ४३ ॥
 जियें स्वर्गादि तें जाणति । योग चि चांग हणति ।
 पारखि फुडी आथि । भेदीं जेयां ॥ ४४ ॥
 तियें आघवीं चि ज्ञानें । केलीं एणें स्वप्ने ।
 जेसे वातोर्मि गगनें । गीलिले आथि ॥ ४५ ॥

कां उदितें रश्मिराजें । लोपतीं चंद्रादि तेजें ।
 नाना प्रलयांबुमाजें । नदीनद ॥ ४६ ॥
 तैसैं हें पाहालेयां । अज्ञानजात जाये लया ।
 ह्यगौनि धनंजया । उत्तम हें ॥ ४७ ॥
 अनादि जे मुक्तता । आपुली जे पांडुसुता ।
 तो मोक्षु हाताइता । होये जेणें ॥ ४८ ॥
 येयाचिया प्रतीती । विचारविरिं समस्तीं ।
 नेंदिजे चि संशृती । माथा उधों ॥ ४९ ॥
 मनें मन घाळनियां मार्गे । विश्रांति जालेयां आंगें ।
 देहीं देहा जोगे । होती चि ना ॥ ५० ॥
 मग देहाचें बेलें । उल्लांङ्गनि येकें बेलें ।
 समतूकीं काटालें । मसीं जाले ॥ ५१ ॥

इदं ज्ञानमुपाश्रित्य मम साधर्म्यमागताः ॥

सर्गेऽपि नोपजायन्ते प्रलये न व्यथन्ति च ॥ २ ॥

जे भाक्षिया नित्यता । नित्य ते पांडुसुता ।
 परिपूर्ण पूर्णता । माक्षिया चि ॥ ५२ ॥
 मी जैसा अनंतानंदु । जैसा चि सत्वसिद्धु ।
 तैसा चि तेया भेदु । उरें चि ना ॥ ५३ ॥
 जें मीं जेवडें जैसैं । तें चि ते जाले तैसैं ।
 घटभंगीं घटाभासैं । आकाश जेवि ॥ ५४ ॥
 नातरि दिवा मुकुलिकीं । दीपशिखा अनेकी ।
 मीनलेयां अवलोकूकीं । जैसैं होये ॥ ५५ ॥
 अर्जुना तिया परीं सरली द्वैताची वारी ।
 नांदो नामार्थ एकाहारी । आह्मी ते ही ॥ ५६ ॥
 एणें चि पै कारणें । जें पहिलें शृष्टिजुपणें ।
 तें तेयां होणें । पडे चि ना ॥ ५७ ॥

सृष्टिचिये सर्वादी । जेयां देहाची नाहिं बाधी ।
 तें कैचे प्रलयाधी । निमतील पां ॥ ५८ ॥
 ह्यणौनि जन्मक्षयां । अतीत ते धनंजया ।
 मी जालां ज्ञाना येया । अनुसरौनि ॥ ५९ ॥
 ऐसी ज्ञानाची गोडी । वानिली देवें आवडी ।
 तेविं चि पार्था सिचडी । लावावेया ॥ ६० ॥
 तवं तेया जालें आन । सर्वांगिं निगाले कान ।
 सपाई अवधान । पातला तो ॥ ६१ ॥
 आतां देवाचेया ऐसें । जाकलिजत वोरसें ।
 निरूपण आकाशें । वेंटाले ना ॥ ६२ ॥

मम योनिर्महद्ब्रह्म तस्मिन्गर्भे दधाम्यहं ॥

संभवः सर्वभूतानां ततो भवति भारत ॥ ३ ॥

तो ह्यणे गा प्रज्ञाकांता । आजि उजलली वागतृता ।
 जें बोला एवडा श्रोता । जोडलासि ॥ ६३ ॥
 तरि एकु मीं अनेकीं । गोविजे देहपाशकीं ।
 त्रिगुणलुब्धकीं । कवणी परीं ॥ ६४ ॥
 केसा क्षेत्रयोगें । विये येणें जगें ।
 तें परियस सांघों वेगें । कोण आतां ॥ ६५ ॥
 पै क्षेत्र येणें व्याजें । हें या चि लागि बोलिजे ।
 जें मत्संगबीजें । भूतीं पिके ॥ ६६ ॥
 आणि महद्ब्रह्म । हें इये ऐसें नाम ।
 जें महदादिविश्राम—। शालिका हे ॥ ६७ ॥
 विकारां बहुसै थोरी । अर्जुना हे चि कही ।
 ह्यणौनि अवधारीं । हें महद्ब्रह्म ॥ ६८ ॥
 अन्यक्तवादमती । अन्यक्त ऐसी भवदंती ।
 सांख्याचिया प्रतीती । प्रकृति हे चि ॥ ६९ ॥

वेदांतीं यार्ते माया । हाणिजे प्रज्ञाराया ।
 केती बोलों वायां । अज्ञान हें गा ॥ ७० ॥
 आपुला आपणेयां । विसरु जो धनंजया ।
 तें गा रूप येया । अज्ञानांसि ॥ ७१ ॥
 आणिक ही येक असे । जें विचारा वेगलें न दिसे ।
 वाती पाहातां जैसें । आंधारें कां ॥ ७२ ॥
 हालविलेयां जाये । निश्चल तरि राहे ।
 दूर्धी जैसी साये । दूधा चि तव ॥ ७३ ॥
 पै जागरु ना स्वप्न । स्वरूप ना अवस्थान ।
 ते सुषुप्ति घन । जैसी होये ॥ ७४ ॥
 कां न वियतां वायुतें । वांझें आकाश रीतें ।
 तेया ऐसें निरुतें । अज्ञान गा ॥ ७५ ॥
 पैलु खांबु कां पुरुष । ऐसा निश्चयो नाहिं येकु ।
 काइ नेणों अवलोकु । देखतसे ॥ ७६ ॥
 तेवि वस्तु जैसें असे । तैसें किर न दिसे ।
 परि काहिं अनारिसें । देखिजे ना ॥ ७७ ॥
 नां राति ना तेज । तिये संधी जैसी सांज ।
 तेवि विरुद्ध ना नीज । ज्ञाना आधि ॥ ७८ ॥
 ऐसी कोणही येकि दशा । तिये वादु अज्ञान ऐसा ।
 तिया गुंडाललिया प्रकाशा । क्षेत्रज्ञ नावं ॥ ७९ ॥
 अज्ञान थोरिये आणिजे । आपणपें तरि नेणिजे ।
 तें रूप जाणिजे । क्षेत्रज्ञाचें ॥ ८० ॥
 हा चि उभययोगु । बुझैं बाण चांगु ।
 सत्तेचा नैसर्गु । स्वभाउ हा ॥ ८१ ॥
 भातां अज्ञानां सारिखें । वस्तु आपणपेयातें देखे ।
 परि रूपें अनेकें । नेणों कोणें ॥ ८२ ॥

जैसा रंकु भ्रमला । ह्मणे जा रे मी राउ० आलां ।
 कां मूर्छीतु गेला । स्वर्गलोका ॥ ८३ ॥
 तेवि लचकलिया दीठी । देखणें जें जें उठी ।
 तेयां नावं शृष्टी । मी वियें गा ॥ ८४ ॥
 हे चि आनी भ्रांती । प्रमेय उपलउं पुढुतीं ।
 तरि तूं प्रतीती । इयाचि घेइं ॥ ८५ ॥

सर्वयोनिषु कौंतेय मूर्त्तयः संभवन्ति याः ॥
 तासां ब्रह्म महद्योनि र्हं बीजप्रदः पिता ॥ ४ ॥

तरि माझी घरणी । अनादि तरुणी ।
 अर्वाच्य गुणी । अविद्या पै ॥ ८६ ॥
 माझेनि चि आंगें । पड्डल्यां हे जागे ।
 आणि सत्तासंभोगें । गुर्विणी होये ॥ ८७ ॥
 महद्ब्रह्मउदरीं । प्राकृते आठें विकारीं ।
 गर्भाची करी । पेलोवेली ॥ ८८ ॥
 इये नाहिं हें चि रूप । ठाणें हें उमप ।
 निद्रितां समीप । चेंतां दूरि ॥ ८९ ॥
 पै उभयसंगु पहिलें । बुद्धित्वें उमले ।
 बुद्धित्वें भारेलें । होये मन ॥ ९० ॥
 तारुण्यता मनाची । अहंकारत्व रची ।
 तेणें महाभूतांची । अभिव्यक्ति होये ॥ ९१ ॥
 आणि विषयइंद्रियां गोसी । स्वभावे तरि भूतांसि ।
 ह्मणौनि येति सरिसीं । त्यें हीं रूपा ॥ ९२ ॥
 जालेनि विकारक्षोभें । पाठि गुणाचेनि उभे ।
 येवं संपूर्ण जे गर्भे । वायें ठाउ ॥ ९३ ॥
 रुखाचा ये वांका । जैसी कां बीजकणिका ।
 जीविं बांधे उदका । भेटतवे ॥ ९४ ॥

तैसी माझेनि संगें । अविद्या नाना जगें ।
 आरवों लागे । आपणपां चि ॥ ९५ ॥
 मग गर्भगोला तेया । कैसी रूपसै ये आया ।
 परियसैं राया । सजनाचेया ॥ ९६ ॥
 पै अंडज स्वेदज । जारज उद्धीज ।
 उमटति सहज । अवेव हे ॥ ९७ ॥
 व्योमवायुवसें । वांटलेनि गर्भरसें ।
 मणिजु उससे । अवेवु तो ॥ ९८ ॥
 पोटीं सूनि तमरजें । आगलिका तोय तेजें ।
 उठितां निफजे । स्वेदज गां ॥ ९९ ॥
 आपपृथ्वीउत्कर्ते । आणि तमोमात्रें निकुष्टें ।
 स्थावरु उमटे । उद्धीजु हा ॥ १०० ॥
 पांचां पांच विरजीं । होंति मनबुध्यादि सहजीं ।
 आणि इये चि जारजीं । ऐसैं जाणें ॥ १ ॥
 ऐसे हे सरल । करचरणतल ।
 महाप्रकृति स्थूल । तें चि शिर ॥ २ ॥
 प्रवृत्ती पेललें पोट । निवृत्ति ते पाठि नीट ।
 सुरयोनि आंगें आठ । ऊर्ध्वाचीं ॥ ३ ॥
 कंठु उल्हासता स्वर्गु । मृत्युलोकु मध्यभागु ।
 अधोदेशु चांगु । नितंबु तो ॥ ४ ॥
 ऐसैं लेंकरुं एक । प्रसवली हे देख ।
 जेयाचे तीनही लोक । बालसैं गा ॥ ५ ॥
 चौरासीं लक्ष यौनी । तियें कांडीं पेरी संधानी ।
 बाढे प्रतिदीनी । बालक हें ॥ ६ ॥
 नात्रा देह अवेवीं । नामाचीं लेणीं लेववीं ।
 मोहो स्तर्ने बाढवीं । नीचनवेनि ॥ ७ ॥

सृष्टी वेगलवेगलिया । त्या चि करां आंगुलिया ।
 भिन्ना अभिमाना सूदलिया । मुदिया तेथ ॥ ८ ॥
 हें एकलौतें चराचर । अविचारतें सुंदर ।
 प्रसवौनि थोर । थोरावली ॥ ९ ॥
 पै ब्रह्मा प्रातःकाल । विष्णु तो मध्यान्हवेळ ।
 सदाशिव उबीळ । बालका येया ॥ ११० ॥
 महाप्रलयसेजें । खेलौनि आलें नीजे ।
 विषमज्ञानें उमजे । कल्पोदई ॥ ११ ॥
 अर्जुना इया परी । मिथ्यादृष्टिचां घरी ।
 युगावृत्तिचीं करी । चोजवाउलें ॥ १२ ॥
 संकल्पु याचा इष्ट । अहंकारु तो नीकटु ।
 जें होये तें सेवटु । ज्ञानें येया ॥ १३ ॥
 आतां असो बहू बोली । ऐसें विश्व माया व्याली ।
 तेथ चांग जाली । माझी सत्ता ॥ १४ ॥
 येया कारणें मी पिता । महद्ब्रह्म माता ।
 अपत्य हा पांडुसुता । जगडंबरु ॥ १५ ॥
 आतां शरीरे बहुतें । देखौनि न भेदें हो चित्तें ।
 जें मनबुद्धिभूतें । एके ययां ॥ १६ ॥
 हांगा एकी चि देहीं । काइ आनारिसे अवेव नाहिं ।
 तेवि विचित्र विश्व पाहीं । एक चि हें ॥ १७ ॥
 पै उंचा नीचा डाहालिया । विषमा वेगलालिया ।
 एका चि जेवि जालिया । बीजाचिया ॥ १८ ॥
 आणि संबंधु तो ही ऐसा । मृन्मयो घटु कां जैसा ।
 कां पटव कापुसा । आंतु होये ॥ १९ ॥
 नाना कळोलपरंपरा । संतति जैसी सागरा ।
 आत्मा आणि चराचरां । तैसा पाडु ॥ १२० ॥

हणौनि वन्हि ज्वाल । दोन्ही वन्ही चि केवल ।
 तेवि मी गा हें सकल । समंधु वाउ ॥ २१ ॥
 जालेनि जगें मी झांके । तरि जगत्वे कोणु फांके ।
 कीलेवारि माणिकें । लोपिजे काइ ॥ २२ ॥
 कां अलंकारत्व आलें । आणि सोनेपण काइ गेलें ।
 किं कमलत्व फांकले— । पणें जाये ॥ २३ ॥
 सांघ पां धनंजया । अवेवी अवेवीया ।
 आछादिजे किं तेया । तें चि रूप ॥ २४ ॥
 विरूढलेयां जोन्हला । कणिसांचां निर्वाला ।
 वेचला कीं आगला । दीसतसे ॥ २५ ॥
 हणौनि जग परौतें । सारूनि पाहिजे मातें ।
 तैसा न्हवे उखितें । आघवें चि मीं ॥ २६ ॥
 हा तूं साचोकारा । निश्चयाचा खरा ।
 गांठि बांध पां वीरा । जीवाचिये ॥ २७ ॥
 आतां मियां मज दाविलां । शरीरीं वेगलाळां ।
 गुणीं मीं चि बांधलां । एसा आवडें ॥ २८ ॥
 जैसैं स्वप्नीं आपण । उठौनि आत्ममरण ।
 भोगिजे गा जाण । कपिध्वजा ॥ २९ ॥
 कां कवलातें डोले । प्रकाशूनि पीवलें ।
 देखति तें हीं कले । तेयांसी चि ॥ ३० ॥
 नाना सूर्य प्रकाशें । प्रकटी तें अभ्र भासे ।
 तो लोपला हें इ दीसे । सूर्ये चि ॥ ३१ ॥
 पै आपणपेनि जालियां । छाया गा आपुलिया ।
 भीडनि मियालियां । आवडिजे ॥ ३२ ॥
 तैसीं इयें नाना देहें । दाडनि मीं नाना होयें ।
 एथ ऐसा बंध आहें । तें हीं देखें ॥ ३३ ॥

बद्ध कां न बंधिजे । जाणणें मज माझें ।
हैं नेणणेनिउपजे । आपुलेनि ॥ १३४ ॥

सत्त्वं रजस्तम इति गुणाः प्रकृतिसंभवाः ॥
निबध्नन्ति महाबाहो देहे देहिनमव्ययं ॥ ५ ॥

तरि कोणें गुणें कैसा । मज चि मीं बद्ध ऐसा ।
आवडे तें परियसां । अर्जुनदेवा ॥ ३५ ॥
गुण ते किंधर्म । काइ येया नाम ।
कें जाले हैं वर्म । अवधारिजो ॥ ३६ ॥
तरि सत्त्वरजतम । तीघांसि हैं चि नाम ।
आणि प्रकृति जन्म- । भूमि येयां ॥ ३७ ॥

तत्र सत्त्वं निर्मलत्वात्प्रकाशकमनामयं ॥
सुखसंगेन बध्नाति ज्ञानसंगेन चानघ ॥ ६ ॥

तैथ सत्त्व तें उत्तम । रज तें मध्यम ।
तिहिं माझि तम । सवियां धारें ॥ ३८ ॥
हैं एकी चि वृत्तिचां ठाई । त्रिगुणत्व आलें पाहीं ।
वयसात्रय देहीं । एकिं जेवि ॥ ३९ ॥
कां मीनलेनि कीडें । जवं जवं तूंक वाढे ।
तवं तवं सोनें पडे । पांचिकां कसीं ॥ १४० ॥
पैं सावधपणें जैसैं । वाहविलें आलसैं ।
सुशुप्ति बैसे । घणावांनि ॥ ४१ ॥
तैसी अज्ञानांगिकारें । निगाली वृत्ति विस्तार ।
तें सत्त्वरजद्वारें । तम हीं हाए ॥ ४२ ॥
अर्जुना गा जाण । येया नावं गुण ।
आतां दाउं खुण । बांधती ते ॥ ४३ ॥
तरि क्षेत्रदशे । आत्मा मोटका प्रवेशे ।
हैं देह मीं ऐसैं । मुद्धर्त्त करी ॥ ४४ ॥

आजन्ममरणांती । देहधर्मसमस्ती ।
 ममत्वाची सूती । घे ना जवं ॥ ४५ ॥
 जैसैं मीनाचां तोंडी । पडे ना जवं उंडी ।
 तवं गळु आसुडी । जलवारधी ॥ ४६ ॥
 तेवि सत्वं लुब्धकें । सुखज्ञानाचीं पाशिकें ।
 बोढिजतां खुडुके । जैसा मृगु ॥ ४७ ॥
 मग ज्ञानें चडफडी । सुख वरि खुरखोडी ।
 स्वयंसुख हें धाडी । हातिचें गा ॥ ४८ ॥
 तेव्हलि विद्यामानें तोखे । लाभमात्रें हरिखे ।
 मी संतुष्ट हें इ देखे । श्लाघों लागे ॥ ४९ ॥
 ह्मणे भाग्य ना माझें । आजि सुखियें नाहिं दूजें ।
 विकारें फुंजे । सात्विकाचेनि ॥ १५० ॥
 आणि येणें हिं न सरे । लांकण लागे दुसरें ।
 जें विद्वत्तेचें भरे । भूत आंगीं ॥ ५१ ॥
 आपण चि ज्ञान आहे । तें गेलें हें दुःख नोहे ।
 किं विषयज्ञानें होये । गगना एवडा ॥ ५२ ॥
 राउं जैसा स्वर्मी । रंकपणें रिगाला धानी ।
 तो गोमटेनि एकें मानी । इंद्र ना मीं ॥ ५३ ॥
 तैसैं गा देहातीता । जालेयां देहवंतां ।
 हों लागे पांडुसुता । बाह्यज्ञानें ॥ ५४ ॥
 प्रवृत्तिशास्त्रें बुझे । यज्ञविद्या उमजे ।
 किंबहुना सुजे । स्वर्गु वेरीं ॥ ५५ ॥
 आणि ह्मणे आजि आन । मी वांचूनि नाहिं सज्ञान ।
 चातुर्यचंद्रगगन । माझें चित्त ॥ ५६ ॥
 ऐसैं सत्व सुखज्ञानीं । जीवासि लाउनि कान्ही ।
 बैलाची करी वानी । पांगुलाचेया ॥ ५७ ॥

रजो रागात्मकं विद्धि तृष्णासंगसमुद्भवं ॥

तन्निबध्नाति कौंतेय कर्मसंगेन देहिने ॥ ७ ॥

आतां हा चि शरीरीं । रजें जिया परीं ।
 बांधिजे तें अवधारीं । सांधिजेल ॥ ५८ ॥
 हें जीवीं मोटकें रिगे । आणि कामाचां मार्गीं लागे ।
 मग वारेया वलघे । तृष्णेचिया ॥ ५९ ॥
 हें रज यया चि कारणें । जें जीवातें रंजों जाणे ।
 अभिलाखाचें तरुणें । सबाह्य गा ॥ १६० ॥
 आबुथुनि आगियालें । वज्राग्नीतें सांदुकिलें ।
 आतां बहू थेकुलें । आहे तेथ ॥ ६१ ॥
 तैसी खवलली चाड । होये दुःखा सकट गोड ।
 इंद्रश्री ही सांकड । गमों लागे ॥ ६२ ॥
 तिया तृष्णा वाढिनलिया । मेरु ही हाता आलेयां ।
 झणे वलघों एकादेया । दारुणा हीं ॥ ६३ ॥
 आजि असतें वेचिजेल । तरि पाहे काइ कीजेल ।
 ऐसा पांगीं वडील । व्यवसाय गा ॥ ६४ ॥
 जीविताची कुरवंडी । वोवाळुं लागे कवडी ।
 मानी तृष्णाचिया जोडी । कृतकृत्यता ॥ ६५ ॥
 झणे स्वर्गा हान जावें । तरि काइ तेथ खावें ।
 यया लागि धांवें । याग करूं ॥ ६६ ॥
 व्रता पाटिं व्रतें । आचरे इष्टापूर्तें ।
 काम्यें वांचूनि हातें । सीवें चि ना ॥ ६७ ॥
 ग्रीष्मांतिचा वारा । विसवों नेणे वीरा ।
 तैसा न झणे व्यापारां । राति दिऊ ॥ ६८ ॥
 काइ चंचळ मासा । कामिनीकटाक्षु काइसा ।
 वळळा होये तैसा । वीजु नाहिं ॥ ६९ ॥

तेतुलेनि गा वेगें । स्वर्गसंसारुपांगें ।
 आगी माजि रिगे । क्रियेचिया ॥ १७० ॥
 ऐसा देहीं देहा वेगला । ले तृष्णेचिया सांखला ।
 टोपु वाहे गलां । व्यापारांचा ॥ ७१ ॥
 हें रजोगुणाचें दारुण । देहिं देहियासि धारण ।
 परियसां विंदाण । तमाचें तें ॥ ७२ ॥

तमस्त्वज्ञानजं विद्धि मोहनं सर्वदेहिनां ॥
 प्रमादालस्यनिद्राभिस्तन्निवध्नाति भारत ॥ ८॥

व्यवहाराचे ही डोले । मंद जेणें पडलें ।
 मायारात्रिचें कालें । मेहुडें जें ॥ ७३ ॥
 अज्ञानाचें जियालें । जेया येका लागलें ।
 जेणें विश्व भुललें । नाचत असे ॥ ७४ ॥
 अविवेकमहामंत्र । जें मौढ्यमद्याचें पात्र ।
 हें असो मोहनास्त्र । जीवासि जें ॥ ७५ ॥
 पार्था तें गा तम । रचूनि ऐसें वर्म ।
 चौखुरी देहात्म । मानीयातें ॥ ७६ ॥
 हें ये विकरि शरीरी । माजों लागे चराचरी ।
 आणि तेथ दुसरी । गोठी नाहिं ॥ ७७ ॥
 सर्वेद्रियां जाड्य । मना माझि मौढ्य ।
 माल्हांत दार्व्य । आलस्याचें ॥ ७८ ॥
 आंगमोडामोडी । कार्यजातां अनावडी ।
 नुसंते परिवडी । जांभैयांची ॥ ७९ ॥
 उघडिया चि दीठी । देखणें नाहि किरीटी ।
 नालक्तां उठी । ओह्ला हणौनि ॥ १८० ॥
 पडिलिये ढोंडी । कोण कानी मुरडी ।
 तिया चि परिवडी । दलों नेणें ॥ ८१ ॥

पुष्पी पाताला जाउ । कां आकाश वारे एउ ।
 परि उठावें ऐसा भाउ । मनी नाहिं ॥ ८२ ॥
 उचितानुचित आघवें । ज्ञासुरतां हिं जीवें ।
 तेथिचा तेथ लोलावें । ऐसी मेघा ॥ ८३ ॥
 उभूनि करतलें । पडिघाये कपोलें ।
 पायांचें सिरालें । मांडूं लागे ॥ ८४ ॥
 आणि निद्राविधिं चांगु । जीवीं आथि लागु ।
 शोंपि जातां स्वर्गु । वाउ ह्मणे ॥ ८५ ॥
 ब्रह्मायुषां होइजे । मग निजैलेयां चि असिजे ।
 हें वांचूनि दूजें । व्यसन नाहीं ॥ ८६ ॥
 वाटे जातां वुगें । कल्हातां हीं डोलों लागे ।
 अमृत ही परि नेवे । जरि नीद ए ॥ ८७ ॥
 तेविं चि आक्रोशबलें । व्यापारें कोण्हीं वेले ।
 तरि निगालें आंधलें । रोसैं जैसैं ॥ ८८ ॥
 केधवां कैसैं राहाटावें । कोणेंसिं काइ बोलावें ।
 हें टाकतें किं नांगवे । काहिं चि नेणे ॥ ८९ ॥
 वणवा मियां आघवा । पाखें चि घूसूनु नेयावा ।
 पतंगु इया हावां । घाली जेवि ॥ ९० ॥
 तैसा बलघे सहसा । अकारणीं धिवंसा ।
 किंबहुना ऐसा । प्रमादु रुचे ॥ ९१ ॥
 एवं निद्राभालस्यप्रमादीं । तम इहिं त्रिविधिं ।
 देहिं बांधे निरुपाधी । चोखटातें ॥ ९२ ॥

सत्त्वं सुखे संजयति रजः कर्मणि भारत ॥

ज्ञानमावृत्य तु तमः प्रमादे संजयत्युत ॥ ९ ॥

जैसा बन्दि काष्टी भरे । तैं दीसे काष्टाकारें ।
 व्योम घटें आभरे । तैं घटाकाश ॥ ९३ ॥

नाना सरोवर भरलें । तेथ चंद्रत्व बिंबलें ।
 गुणाभासि बांधलें । ऐसें गमे ॥ ९४ ॥
 परिहरौनि कफवात । जें देहीं आटोपे पित्त ।
 तें करी संतप्त । देह जेवि ॥ ९५ ॥
 कां वर्षीति जैसे । जीणौनि शीत चि दीसे ।
 तेव्हलि होये हींवा ऐसें । आकाश हें ॥ ९६ ॥
 नाना स्वप्न जाग्रती । लोपूनि ये सुषुप्ती ।
 तै क्षणु येकु भृती । तें चि होये ॥ ९७ ॥
 तैसीं रजतमें हारवी । जें सत्व माजु मिरवी ।
 तैं जीवा करवि ह्मणवी । मुखिया नामीं ॥ ९८ ॥
 तैसें चि सत्व रज । लोपूनि तमा भोज ।
 बलघे तैं सहज । प्रमादिए होए ॥ ९९ ॥

रजस्तमश्चाभिभूय सत्त्वं भवति भारत ॥

रजस्सत्त्वंतमश्चैव तमः सत्त्वं रजस्तथा ॥ १० ॥

तिया चि गा परिपाटी । सत्वतमातें पोटी ।
 घालूनि जेव्हां उठी । रजोगुण ॥ २०० ॥
 तेव्हलां कर्म वांचूनि काहीं । आन सौंदर चि नाही ।
 ऐसें मानी देहीं । देहराजु ॥ १ ॥
 पै रजतमविजैयें । सत्व गा देहीं इये ।
 वाढतां चिन्हि तियें । ऐसीं होंति ॥ २ ॥

सर्वद्वारेषु देहेस्मिन्प्रकाश उपजायते ॥

ज्ञानं यदा तदा विद्याद्विवृद्धं सत्त्वमित्युत ॥ ११ ॥

जें प्रज्ञा आंतुलीकडे । न समांत बाहिरि बोंसडे ।
 वसंति पद्मखंडें । द्रुति जेवि ॥ ३ ॥
 सर्वेद्रियां आंगणीं । विवेकु करी राबणी ।
 साच चि करचरणीं । होंति डोले ॥ ४ ॥

राजहंसा पुढें । चांचु वेंची आगरडे ।
 तोडी जेवि झगडे । क्षीरानिराचे ॥ ५ ॥
 तेवि दोषादोषविवेकीं । इंद्रियें चि होंति पारखीं ।
 नियमु बा रे पाइकी । उलगे तैं ॥ ६ ॥
 नाइकर्णें तें कानू चि वाली । न पाहाणें तें दीढी चि गाली ।
 अवाच्य तें तें टाली । जीभ चि गा ॥ ७ ॥
 वाती पुढां जैसैं । पलों लागे कालवखें ।
 निषिद्ध इंद्रियां तैसैं । समोर नोहे ॥ ८ ॥
 धाराधरकालें । महानदी उचंबले ।
 तैसी बुद्धि पघले । शास्त्रजातीं ॥ ९ ॥
 आगा पूर्णिमेचा दिसिं । चंद्रप्रभा आकाशि ।
 ज्ञानवृत्ति तैसी । फांके सैध ॥ १० ॥
 वासना एकावटे । प्रवृत्ति वोहटे ।
 मन वावटे । सुखा वरि ॥ ११ ॥
 एवं सत्व वाढे । तैं हें चिन्ह फुडें ।
 आणि निधन हीं घडे । तेव्हालां जरि ॥ १२ ॥
 तरि जें चि घरि संपत्ति । तें चि उदार मनोवृत्ति ।
 मां परत्र आणि कीर्त्ति । होये पै गा ॥ १३ ॥
 कां पाहालेनि सुयाणें । जालेयां परगुणें ।
 पढियंतें ये पाहुणे । स्वर्गौनियां ॥ १४ ॥
 मग गोमटेया तेया । जावलि आशे धनंजया ।
 तेवि सत्वीं जाणें देहियां । कें आधि गा ॥ १५ ॥
 जें परगुणीं उद्भट । घेउनि सत्व चोखट ।
 नीगे सांडूनि कोंपट । भोगक्षाम हें ॥ १६ ॥
 अवचटें ऐसा जो जाये । तो सत्वाचा चि नवा होये ।
 किंबहुना जन्म लाहे । शानियां माशि ॥ १७ ॥

सांघ 'पां धनुर्द्धरा । रा३० रायेपर्णे डोंगरा ।
 गेलेया अपुरा । होये काइ ॥ १८ ॥
 नातारि एथिचा दीवा । नेला सेजेया गावां ।
 तो तेथ तरि पांडवा । दीपू चि किं ॥ १९ ॥
 तैसी तेथ सत्वशुद्धी । आगलें ज्ञानासि उधी ।
 तरंगां० लागे बुद्धी । विवेका वारि ॥ २२० ॥
 पै महदादिपरिपाटी । विचारूनु सेवटीं ।
 विचारा सकट पोटीं । जिरे जेया ॥ २१ ॥
 सत्तिसां सत्तितिसांवे । चोविस पंचविसावे ।
 तिहिं पुरौनि स्वभावे । चतुर्थ जें ॥ २२ ॥
 ऐसें सर्व जें सर्वोत्तम । जालें असे सुगम ।
 तेया सवें निरूपम । लाहे देह ॥ २३ ॥

लोभः प्रवृत्तिरारंभः कर्मणामशमस्त्वृहा ॥

रजस्येतानि जायंते विवृद्धे भरतर्षभ ॥ १२ ॥

मग इया चि परीं देख । तमसत्वा अधोमुख ।
 बैसौनि जें आगलीक । धरी रज ॥ २४ ॥
 आपुलेया कार्याचा । धुमाडु गाविं देहाचा ।
 माजवी तें चिन्हाचा । उदो ऐसा ॥ २५ ॥
 पांजरली कां वाहुटली । करी वेगल वेटाली ।
 तैसी विपद् सरली । इंद्रियां होये ॥ २६ ॥
 परदारादि करावें पडे । परि विरुद्ध ऐसें नावडे ।
 मन सेलियेचेनि तोंडें । सैघ चारी ॥ २७ ॥
 हा ठावो वेन्हीं लोभु । करी स्वैरत्वाचा राबु ।
 बेटालितां अलाभु । तें तें उरे ॥ २८ ॥
 आणि आड पडिलेयां । उद्यमजातां भ्रलेतेया ।
 प्रवृत्ति धनंजया । हातु न कढी ॥ २९ ॥

तेविं चि एकाधा प्रसादु । कां करावा अश्वमेधु ।
 ऐसा अचाटू चि संदू । घेउनि उठी ॥ २३० ॥
 नगरें चि रचावीं । महावनें चि लालावीं ।
 जलाशयें निर्मावीं । नानाविधें ॥ ३१ ॥
 ऐसैसां अफांटीं कर्मी । समारंभ-उपक्रमीं ।
 आणि दृष्टादृष्टकर्मी । पुरें नाहीं ॥ ३२ ॥
 सागरु ही सांडी पडे । आंगिं न लाहे तीनि कवडे ।
 ऐसैं अभिलाषीं जोडे । दुर्भरत्व ॥ ३३ ॥
 स्पृहा मनां पुढपुढां । आशेचा घे दवडा ।
 विश्व घापे चाडा । पायां तलीं ॥ ३४ ॥
 इत्यादि वाढतां रजीं । इयें चिन्हें होति सहजीं ।
 आणि ऐसेया माक्षि । वेचे जरि ॥ ३५ ॥
 तारि आघवां इहीं । परिवारला देहीं ।
 रिगे परिं योनी हीं । मानुषे चि ॥ ३६ ॥
 सुरुवाडेंसिं भिखारी । वसो पां राजपुरीं ।
 तन्हीं तो काइ अवधारीं । राउ होईल ॥ ३७ ॥
 बैलासि कडबाडें । हें न चुके गा फुडें ।
 नेइजो पां वऱ्हाडें । भले तैसां ॥ ३८ ॥
 हणौनि व्यापारा हातीं । उकलु दिहा ना राती ।
 तैसेयांचिये पांती । जुंपिजे तो ॥ ३९ ॥
 कर्मजडांचां ठांड । किंबहुना होये देहीं ।
 जो रजोवृद्धिचां डोही । बुडौनि निमे ॥ २४० ॥

अप्रकाशो प्रवृत्तिश्च प्रमादो मोह एव च ॥

तमस्येतानि जायंते विवृद्धे कुरुनंदन ॥ १३ ॥

मग तैसा चि पुडुती । रजा सत्ववृत्ती ।
 गीळनि जें ये उन्नती । तमोगुण ॥ ४१ ॥
 ६३

तैं जियें लिंगें । देहाचें सबाह्य सांधे ।
 तें परियस चांगें । श्रोत्रबलें ॥ ४२ ॥
 तरि ऐसें होये मन । जैसें रविचंद्रें हीन ।
 रातिचें गा गगन । अवसेचिये ॥ ४३ ॥
 तैसें अंतर असोस । होये स्फूर्तिहीन उदस ।
 विचाराची भास । हारपे तैं ॥ ४४ ॥
 बुद्धि मेचुवे ना ढोंडी । हा ठाऊं मौवालै सांडी ।
 आठउ देशधडी । जाला दीसे ॥ ४५ ॥
 अविवेकाचेनि माजें । सपाई शरीर गाजे ।
 एकलेनि घेपे दीजे । मौढ्यें तेथ ॥ ४६ ॥
 आचारभंगाचीं हाडें । रूपति इंद्रियां पुढें ।
 मरे जरि तेणें कडें । क्रिया जाये ॥ ४७ ॥
 पै आणिक ही एक दीसे । जे दुष्कृतीं चित्त उसासे ।
 आंधारीं देखणें जैसें । डुडुलांचें ॥ ४८ ॥
 निषिद्धाचेनि नावें । भलेतें हीं भरें हांवे ।
 तिये विधिं धावे । घेंति करणें ॥ ४९ ॥
 मदिरा नेघतां वूले । सन्निपातें विण बोले ।
 निःप्रेमें चि भूले । पीसें जैसें ॥ २५० ॥
 चित्त तरि गेलें आहे । परि उन्मनी ते नोहे ।
 ऐसें माल्हांथिलें मोहें । माजिरेनि ॥ ५१ ॥
 किंबहुना ऐसींऐसीं । चिन्हें गा तमा पासीं ।
 जें वाढे आइतिसिं । आपुलिया ॥ ५२ ॥
 आणि हें चि वायप्रसंगें । मरणाचें जर खागें ।
 तरि तेतुलेन हीं निगे । तमेंसिं तो ॥ ५३ ॥
 राई रायिपण बीजीं । सांटौनि आंग त्यजी ।
 मग विरूढे तैं दूजी । गोठि आहे ॥ ५४ ॥

पैं होउनि दीपकलिका । एरु आगि विशो कां ।
ते लागैल तेथ असिका । तो चि आहे ॥ ५५ ॥
हणौनि तमाचिये लोथे । बांधौनियां संकल्पातें ।
देह जाये मागुतें । तमाचें होये ॥ ५६ ॥
आतां काइ येणें बहुवें । तो तमोवृद्धी मृत्यु लाहे ।
तो पशु कां पक्षा होये । झाड क्रिमि ॥ ५७ ॥

यदा सत्त्वे प्रवृद्धे तु प्रलयं याति देहभृत् ॥
तदोत्तमविदाह्लोकानमलान्प्रतिपद्यते ॥ १४ ॥

येणें चि कारणें । जें निफजे सत्वगुणें ।
तें सुकृत ऐसें हणो । श्रौतसमो ॥ ५८ ॥
हणौनि तेया निर्मळ । सुखज्ञानीं सरल ।
अपूर्व एक फल । सात्विक तें ॥ ५९ ॥

रजसि प्रलयं गत्वा कर्मसंगिषु जायते ॥
तथा प्रलीनस्तमसि मूढयोनिषु जायते ॥ १५ ॥

मग राजसा क्रिया । तिया इंद्रावणी सांसिनलिया ।
जें सुखें चितारूनियां । फलति दुःखें ॥ ६० ॥
कां निबोलियेचें पीक । वरि गोड आंतु विष ।
तैसें राजस देख । क्रियाफल ॥ ६१ ॥
तामस कर्म तेबुकें । अज्ञानफलें चि पीके ।
विषांकुर विषें । जिया परीं ॥ ६२ ॥

कर्मणः सुकृतस्याहुः सात्विकं निर्मलं फलं ॥
रजसस्तु फलं दुःखमज्ञानं तमसः फलं ॥ १६ ॥

हणौनि बा रे अर्जुना । एथ सत्व चि हेतु ज्ञाना ।
जैसा कां दिना । सूर्य हा ॥ ६३ ॥
आणि तैसें चि हें जाण । लोभासि रज कारण ।
आपुलें विस्मरण । द्वैता जेवि ॥ ६४ ॥

मोहो अज्ञाना प्रमादा । एयां मिलालेयां दोषवृंदां ।
 पुडुतीं पुडुतीं प्रबुद्धा । तम चि मूल ॥ ६५ ॥
 ऐसें विचाराचां डोलां । तीन्हीं गुण हे वेळोवेलां ।
 पाहिजे जैसा आवला । तलहातिचा ॥ ६६ ॥

सत्त्वात्संजायते ज्ञानं रजसो लोभ एव च ॥

प्रमादमोहौ तमसो भवतो ज्ञानमेव च ॥ १७ ॥

तवं रजतमें दोन्हीं । देखिलीं प्रौढें पतनीं ।
 आणि सत्व वांचूनि नेनीं । ज्ञानाकडे ॥ ६७ ॥
 लण्णौनि सात्विकी चि वृत्तीं । एक जाले जन्मव्रती ।
 सर्वत्यागें चतुर्थीं । भागवत जैसे ॥ ६८ ॥
 तैसे सत्वाचेनि नडनाचें । असणें जाणें तेयांचें ।
 ते तनूत्यागीं स्वर्गिचे । राये होंति ॥ ६९ ॥
 इया चि परी पै रजें । जिहिं कां जीजे मरिजे ।
 तिहिं मनुष्यां होइजे । मृत्युलोकिं ॥ ७० ॥
 तेथ सुखदुःखाचें खिचटें । जेविजे येकें चि ताटें ।
 जेथ इये मरणवटे । पडिलें नूठी ॥ ७१ ॥
 आणि तिया चि स्थिती तमीं । जे वाढौनि मोडौनि क्षमीं ।
 ते धेंति नरकभूमी । मूलपत्र ॥ ७२ ॥
 एवं वस्तुचिया सत्ता । त्रिगुणासि पांडुसुत्रा ।
 दाविली साकार्यता । आघवी चि हे ॥ ७३ ॥

ऋध्वं गच्छति सत्त्वस्था मध्ये तिष्ठति राजसाः ॥

अधो गच्छति तामसाः ॥ १८ ॥

न वस्तु वस्तुत्वे असिकें । तें आपण चि गुणां सारिखें ।
 देखौनि कार्यविशेषें । अनुकरे गा ॥ ७४ ॥
 जैसें कां स्वप्नीं पारिव्राजें । जें राउमी हें देखिजे ।
 तें हारि जैत होइजे । आपण चि ॥ ७५ ॥

तैसें मध्य ऊर्ध्व अध । हे जे गुणत्रिभेद ।
 ते वृत्ती वांचूनि शुद्ध । वस्तु चि असे ॥ ७६ ॥
 परि हे वाहणी असो । तन्हीं तुज आन न दीसो ।
 परियसैं ते सांघतसों । मागिलि गोठि ॥ ७७ ॥

नान्यं गुणेभ्यः कर्त्तारं यदा द्रष्टानुपश्यति ॥

गुणेभ्यश्च परं वेत्ति मद्भावं सोधिगच्छति ॥ १९ ॥

तारि ऐसें निजनिजें । सामर्थ्ये तीन्हीं सहजें ।
 होति देहव्याजें । गुण चि हे गा ॥ ७८ ॥
 इंधनाचेनि आकारें । अग्नि जैसा अवतरे ।
 कां आवगे तरुवरें । भूमिरसु ॥ ७९ ॥
 नाना दहियांचेनि मीसें । परिणामे दूध जैसैं ।
 कां मूर्त्त होये ऊंसें । गोडी जेवि ॥ ८० ॥
 तैसें हें सांतष्करण । देह चि होति गुण ।
 झणौनि बंधा कारण । घडे किर ॥ ८१ ॥
 परि चोज हें धनुर्द्धरा । जें येवडां इये गुंपिरा ।
 मोक्षाचा संवसारा । गुणा न्हेवे ॥ ८२ ॥
 गुण आपुलालेनि धर्मे । देहिचें माधुतसाउमें ।
 चालितां न खोमे । गुणातीतता ॥ ८३ ॥
 ऐसी मुक्ति असे सहज । आतां परियसों तुज ।
 तें तूं ज्ञाना बुझ । द्विरेफु किं ॥ ८४ ॥
 आणि गुणीं गुणां जोगें । चैतन्य नोहे हें मार्गें ।
 बोलिलें तें खार्गें । तेवि चि हें ॥ ८५ ॥
 तरि पार्थातें ऐसें । बोधलेनि जीवें दीसे ।
 स्वप्न कां जैसैं । चेइलेनि ॥ ८६ ॥
 नातरि आपणपें जलीं । बिंबलें तीरींहुनि कली ।
 चलन होत कल्लोलीं । अनेकधा ॥ ८७ ॥

कां नटलेनि लाघवें । नटु जैसा न शंकवे ।
 तैसे गुणजात देखवे । न्हवौनियां ॥ ८८ ॥
 रितुत्रय आकाशें । धरुनियां जैसें ।
 नेंदिजे चि येउं वोसें । वेगलेपणें ॥ ८९ ॥
 तैसें गुणिं गुणां परौतें । जें आपणपें असे आइतें ।
 तिये अहं बैसे अहंते । मूलिके चि जें ॥ ९० ॥
 तें तेथौनि मग पांतां । ह्मणे साक्षी मी अकर्ता ।
 हे गुण चि क्रियाजाता । नियोगी ना ॥ ९१ ॥
 सत्वरजतमाचां । भेदीं पसरु कर्माचा ।
 होतसे तो गुणाचा । विकारु हा ॥ ९२ ॥
 एया माक्षि मीं ऐसा । वर्नीं कां वसंतु जैसा ।
 वनलक्ष्मीविलासा । हेतुभूत ॥ ९३ ॥
 कां तारागणीं लोपावें । सूर्यकांतें उद्दीपावें ।
 कमलीं विकाशावें । जावें तमें ॥ ९४ ॥
 इयें कोणहाचीं काजें कहीं । सविता जैसीं नाहीं ।
 तैसा अकर्ता मीं देहीं । सत्तारूपु ॥ ९५ ॥
 मी दाउनि गुण देखें । गुणता हे मियां पोखे ।
 एयाचेनि निःशेषें । उरे तें मीं ॥ ९६ ॥
 ऐसेनि विवेकें जेया । उदौ होये धनंजया ।
 ये गुणातीतत्व तेया । ऊर्ध्वपंथें ॥ ९७ ॥
 आतां निर्गुण असे आणिक । तें तो जाणे हें अचूक ।
 जें ज्ञान केलें ठीक । तेया चि वरि ॥ ९८ ॥
 किंबहुना पांडुसुता । ऐसा तो माक्षिया सत्ता ।
 पावे जैसी सरिता । सिंधुत्व गा ॥ ९९ ॥
 नलिके वरौनु उठिला । जैसा शुक्रु शाखे बैसला ।
 तैसा मूलअहंते ठेला । तो ह्मणौनि ॥ ३०० ॥

आगा अज्ञानांचिया नीदा । घोरतु होता तत्वधा ।
 तो सस्वरूपि प्रबोधा । चेइला किं ॥ १ ॥
 पै बुद्धिभेदाचा आरिसा । तेया हातूनि पडिला वीरेशा ।
 हणौनि प्रतिमुखाभासा । मूकला तो ॥ २ ॥
 देहाभिमानाचा वारा । आतां वाजों ठेला वीरा ।
 तें एक्यवीचिसागरा । जीवेशा होये ॥ ३ ॥
 हणौनि मद्रावेंसि । पाविजे तेणें सारिसि ।
 वरिषांति आकाशीं । घनें जेवि ॥ ४ ॥
 तेवि मी होउनि निरुता । मग देहीं चि इये असतां ।
 नांगवे देहसंभूतां । गुणासि तो ॥ ५ ॥
 जैसा भिंगाचेनि घरें । दीपप्रकाशु नावरे ।
 कां न विज्ञे चि सागरे । वडवानल ॥ ६ ॥
 तैसा आलां गेलां गुणांचा । बोधु न मैले तेयाचा ।
 तो देहीं जैसा व्योमिचा । चंद्र जलीं ॥ ७ ॥

गुणानेतानतीत्य त्रीन्देही देहसमुद्भवान् ॥

जन्ममृत्युजरादुःखैर्विमुक्तोमृतमश्नुते ॥ २० ॥

तीन्ही आपुलिया प्रौढी । देह नाचवीति बागडी ।
 तो पाहों न धडी । अहंतेतें ॥ ८ ॥
 हा ठाऊ वेन्हीं । निहटौनि गेला अंतरीं ।
 आतां काइ वर्त्ते शरीरीं । कांहीं नेणे ॥ ९ ॥
 सांडूनि आंगिची खोली । सर्पु रिगालेयां पातालीं ।
 ते त्वचा कोण सांभाली । तैसें जालें ॥ ३१० ॥
 कां सोरभ्यजीर्णु जैसा । आमोदु मीलौनियां आकाशा ।
 माघारा कमळकोशा । ऐ चि ना ॥ ११ ॥
 पै सस्वरूपसमरसें । तेया ही गा जालें तैसें ।
 तेथ किंघर्म हें ऐसें । नेणे देह ॥ १२ ॥

ह्यणौनि जन्मजरामरण । इत्यादि साई गुण ।
 ते देहीं चि ठेले कारण । नाही तेया ॥ १३ ॥
 घटाच्या खापरिया । घटाचा भागी फोडिल्या ।
 मा आकाश आपैसेया । जालें चि असे ॥ १४ ॥
 तैसी देहबुद्धि जाये । जें आपणपें आठी होये ।
 तें आन काहि आहे । तें वांचूनि ॥ १५ ॥
 येणें थोरें बोधलेपणें । तेया गा देहीं असणें ।
 ह्यणौनि तो मी ह्यणें । गुणातीतु ॥ १६ ॥
 येया देवाचेया बोला । पार्थु अति सुखावला ।
 मेघें संबोखिला । मयूरु जैसा ॥ १७ ॥

अर्जुन उवाच ॥

कैलिगैस्त्रीन्गुणानेतानतीतो भवति प्रभो ॥
 किमाचारः कथं चैतास्त्रीन्गुणानतिवर्त्तते ॥ २१ ॥

तेणें तोपें वीरू पूसे । जी कोणी चिन्ह तो दीसे ।
 जेया माक्षि वसे । ऐसा बोधु ॥ १८ ॥
 तो निर्गुण काइ आचरे । कैसेनि गुण निस्तरे ।
 सांघिजो हें माहोरें । कृपेचेनि ॥ १९ ॥

श्रीभगवानुवाच ॥

प्रकाशं च प्रवृत्तिं च मोहमेव च पांडव ॥
 न द्वेष्टि संप्रवृत्तानि न निवृत्तानि कांक्षति ॥ २२ ॥

येया अर्जुनाचेया प्रश्ना । तो षड्गुणाचा राणा ।
 परिहार आकर्णा । बोलतु असे ॥ २२० ॥
 ह्यणे हे पार्था तूही नवाई । येतुलें चि प्रससी काई ।
 तें नावें चि तेया पाई । साचल टकें ॥ २१ ॥

गुणास्तीनु जेया नावं । तो गुणाधीनु तारि न्हवे ।
 मा होये तारि नांगवे । गुणा येयां ॥ २२ ॥
 परि आधीनु कां नांगवे । हें चि कैसेनि जाणावें ।
 गुणाचिये उरवरेवे । माक्षि असतां ॥ २३ ॥
 हा संदेहो जरि वाहांसी । तरि सुखें पूसों लाहासि ।
 परियस आतां तेयासि । रूप करुं ॥ २४ ॥
 तरि रजाचेनि माजें । देहिं कर्माचें आणोजें ।
 प्रवृत्ती जें घेइजे । वेंटाळनि ॥ २५ ॥
 तें मीं चि ना कर्मठु । ऐसा नैये श्रीमाठु ।
 कां दरिद्रबुद्धी वीटु । तो ही नाहिं ॥ २६ ॥
 अथवा सर्वे चि अधिकें । जें सर्वेद्रीं ज्ञान फांके ।
 तें सुविद्यता न तोखे । उभजे ही ना ॥ २७ ॥
 कां वाढिनलेनि तमें । गील्लिजे मोहभ्रमें ।
 तें अज्ञानत्वे श्रमे । घेणें हिं नाहिं ॥ २८ ॥
 पै मोहाचां अवसरीं । ज्ञानाची चाड न धरी ।
 ज्ञानीं कर्म नादरी । होतां ना दुःखी ॥ २९ ॥
 सायंप्रातमध्यान्हा । येयां तीहीं कालांची गणना ।
 नाहिं जेवि तपना । तैसा असे ॥ ३० ॥
 तेया वेगलें चि काइ प्रकाशे । ज्ञानित्व येयावें असे ।
 काइ जलार्णउ पाउसें । साजा होए ॥ ३१ ॥
 नां प्रवर्तलेनि कर्म । कर्मित्व तेया कां गमे ।
 सावें हिमवंतु हीमें । कांपे काइ ॥ ३२ ॥
 नातरि मोहो आलेयां । काइ पां रुसिजैल तेया ।
 हांगा आगितें उन्हालेया । जालवतसे ॥ ३३ ॥
 तैसें गुणकार्य हें । आघवें आपण चि आहे ।
 संप्रौनि येकैकें नोहे । ताडातोडि ॥ ३४ ॥

येवढिया गा प्रतीती । तो देहा आला असे वस्ती ।
वाटे जातां गुंती । माक्षि जैसा ॥ ३५ ॥

उदासीनवदासीनो गुणैर्यो न विचाल्यते ॥
गुणा वर्त्तत इत्येवं योवतिष्ठति नैगते ॥ २३ ॥

तो जीणता ना हारवी । तैसा गुण न्हवे ना करवी ।
जैसी कां सोणवी । संग्रामीं तैसा ॥ ३६ ॥
आणि गुणाचां यावाजावा । टले चले ना पांडवा ।
मृगजलाचा हेलावा । मेरु जैसा ॥ ३७ ॥
हें बहू काइ बोलिजे । व्योमें वारेनि न वचिजे ।
कां सूर्यु न गिलिजे । अंधकारें ॥ ३८ ॥
स्वप्न गा जेया परीं । जागतेयातें न सितरी ।
गुणिं तैसा अवधारीं । न चलिजे तो ॥ ३९ ॥
गुणा किर नातुडे । परि दूरौनि पाहे जें कोडें ।
तें गुण दरेखे सांगडे । सभ्यु जैसा ॥ ४० ॥
सत्त्वधर्म सात्त्विकीं । रज तें रजोविशेषीं ।
तम मोहादिकीं । वर्त्तत असे ॥ ४१ ॥
परि माक्षिया सत्ता । इया गुणक्रिया समस्ता ।
हें फुडें जाणे सविता । लौकिका जेवि ॥ ४२ ॥
समुद्र चि भरति । सोमकांत चि द्रवति ।
कुमुदें पसरति । चंद्रु तो उगा ॥ ४३ ॥
कां वारा चि वाजे वीक्षे । गगनें निश्चलां असिजे ।
तैसा गुणाचिये गजबजे । डोले ना जो ॥ ४४ ॥

समदुःखसुखः स्वस्थः समलोष्टाश्मकांचनः ॥

मुल्यप्रियाप्रियो धीरस्तुल्यनिंदात्मसंस्तुतिः ॥ २४ ॥

अर्जुना येणें लक्षणें । तो गुणातीतु गा जाणणें ।
परिस आतां आचरणें । तेयाचिं तियें ॥ ४५ ॥

तरि वस्त्रासि पाठीपोटी । नाहिं सूत वांचूनि किरीटी ।
 तैसेनि सुये दीठी । चराचरां ॥ ४६ ॥
 ह्मणौनि सुखदुःखा सरिसें । कांटलें आचरे ऐसें ।
 रिपुभक्तां जैसें । हरिचें देणें ॥ ४७ ॥
 यन्हविं तन्हीं साहाजें । सुखदुःख तें चि व्यजे ।
 देहजलीं होइजे । मासली जैसी ॥ ४८ ॥
 आतां तें तव तेणें सांडिलें । आहे सस्वरूपें चि मांडिलें ।
 सस्यांतीं निवडिलें । बीज जैसें ॥ ४९ ॥
 कां उ०धु सांडूनि गंगा । रिगाली समुद्राचेया आंगा ।
 ते निस्तरे लगबगा । खलालांची ॥ ५० ॥
 तेवि आपणपें चि जेया । वास्ति जाली गा धनंजया ।
 तेया देहीं आपैसेया । सुख तैसें दुःख ॥ ५१ ॥
 रात्रि तैसें पाहालें । हें धारणा जेवि एक जालें ।
 आत्मारामा देहा आलें । द्वंद्व तैसें ॥ ५२ ॥
 पै निद्रिताचेनि आंगेंसि । सांपु तैसी उर्वशी ।
 तेवि स्वरूपस्था सरिसीं । देहीं द्वंद्वें ॥ ५३ ॥
 ह्मणौनि तेयाचां ठांड । सेणां सोनेयां विशेषु नाहिं ।
 रत्ना गुंडेया काहिं । नेणिजे भेदु ॥ ५४ ॥
 घरा येउ पां स्वर्गु । कां वरिपडो वाधु ।
 परि आत्मबुद्धिसंभोगु । विरसु नोहे ॥ ५५ ॥
 निवटलें नुपहुडे । जलिनलें न विरुडे ।
 साम्यबुद्धि न मोडे । तिया परीं ॥ ५६ ॥
 हा ब्रह्मा ऐसेनि स्तुतिजो । कां नीचु ह्मणौनि निदिजो ।
 परि नेणे जलों विज्ञों । राख जैसी ॥ ५७ ॥
 तैसा निंदा आणि स्तुती । नैये कोणही चि व्यक्ती ।
 नाहिं आंधारेया वाती । सूर्या रूप ॥ ५८ ॥

मानापमानयोस्तुल्यस्तुल्यो मित्रारिपक्षयोः ॥

सर्वारंभपरित्यागी गुणातीतः स उच्यते ॥ २५ ॥

ईश्वरबुद्धी पूजिला । चोर हणौनि गाजिला ।

वृषगर्जो वेशिला । केला राउ ॥ ५९ ॥

सुन्दर पासि आले । अधवा बैरी वर जाले ।

परि नेणे रात्रि पाहलें ॥ तेज जेवि ॥ ३६० ॥

घडरितू येतां आकाशें । लिपिजे चि ना जैसैं ।

तेवि वैषम्य मानसैं । जाणिजे चि नां ॥ ६१ ॥

आणिकु ही येकु पाहीं । आचार तेयाचां ठाई ।

तारि व्यापारां नाहीं । जालें दीसे ॥ ६२ ॥

सर्वारंभा उटकलें । प्रवृत्तिचें तेथ मावले ।

जलति कां कर्मफलें । तें तें चि योजी ॥ ६३ ॥

दृष्टादृष्टाचेनि नावें । भाउ चि जीविं नुगवे ।

सेविजे स्वभावें । पै तें होये ॥ ६४ ॥

सुखा ना सीणु नेणे । पोखाणु जेणें मानें ।

तैसी सांडिमांडि मनें । वर्जिली असे ॥ ६५ ॥

आतां केती हा चि विस्तार । जाणे ऐसा आचार ।

तेयातें तो चि साचार । गुणातीतु ॥ ६६ ॥

गुणातें अतिक्रमणें । घडे उपायें जेणें ।

तो आतां आइक हणें । कृष्णनाथु ॥ ६७ ॥

मां च योव्यभिचारेण भक्तियोगेन सेवते ॥

स गुणान्समतीत्यैतान्ब्रह्मभूयाय कल्पते ॥ २६ ॥

तारि व्यभिचाररहितें । भक्तियोगें मातें ।

सेवी तो गुणातें । जाकलूं सके ॥ ६८ ॥

परि कोणु मी कैसी भक्ति । व्यभिचारा काइ व्यक्ति ।

हे आचवी चि निरुति । होआवी लागे ॥ ६९ ॥

तरि पार्था परियसां । मीं तव एथ ऐसा ।
 रत्नीं कीलाउ० जैसा । रत्न चि तो ॥ ३७० ॥
 कां द्रवपण चि नीर । अवकाशू चि अंबर ।
 गोडी ते चि साकर । दोनि नाहिं ॥ ३७१ ॥
 वन्हि ते चि जाल । दला चि नावं कमल ।
 रूखु ते चि डाहाल- । फलादिक ॥ ३७२ ॥
 आगा हीं आलिखलें । तें हिमवंतु जेवि जालें ।
 नाना दूध मुरालें । दध्याकारें ॥ ३७३ ॥
 तैसें विश्व एणें नावें । हें मिं चि पैं आघवें ।
 आतां चंद्रबिंब सोलावें । न लगे जेवि ॥ ३७४ ॥
 वृताचें थिनलेपण । न मोडितां घृत चि जाण ।
 कां नाटितां कांकण । सोनें चि तें ॥ ३७५ ॥
 नुकळितां पटु । तंतू चि आहे स्पष्टु ।
 नवा विरचता घटु । पृथ्वी न्हवे ॥ ३७६ ॥
 ह्मणौनि विश्वपण जावें । मग मातें घेयावें ।
 तैसा न्हवे आघवें । सकट चि मीं ॥ ३७७ ॥
 ऐसेनि मातें जाणिजे । तें जाणीवभक्ति ह्मणिजे ।
 एथ भेदु काहिं देखिजे । व्यभिचारु तो ॥ ३७८ ॥
 येया कारणें भेदातें । सांझ्णीं अखंडें चित्तें ।
 आपणेयां सकट मातें । जाणावें गा ॥ ३७९ ॥
 पार्था सोनेयां टीक । सोनां चि लागली देख ।
 तैसें आपणपें आणिक । मानावें ना ॥ ३८० ॥
 तेजाचा तेजौनि निगाला । परि तेजीं असे लागला ।
 तेया रस्मी ऐसा भला । बोधु होआवा ॥ ८१ ॥
 पैं परिमाणु भूतलीं । हिमकणु हिमाचलीं ।
 मज माझि निहालीं । आहे तैसें ॥ ८२ ॥

हो कां तरंगु लाहानु । परि सिंधुसिं नाहिं भिनु ।
 तैसा ईश्वरीं मीं आनु । नोहें चि नां ॥ ८३ ॥
 ऐसेनि गा समरसें । दृष्टि जैं उल्हासे ।
 ते पै भक्ति ऐसें । आक्षिं हणों ॥ ८४ ॥
 आणि ज्ञानाचें चांगावें । इये चि दृष्टी नावें ।
 योगाचें हिं आघवें । सर्वस्व हें ॥ ८५ ॥
 सिंधू आणि जलधरा । माझि लागलिया जेवि धारा ।
 तैसी वृत्ति वीरा । प्रवर्त्ते ते ॥ ८६ ॥
 कां कुहेंसिं आकाशा । तोंडिं सांदा नाहिं जैसा ।
 तो परमरसु तैसा । एकवटे ॥ ८७ ॥
 पै प्रतिबिंबौनि बिंब वेरीं । प्रभेची जैसी उजिरी ।
 ते सोहंवृत्ति अवधारीं । तैसी होये ॥ ८८ ॥
 ऐसेनि मग परस्परें । ते सोहंवृष्टि जैं अवतरे ।
 तैं तिथे ही सकट सरे । आपैसेया ॥ ८९ ॥
 जैसा सैंधवाचा रवा । सिंधू माझि पांडवा ।
 विराळेयां विरावा । हें इं ठाके ॥ ९० ॥
 नातरि जाळनि तृण । वन्हि वीझे आपण ।
 तैसें भेदु नासूनि जाण । ज्ञान घडे ॥ ९१ ॥
 माझें पैलपण जाये । भक्तु हें अइल ठाए ॥
 अनादि ऐक्य जें आहे । तें चि निवडे ॥ ९२ ॥
 आतां गुणातीतु तें किरीटी । जाण इया न्हवति गोठी ।
 जें एकपणा ही मीठी । पडों सरली ॥ ९३ ॥
 किंबहुना ऐसी दशा । तें ब्रह्मत्व गा सुदंसा ।
 हें तो पावे जो ऐसा । मातें भजे ॥ ९४ ॥
 पुढुतीं इहीं लिंगीं । भक्तु जो माझा जर्गी ।
 हे ब्रह्मता तेया लागि । पतिव्रता ॥ ९५ ॥

जैसे गंगेचेनि उब्धें । ढलमलीत जें निगे ।
 सिंधुपद तेया जोगें । आन नाही ॥ ९६ ॥
 तैसा ज्ञानाचिये दीठी । जो मातें सेवी किरीटी ।
 इये ब्रह्मतेचां मुगुटीं । चूडारत्न तो ॥ ९७ ॥
 येया ब्रह्मत्वासी चि पार्था । सायुज्य ऐसी व्यवस्था ।
 येया चि नावं चौथा । पुरुषार्थु गा ॥ ९८ ॥
 परि माझे आराधन । ब्रह्मत्वीं होये सोपान ।
 येथ मीं हान साधन । गमैल हें ॥ ९९ ॥

ब्रह्मणो हि प्रतिष्ठाहममृतस्याव्ययस्य च ॥
 शाश्वतस्य च धर्मस्य सुखस्यैकांतिकस्य च ॥ १०० ॥

तरि ज्ञनें ऐसें । तूझां चित्तीं प्रवेशे ।
 पै ब्रह्म आन असे । मीं वांचूनि ॥ १०० ॥
 पै मंडल आणि चंद्रमा । दोनि न्हवति सुवर्मा ।
 तैसा मज आणि ब्रह्मा । भेदु नाही ॥ १ ॥
 आगा नित्य जें निष्कंप । अनव्रत धर्मरूप ।
 सुख जें उमप । अद्वैत जें ॥ २ ॥
 विवेकु आपुलें काम । सांडूनि ठाकिजे धाम ।
 तें निकर्षाचें निःसीम । किंबहुना मीं ॥ ३ ॥
 ऐसेंऐसें हें अवधारां । अनन्याचा तो सोयरा ।
 सांघतसे धनुर्द्धरा । पार्थासि ॥ ४ ॥
 तेथ धृतराष्ट्र ह्मणे । संजया हें तूतें कवणें ।
 पूसिलें पै बायाणें । कां गा बोलिलासि ॥ ५ ॥
 माझी अवसरचिंता फेडीं । सांघें विजयाची गुढी ।
 तवं येरु ह्मणे सांडीं । हे गोठि आतां ॥ ६ ॥
 संजया विस्मयो मानसीं । मग आहा करुनि स्वशरीरेंसि ।
 ह्मणे कैसा पै देवेंसीं । द्वेषु एया ॥ ७ ॥

तन्हीं कृपालु तो तुष्टो । विवेकु यया धौटो ।
 मोहाचा फीटो । माहारोगु ॥ ८ ॥
 संजया ऐसें चितितां । संवादु तो चि भावितां ।
 हर्षाचा येतु चित्ता । महापूरु ॥ ९ ॥
 ह्यणौनि आतां तेणें । उत्साहाचेनि अवतरणें ।
 श्रीकृष्णाचें बोलणें । सांघिजैल तेया ॥ ४१० ॥
 तेयां अक्षरां आंतूलु भाउ० । पाववीन मी तुमचा ठाउ० ।
 आइकां ह्यणे ज्ञानदेउ० । निवृत्तिचा ॥ ४११ ॥

ॐ तत्सदिति श्रीमद्भगवद्गीतासूपनिषत्सु ब्रह्मविद्यायां

योगशास्त्रे श्रीकृष्णार्जुनसंवादे गुणत्रयविभाग-

योगो नाम चतुर्दशोऽध्यायः ।

श्रीकृष्णे सर्वात्मनीश्वरेर्पणमस्तु ॥



ज्ञानेश्वरी

अध्याय पंधरावा

श्रीगणेशायनमः ॥

आतां हृदय हें आपुलें । चौकलौनि भलें ।
वरि बैसउं पाउलें । श्रीगुरुचीं ॥ १ ॥
ऐक्यभावाची आंजुलि । सर्वेद्रियकुड्मलि ।
भरौनि पुण्यांजलि । अर्घ्य देऊं ॥ २ ॥
अनन्योदकधुवट । वासना जे तन्निष्ठ ।
तें लागलेंसे अबोट । चंदनाचें ॥ ३ ॥
प्रेमाचेनि भांगारें । निर्वाळनि नेपुरें ।
लेवउं सुकुमारें । पदें तियें ॥ ४ ॥
घनाबलि आवडी । अव्यभिचारें चोखडी ।
तियें घालूं जोडीं । आंगुलिया ॥ ५ ॥
आनंदमोदबहल । सात्विकाचें मुकुल ।
तें उमललें अष्टदल । ठेउं वरि ॥ ६ ॥
तेथ अहंधूपु जालूं । सोहतेजें उवाळूं ।
सामरस्य पोटाळूं । निरंतर ॥ ७ ॥
माक्षि तनु आणि प्राण । इया दोन्ही पाउवां लेवउं श्रीचरण ।
करूं भोगमोक्षों निबळोण । पायां तेयां ॥ ८ ॥

इया गुरुचरणसेवा । हों पात्र तेया दैवा ।
 जें सकलार्थाचा मेळावा । पाटु बांधों ॥ ९ ॥
 ब्रह्मिचें विसवणें वेन्हीं । उन्मेखु लाहे उजरि ।
 जें वाचेतें इयें करि । सुधासिंधु ॥ १० ॥
 पूर्णचंद्राचां कं डि । वक्तृत्वा घापे कुरौंडी ।
 तैसी आणी गोडी । अक्षरांतें ॥ ११ ॥
 सूर्ये अधिष्ठिली प्राची । जगा राणिवं दे प्रकाशाची ।
 तैसी वाचा श्रोतेयां ज्ञानाची । दिवालि करी ॥ १२ ॥
 नादब्रह्म खुजें । कैवल्य हिं तैसें न सजे ।
 ऐसा बोलु देखिजे । जेणें दैवें ॥ १३ ॥
 श्रवणसुखाचां मांडविं । विश्व भोगवी माधवी ।
 तैसी सांसिनली बरवी । वाचावेली ॥ १४ ॥
 ठाऊ न पवतां जेयाचा । मनैसिं मुरडली वाचा ।
 तो देऊ होये शब्दाचा । चमत्कार ॥ १५ ॥
 जें ज्ञानासि न चोजवें । ध्यानासि हिं नागवे ।
 तें अगोचर फांवे । वोवी माझि ॥ १६ ॥
 एव्हडें एक सौभाग । बलघे वाचेचें आंग ।
 गुरुपदपद्मपराग । लाहे जें कां ॥ १७ ॥
 तरि बहू बोलों काइ । आजि तें अना ठाई ।
 मातें वांचूनि नाहिं । ज्ञानदेऊ हागे ॥ १८ ॥
 जें तान्हेनि मियां अपलें । आणि माझें गुरु एकलौतें ।
 ह्मणौनि कृपेसिं एकहातें । जालें तिये ॥ १९ ॥
 पाहा पां भरोवरी आघवी । मेहु चातकासि रिचवी ।
 नज लागि गोसांवी । तैसें केलें ॥ २० ॥
 ह्मणौनि रिकामें तोंड । करु गेलें बडबड ।
 किं गीता ऐसें गोड । आंतुडलें ॥ २१ ॥

होए अदृष्ट आपैतें । तें बाळ चि रूनें परौतें ।
 उजू आउख तें मारितें । लोमु करी ॥ २२ ॥
 आधणिं घातले हरल । होंति अमृताचे तांदुल ।
 जरि भुकेची राखे वेल । जगन्नाथ ॥ २३ ॥
 तिया परी गुरु । करिति जें अंगीकार ।
 तें होउनि ठाके सवसार । मोक्षमयु ॥ २४ ॥
 पाहा पां काइ नारायणें । तेयां पांडवांचें ऊणें ।
 कीजे चि ना पुराणें । विश्वबंधें ॥ २५ ॥
 तैसें श्रीनिवृत्तिराजें । अज्ञानपण हें माझें ।
 आणिलें वोजे । ज्ञानाचिये ॥ २६ ॥
 पारि असो हें आतां । प्रेम रुल्लसे बोलतां ।
 कें गुरुगौरवु वर्णितां । उन्मेखु आथि ॥ २७ ॥
 आतां तेणें चि पसायें । तुझां संताचे पाये ।
 बोलगैन मीं अभिप्रायें । गीतेचेनि ॥ २८ ॥
 तरि तो चि प्रस्तुति । चौदावेया अध्यायाचां अंती ।
 निर्णयो कैवल्यपती । ऐसा केला ॥ २९ ॥
 जें ज्ञान जेयाचां हाति । तो चि समर्थु मुक्ती ।
 जैसा शतमखु संपत्ती । स्वर्गाचिये ॥ ३० ॥
 कां शत एक जन्मां । जो जन्मौनि बाह्यकर्मा ।
 करी तो चि ब्रह्मा । आनु नोहे ॥ ३१ ॥
 नाना सूर्याचा प्रकाशु । लाहे जेविं डोलसु ।
 तें ज्ञानें चि सौरसु । मोक्षाचा तो ॥ ३२ ॥
 तरि यया चि ज्ञाना लागि । कव्हणी पां योग्यता आगि ।
 हें पांतां जगि । देखिला एकु ॥ ३३ ॥
 जेविं पाताल्लिचें घन । दावी किर अंजन ।
 पारि होआवे लोचन । पायलाचे ॥ ३४ ॥

तैसैं मोक्षु देईल ज्ञान । एथ किर नाहि आन ।
 परि तें चि थारे ऐसैं मन । शुद्ध होआवें ॥ ३५ ॥
 तारि विरक्तु वांचूनि कें ही । ज्ञानासि तमणें नाहि ।
 हें विचारुनि ठाई । ठेविलें देवें ॥ ३६ ॥
 आतां विरक्तिची कन्हणी परी । जे एउनि मनातें वरी ।
 हें इं सर्वज्ञें श्रीहरी । देखिलें असे ॥ ३७ ॥
 जें विषें रांधिली रसोये । जेवणारा ठाउवें होए ।
 तें ताट सांडूनि जाए । जिया परी ॥ ३८ ॥
 तैसी संसारा एया समस्ता । जाणवे जें अनित्यता ।
 तें बैराग्य दवडितां । पाठी लागे ॥ ३९ ॥
 आतां अनित्यत्व कैसैं । तें चि रुखाकारें मिसैं ।
 साधिजत असे विश्वेशें । पंचदशीं ॥ ४० ॥

श्रीभगवानुवाच ॥

ऊर्ध्वमूलमधः शाखमश्वत्थं प्राहुरव्ययं ॥
 छदांसि यस्य पर्णानि यस्तं वेद स सर्ववित् ॥ १ ॥

उपडिलें कवतिकें । झाड येरी मोहरा ठाके ।
 तें वेगें जैसैं सूके । तैसैं हें न्हवे ॥ ४१ ॥
 इया एकी परी । रूपकाचिया कुसरी ।
 सारितसे वारी । संसाराची ॥ ४२ ॥
 करुनु संसार वाउ । स्वरूपि अहंते ठाउ ।
 होआवेआ अध्यायो । पंधरावा हा ॥ ४३ ॥
 आतां हें चि आघवें । ग्रंथगर्भिचें सांघावें ।
 उपलविलें जीवें । आकर्णजो ॥ ४४ ॥
 तन्हि महानंदसमुद्र । जो पूर्ण पूर्णिमाचंद्र ।
 तो द्वारकेचा नरेंद्र । ऐसैं झणे ॥ ४५ ॥

भागा पै पांडुकुवंरा । एतां स्वरूपाचआ धरा ।
 करीतुसे आडवारा । विश्वाभासु जो ॥ ४६ ॥
 तो हा जगडंबर । न्हवे एथ सवसार ।
 हा जाणें महातर १ थांवला असे ॥ ४७ ॥
 परि एरां सुखां सारिखा । तलिं मूलें वारि शाखा ।
 तैसा न्हवे क्षणौनु लेखा । नैए कव्हणा ॥ ४८ ॥
 आगी कां कुन्हाडी । होए रिगावा जरि बुडिं ।
 तरि हो कां भळे तेव्हडी । वरिचिली वाढि ॥ ४९ ॥
 जे तूटलेया मूला पासिं । उलंडैल शाकांसिं ।
 तरि तैसी गोठि काइसी । हा सोहपा नोहे ॥ ५० ॥
 अर्जुना हें कवतिक । सांघतां असे अलौलिक ।
 जें वाढि अधोमुख । रुखा एया ॥ ५१ ॥
 जैसा भानु उंची नेणों कें । रश्मिजाल तालिं फांके ।
 सवसार हें कावरुखें । झाड तैसें ॥ ५२ ॥
 आणि आथिनाथि तेतुकें । रुंधलें एणें चि एके ।
 कल्पान्तिचेन उदकें । व्योमं जैसें ॥ ५३ ॥
 कां रविचां अस्तमानीं । अंधारेन कोंदें रजनी ।
 तैसा हा चि गगनीं । मांडला असे ॥ ५४ ॥
 एया फल ना चुंबितां । फुल ना तुरुंबितां ।
 जें काहिं पांडुसुता । तें रुख चि हा ॥ ५५ ॥
 हा ऊर्ध्वमूल आहे । परि उन्मलला नोहे ।
 एणें चि हा होये । शाडूल गा ॥ ५६ ॥
 आणि ऊर्ध्वमूल ऐसें । निगदिलें कीरु असे ।
 परि अधि हीं असोसें । मूल यया ॥ ५७ ॥
 पै बल्लचेन महामारी । पिंपलावडाविया परी ।
 जेवि पारंगियां माझारि । डाहाळिया ॥ ५८ ॥

तेवि गा धनंजया । संसारतरु यया ।
 अर्धी चि आथि खांदिया । हें इ नाहिं ॥ ५९ ॥
 तरि ऊर्धा हि कडे । शाखांचे मांदेडे ।
 दीसताति अपाडे । सांझिनले ॥ ६० ॥
 जालें गगन चि पां वेलिये । कां वारा मांडला रुखाचेनि आयें
 नाना अवस्थे त्राये । उदैला असे ॥ ६१ ॥
 ऐसा हा एकु । विश्वाकारु विटंकु ।
 उदैला जाणें रूखु । उर्धमूल ॥ ६२ ॥
 आतां उर्ध येया कोण । तेथ मूल तें किलक्षण ।
 कां अधोमुखपणेन । शाखा कैसिया ॥ ६३ ॥
 अथवा द्रुमा एया । अर्धि जिया मूलिया ।
 तिया कोणही कैसिया । उर्ध शाखा ॥ ६४ ॥
 आणि अश्वत्थु ऐसी । प्रसिद्धि काइसी ।
 आत्मविद्विलासी । निर्णो केला ॥ ६५ ॥
 हें आघवें चि बरवें । तूझिये प्रतीती फावें ।
 तैसेनि सांघों सोलिवें । विन्यासें गा ॥ ६६ ॥
 पारि आइकें सूभगा । हा प्रसंगु तुज चि जोगा ।
 कान चि करीं सर्वांगां । हियें आथिलेयां ॥ ६७ ॥
 ऐसें प्रेमरसें सुरफुरें । बोलिलें जव् यादवेश्वरें ।
 तव अवधान अर्जुनाकारें । मूर्त जालें ॥ ६८ ॥
 दे० निरोपीति तें थेकुलें । येसणें श्रोतेपण फांकलें ।
 जैसें आकाशें खेव पसरिलें । दाहिं दिशि ॥ ६९ ॥
 श्रीकृष्णसूक्तिसागरा । तो अगस्ति चि पां दूसरा ।
 हणौनि घोंटु भरुं पाहे एकसरा । आघवेयाचा ॥ ७० ॥
 ऐसी सोये संडौनु खवलली । आवडि अर्जुनि देवें देखिडी ।
 तेथ जालेन सुखें केली । कुरौडि तेया ॥ ७१ ॥

मग ह्याने धनंजया । तें उर्ध गा तर येया ।
 येणें रुखें चि कां जेया । ऊर्ध्वत्व गमे ॥ ७२ ॥
 यन्हकि मध्योर्धअर्ध । हें नाहिं जेथ भेद ।
 अद्वयेसि एकवद । जिये ठाई ॥ ७३ ॥
 जो नाइकिजता नादु । जो असौरभ्यमकरंदु ।
 जो आंगाथिला आनंदु । सुरतें विण ॥ ७४ ॥
 जेया जें अन्हां परौतें । जेया जें पुढां माघौतें ।
 दिसतेन विण दिसतें । अदृश्य जें ॥ ७५ ॥
 उपाधिचा दूसरा । घालितां उपासिरा ।
 नावां रूपा सवंसारा । नां होए जेया ॥ ७६ ॥
 ज्ञातृज्ञेयविहीन । नसुधें चि जें ज्ञान ।
 सुखा भरलें गगन । गांलिवं जें ॥ ७७ ॥
 ऐसी वस्तु जे साचे । ते उर्ध गा एया तरुचें ।
 तेथें आर घेणें मूलाचें । तें ऐसें असे ॥ ७८ ॥
 तन्हीं माया ऐसी ख्याति । नसती च यया आधि ।
 कां वांझेची संतती । वानों ए जैसी ॥ ७९ ॥
 तैसी संत ना असंत होए । जे विचाराचें नावं न साहे ।
 ऐसिया परी आहे । अनादि ह्मणति ॥ ८० ॥
 जे भवद्रुमत्रीजिका । प्रपंचाची भूमिका ।
 विपरीतज्ञानदीपिका । सांचली जे ॥ ८१ ॥
 जे नानाशशक्तिची मांदुस । जे जगद्भ्रमाचें आकाश ।
 जे आकारजाताचें दुस । घेडी केली ॥ ८२ ॥
 ते माया वस्तुचां ठाई । असे जैसेनि नाहिं ।
 मग वस्तुप्रभा चि पाहिं । प्रकट होए ॥ ८३ ॥
 जेव्हळि आपणयां आली नीद । करी आपणपें जेवि मुग्ध ।
 कां काजळि आणि मंद । प्रभा दिवि ॥ ८४ ॥

स्वप्नि प्रिया पुढां तरुणांगी । निदेली चैवउनि बेनि ।
 आलंगितेन विण अलंगी । सकाम करी ॥ ८५ ॥
 तैसी स्वरूपिं जाली माया । आणि स्वरूप नेणणें धनंजया ।
 ते चि तरु यथा । मूलपहिलें ॥ ८६ ॥
 वस्तूसि आपुला जो अबोधु । तो उर्धि आठुलैजे कंदु ।
 वेदांतिं हिं हा प्रसिद्धु । बीजभाउ ॥ ८७ ॥
 घन अज्ञान मुषुति । तो बीजांकुरभाउ हणति ।
 एर स्वप्न हान जागृति । फलभावो तेयाचा ॥ ८८ ॥
 ऐसिया इया वेदांति । निरूपणभाषाप्रतीति ।
 परि ते असो प्रस्तुति । अज्ञान मूल ॥ ८९ ॥
 तें ऊर्द्ध आत्मा निर्मलें । अधोर्द्ध सूचीति मूलें ।
 बलिया बांधौनि आलें । मायायोगाचे ॥ ९० ॥
 मग अधमूलासि देहांतरे । उठति जियें अपारें ।
 तें चौपासिं घेउनु अगारें । खालाविति ॥ ९१ ॥
 ऐसें भवद्रुमाचें मूल । हें ऊर्द्ध करी बल ।
 मग अणियांचे बेबल । अधीं चि दावी ॥ ९२ ॥
 तेथ चिद्रुति पहिलें । महातत्व उमललें ।
 तें मान वाल्हेदुल्ले । एक निगे ॥ ९३ ॥
 मग सत्वरजतमात्मकु । त्रिविधु अहंकारु जो एकु ।
 तो तिवना अधोमुखु । डिरु फुटे ॥ ९४ ॥
 तो बुद्धिची घेउनि आगारी । भेदाची वृत्ति करी ।
 तेथ मनाची डाल धरी । साजेपणें ॥ ९५ ॥
 ऐसा मूलाचिया गाढिका । विकल्परस कोंबलिका ।
 चित्तचतुष्टय डाहालिका । कोंभैजे तो ॥ ९६ ॥
 मग आकाश वायु द्योतक । आप पृथ्वी हे पांचे फोंक ।
 महाभूतांचें सारोक । सरले होंति ॥ ९७ ॥

तैसीं चि श्रोत्रादितन्मात्रे । तियें आंगवसा गर्भपत्रे ।
 छलछलितें विचित्रे । उमलती गा ॥ ९८ ॥
 तेथ शङ्खांकुर वरिपडी । श्रोत्रां वाढि देव्हडि ।
 होता करिती कांडीं । आकाक्षेचो ॥ ९९ ॥
 आंगत्वचेचे वेलपालव । स्पर्शाकुरि घेंति धांव ।
 तेथ बांबल पडे अभिनव । विकाराचें ॥ १०० ॥
 पाठि रूपपत्रपेलोवेलि । चक्षु लांव तें कांडें बुद्धि घाली ।
 वेव्हळि व्यामोहता भली । पाव्हेली जाए ॥ १ ॥
 आणि रसाचे आंगवसे । वाढतां वेगें बहुवसे ।
 जिण्हे आर्तिचीं असोसे । निगति वेचें ॥ २ ॥
 तैसिं चि कोमैलेन गंधें । घ्राणाची डिरि थांउं वांधे ।
 तेथ तलु घे सानंदें । प्रलोभाचा ॥ ३ ॥
 एवं महदहंबुद्धि । मनें महाभूतसमृद्धि ।
 इया संसाराचिया अवधी । सासन जें ॥ ४ ॥
 किंबहुना इहि आठें । आंगि अधिक हा फांटे ।
 परि सिंपी चि एव्हडें उमटे । रूपें जेवि ॥ ५ ॥
 कां समुद्राचेनि पैसारें । वरि तरंगता आसारे ।
 तैसें ब्रह्म चि होये वृक्षाकारें । अज्ञानमूल ॥ ६ ॥
 आतां ययाचा हा विस्तार । हा चि यया पैसार ।
 जैसा आपणपें स्वप्निं परिवार । ऐकाकिया ॥ ७ ॥
 पारि तें असो हें ऐसें । कावरें झाड उससे ।
 यया महदादि हे आरवसें । अधोशाखा ॥ ८ ॥
 आणि अश्वत्थु ऐसें ययासें । ह्मणति जे जाणते ।
 तें हिं परिस हो येथें । सांविजेल ॥ ९ ॥
 तारि अश्वत्थु ह्मणिजे उखा । तवं वरि एकसारखा ।
 नाहिं निर्वाहो यया रुखा । प्रपंचरूपासि ॥ ११० ॥

जैसा न लोटतां क्षणु । मेघु होए नानावर्णु ।
 कां विजु नसे संपूर्णु । निमेषु भरि ॥ ११ ॥
 ना कांपतेया पद्मदला । वरिला बैसका नाहिं जला ।
 कां चित्त जैसैं व्याकुला । माणुसाचें ॥ १२ ॥
 तैसी ययाची स्थिती । नासत जाये क्षणा प्रति ।
 हणौनि ययातें हणति । अश्वत्थु गा ॥ १३ ॥
 आणि अश्वत्थु एणें नावें । पिंपलु हणति स्वभावें ।
 परि तो अभिप्राउ नोहे । श्रीहरिचा ॥ १४ ॥
 यन्हविं पिंपलु घडतां विखि । मियां गति देखिली नीकी ।
 परि तें असो काइ लौकिकि । हेतु काज ॥ १५ ॥
 हणौनु हा प्रस्तुतु । अलौकिकु परियसां ग्रंथु ।
 तरि क्षणिकत्वे चि अश्वत्थु । बोलिजे हा ॥ १६ ॥
 आणिक हिं एकु थोरु । यया अव्ययत्वाचा डगरु ।
 आधि परि तो भीतरु । ऐसा असे ॥ १७ ॥
 जैसा मेघांचेनिं तोंडें । सिंधु एके आंगें धडे ॥
 आणि नदी एरी कडे । भरती चि असती ॥ १८ ॥
 एथ वोहटे ना चडे । ऐसा परिपूर्णु चि आवडे ।
 परि तें फुली जवं नुघडे । मेघानदींचि ॥ १९ ॥
 तैसैं यया रुखाचें होणें जाणें । तर्कें होंतेनि वहिलेपणें ।
 हणौनि लोकु ययातें हणे । अव्ययो हा ॥ २० ॥
 यन्हविं दानसीलु पुरुषु । वेचकपणें संचकु ।
 तैसा व्ययें चि हा रुखु । अव्ययो हा ॥ २१ ॥
 जातां वेगें बहुवसें । न वचे कां भुइं रुतलें असे ।
 तें रथाचें चक्र दीसे । जिया परी ॥ २२ ॥
 तैसैं कालातिक्रमीं जे वाले । ते भूतशाखा जेथ गळे ।
 तेथ कोडिं वारि उमाले । उठिति आणिक ॥ २३ ॥

परि एक केधवां गेली । शाखाकोडि केधवां जाली ।
 हें नेणवे जेविं उमललीं । आखाडअर्भे ॥ २४ ॥
 महाकस्पाचां सेवटि । प्रकटिया उमलती सृष्टि ।
 तैसें चि आणिकिचें दांग उठि । सांसीनलें ॥ २५ ॥
 संहारवातें प्रचंडें । पडति प्रलयांतिचिं सालडें ।
 तव कल्पादिचिं जुंबाडें । पाल्हैजति ॥ २६ ॥
 रिगे मन्वंतर मनू पुढें । वंशा वरि वंशाचे मांडें ।
 जैसी इक्षुवृद्धि कांडेनकांडें । जीके जेवि ॥ २७ ॥
 कलियुगांतीं कोरडीं । चहुं युगांचीं डालें सांडी ।
 तव कृतयुगाची पेली देव्हडी । पडे पुढुतीं ॥ २८ ॥
 वर्त्ततें वरिष जाए । तें पुढिलां मुल्हारि होए ।
 जैसा दिवसु जांतु किं एतु आहे । हें चोजवे नां ॥ २९ ॥
 जैसिया वारियाचिया झुलुका । सांदा ठाउवा नव्हे देखां ।
 तैसिया उठिति पडति शाखा । नेणों केति ॥ ३० ॥
 एकी देहाची डिरी तुटे । तव देहांकुरि बहुविं फुटे ।
 ऐसेन भवतरु हा वाटे । अव्ययो ऐसा ॥ ३१ ॥
 जैसें वाहातें पाणीं जाए वेगें । तैसें चि आणिक मिले मार्गे ।
 तेवि असंत चि असिजे जगें । मानिजे ते ॥ ३२ ॥
 कां लागौनि डोला उघडे । तव कोडि वरि घडे मोडे ।
 तें नेणतियां तरंगु आवडे । नित्य ऐसा ॥ ३३ ॥
 वायसा एके बुबुलें दोहिं कडे । डोला चाळितां अपाडें ।
 दोन्ही आधि ऐसा पडे । अमु जेवि ॥ ३४ ॥
 परि भिंगोरि निधिये पडिली । गमे भूमीसि जडली ।
 ऐसा वेगातिसो मुली । हेतु होए ॥ ३५ ॥
 हें बड्ड असो झडती । आंधारिं भवंडितां कोळिती ।
 ते दीसे जैसी आइती । रेख सेंभ ॥ ३६ ॥

हा संसारवृक्ष तैसा । मोडतु मांडतु सहसा ।
 नेदखौनि लोकु पीसा । अव्ययो मानी ॥ ३७ ॥
 परि एयाचा वेगु देखे । जो हा क्षणिकु ऐसा बोलखे ।
 जाणे कोडि वेल निमिखें । होतु जांतु ॥ ३८ ॥
 नाहिं अज्ञान वांचूनि मूल । एयाचें असिलेपण हें टवाल ।
 ऐसें झाड चि सीनसाल । देखिले जेणें ॥ ३९ ॥
 तेयातें गा पांडुसुता । मी सर्वहु हिं ह्मणे जाणता ।
 पें वाग्रहसिद्धांता । वेद्य तो चि ॥ १४० ॥
 योगजाताचें जोडलें । तेया एकासि चि उपेगा गेलें ।
 किंबहुना जिआलें । ज्ञान हिं तेणें ॥ ४१ ॥
 असो हें बहू बोलणें । वानिजैल तो कवणें ।
 जें भवरंखु हा जाणे । उशि ऐसी ॥ ४२ ॥

अधश्चोर्ध्व प्रसृतास्तस्य शाखाः । गुणप्रवृद्धा विषयप्रचालाः ॥
 अधश्च मूलान्यनुसंततानि । कर्मानुबंधीनि मनुष्यलोके ॥ २ ॥

मग यया चि प्रपंचरूपा । अधःशाखिया पादपा ।
 डाहालिया जांती उमपा । ऊर्धा हिं उजू ॥ ४३ ॥
 आणि अधि फांकलीं डाले । ऊर्धि हिं तिष्ठति मूलें ।
 तेया तल्लि पघले । वेळु पालें ॥ ४४ ॥
 ऐसें जें आह्मी । ह्मणितलें उपक्रमी ।
 तें परियसैं सुगमी । बोलिं सांगों ॥ ४५ ॥
 तरि बद्धमूलें अज्ञानें । महदादिकिं सासनें ।
 वेदाचि थोरवणें । घेउनियां ॥ ४६ ॥
 परि अधि तवं स्वेदज । जारजें उद्भिज मणिज ।
 हे बुढौनि महाभुज । उठिति च्यान्हि ॥ ४७ ॥

एया एकएकांचेन अनगटें । चोरासी लक्ष भाकुटे ।
 तेन्हळि जीवशाखीं फांटे । सैंघ चि होंति ॥ ४८ ॥
 प्रसवतु शाखा सरलिया । नानासृष्टि डाहालिया ।
 भाडफांटति मालिया । जातींचिया ॥ ४९ ॥
 स्त्रीपुरुषनपुंसकें । हे व्यक्तिभेदांचे टके ।
 भांदोलति आंगिकें । विकारभारें ॥ ५० ॥
 जैसा वर्षाकालु गगनीं । पल्हैजे नवघानिं ।
 तैसें आकारजात अज्ञानिं । वेलिं जाए ॥ ५१ ॥
 मग शाखांचेनि आंगभरें । लवौनि गुंपति परस्परें ।
 गुणक्षोभाचें वारें । उदैजति ॥ ५२ ॥
 तेथ तेणें अचाटें । तिहिं ठांडं हा फांटे ।
 गुणाचेन झडझडाटें । ऊर्ध्वमूल ॥ ५३ ॥
 ऐसा रजाचिया झुलुका । झडाडितां आगलिका ।
 मनुष्यजातिशाखा । थोरावति ॥ ५४ ॥
 तिया ऊर्ध्व ना अधिं । माझारि चि कोंदाकोंदि ।
 आडफांटति खांदिं । चतुर्वर्णांचां ॥ ५५ ॥
 तेथ विधिनिषेधीं सपलव । वेदवाक्यांचे अभिनव ।
 पालव डोलति बरव । आणिति तियां ॥ ५६ ॥
 अर्थकामपसरें । अप्रवणें घेंति थोरें ।
 तेथ क्षणिकें पदांतरें । इहभोगाची ॥ ५७ ॥
 तेथ प्रवृत्तिचेनि वृद्धिलोभें । खांखरैजति शुभाशुभें ।
 नाना कर्मांचे खांबे । नेणों केती ॥ ५८ ॥
 तेवि चि क्षणे भोग मागिलें । पडति देहांची बुडसलें ।
 तव पुढां वाडु पेलें । नवेयां देहांचा ॥ ५९ ॥
 आणि शब्दादिक सुहावे । साहाजें रंगें हवावें ।
 विषयपल्लव नवे । नीच होंति ॥ ६० ॥

ऐसैं रजोबातप्रचंडे । मनुष्यशाखांचे मांदोडे ।
 वाढति तो एथ रुढे । मनुष्यलोक ॥ ६१ ॥
 तैसा रजाचा तो वारा । नावेक धरी वोसरा ।
 मग वाजों लागे घोरा । तमाचा जो ॥ ६२ ॥
 तैधवां इया चि मनुष्यशाखा । नीच वासना अधि देखां ।
 पाल्लैजति डालुका । कुकर्माचिया ॥ ६३ ॥
 अप्रवृत्तिचें खनुवाले । फोंक निगति सरले ।
 घेंत पान पालव डालें । प्रमादिचीं ॥ ६४ ॥
 बोलति निषेध नियमें । जिया रुग्यजुःसामे ।
 तो पाला तेयां धुमे । टकेयां वारि ॥ ६५ ॥
 प्रतिपादिति अधिचार । आगम जे परमार ।
 ते हिं पानि घेंति पसर । वासनावेलि ॥ ६६ ॥
 तवं तवं होंति थोरांडें । अकर्माची तळबुडें ।
 आणि जन्मशाखा पुढपुढें । घेंति धांवा ॥ ६७ ॥
 तेथ चांडालादि निकृष्टां । दोषजातींचा थोर फांटा ।
 जाल पडों लागे कर्मभ्रष्टां । भुलौनियां ॥ ६८ ॥
 पशु पक्षी शूकर । व्याघ्र वृश्चिक विखार ।
 हे आडशाखानिकर । थोरावती ॥ ६९ ॥
 परि ऐसिया शाखा पांडवा । सर्वांगिं हिं नीच नबा ।
 नरकभोगु यावा । फलाचा तो ॥ १७० ॥
 आणि हिंसाविषय पुढारि । कुकर्मसंगें धुरं भरी ।
 जन्म वरि अगारीं । वाढती चि असे ॥ ७१ ॥
 ऐसीं होंति तरु तृणें । लोह लोष्ट पाखाणें ।
 इया खांदिया तेविं जाणें । फलें हें चि ॥ ७२ ॥
 अर्जुना गा इया परीं । मनुष्यां लागौनि अवधारीं ।
 वृद्धि स्थावरान्त वेन्हीं । अधोशाखांची ॥ ७३ ॥

हणौनु जें माणुसें डालें । इयें चि जाणें अधीं मूळें ।
 एथौनि मग पवले । संसारतरू ॥ ७४ ॥
 यन्हविं उर्ध्वचें पार्था । मुदल मूल पांतां ।
 अधिचिया मध्यस्था । शाखा इया ॥ ७५ ॥
 परि तामसीसात्विकीं । सुकृतदुष्कृतात्मकिं ।
 विरूढति इया शाखिं । अधोर्धीचां ॥ ७६ ॥
 आणि वेदत्रयीचेया पाना । नैए अन्यत्र लागौं अर्जुना ।
 जे मनुष्यें वांचौनु विधाना । विषो नाहिं ॥ ७७ ॥
 हणौनि तनुमानुषां । इया उर्ध्वमूलैनि शाखा ।
 तर्हि कर्मवृद्धिसि देखां । इया चि मूळें ॥ ७८ ॥
 आणि आणिकां हिं झाडिं । शाखा वाढतां मूळें गाढिं ।
 मूळें गाढें तवं वाढि । पैसु आधि ॥ ७९ ॥
 तैसें चि यया शरीरा । कर्म देहसंसारा ।
 आणि देह तवं व्यापारा । नां हणों नैए ॥ १८० ॥
 हणौनि देहें मानुषें । इयें मूळें होंति न चुके ।
 ऐसें जगजनकें । बोलिलें तेणें ॥ ८१ ॥
 मग तमाचें तें दारुण । थिरावलेयां वाडधाण ।
 सत्वाची सूटे सत्राण । वाडुटली ॥ ८२ ॥
 तें इया मनुष्याकारा । मूर्लि सुवासना निगति आरा ।
 धेडनि सूटति कोंभारा । सुकृतांकुरीं ॥ ८३ ॥
 उकलतेन उन्मेखें । प्रज्ञाकुशलतेचां तिखें ।
 डिरिया रिगति निमिखें । बांबलैजौनि ॥ ८४ ॥
 तेथ मेधारसें सगर्भ । आस्थापत्रि सवांब ।
 सरले निगति कोंभ । सद्वृत्तिचे ॥ ८५ ॥
 सदाचारांचिया सहसा । टके उठिती बडुवसा ।
 धुमधुमिति घोसां । वेदपक्षांचां ॥ ८६ ॥

शिष्टागमनविधानें । विविधयागवितानें ।
 तियें पाना वरि पानें । पांजरति ॥ ८७ ॥
 ऐसां यमदमिं घोंसालियां । उठिति तपाचिया डाहालिया ।
 देंति वैराग्यशाखा कोंवलिया । वेल्हाळपणें ॥ ८८ ॥
 विशिष्टां व्रतांचे फोंक । धीराचां अणगटि तीख ।
 जन्मवेगें उर्धमुख । उंचावती ॥ ८९ ॥
 माजि वेदांचा पाला दाट । तो करी विद्यांचा झडझडाट ।
 जवं वाजे अचाट । सत्वानिलु तो ॥ ९० ॥
 तेथ धर्मडाहाळबाहाळि । दीसति जन्मशाखा पालवी ।
 तिया आडफुटती फलीं । स्वर्गादिकि ॥ ९१ ॥
 पुढां उपरतिरागें लोहिबिं । धर्ममोक्षाची शाखा सरली ।
 लाहातलाहात नीच नवी । वाढती चि असे ॥ ९२ ॥
 पै रविचंद्रादि ग्रहवर । पितृ ऋषि विद्याधर ।
 हे आडशाखाप्रसर । पैसु घेंति ॥ ९३ ॥
 एया हि हूनि उंचपडे । गूढले फलाचेनि बुडें ।
 इंद्रादिक ते मांदोडे । थोर शाखांचे ॥ ९४ ॥
 मग तेया हिं उपरि डाहालिया । तपोज्ञानि उंचावलिया ।
 मरीचिकश्यपादिया । उपरिशाखा ॥ ९५ ॥
 एवं पालोवालिं उत्तरोत्तर । उर्धशाखांचा हा पैसार ।
 बुडिं साना अग्रिं थोर । फलाढ्यपणें ॥ ९६ ॥
 बारि उपरिशाखा हिं पाठीं । एंति फलभार जे किरीटी ।
 ते ब्रह्मेशान्तअणगटि । कोंभ निगति ॥ ९७ ॥
 फलाचेनि उन्मीलपणें । ऊर्ध्व उन्वाडेल दूणें ।
 जवं माघौतें बैसणें । मूलिं चि होए ॥ ९८ ॥
 प्राकृतां तन्हीं रुखां । जे फलें दाटिली होये शाखा
 ते उन्वाडिली देखां । बूढासि ए ॥ ९९ ॥

तरि जेथौनि हा आघवा । संसारतरुचा उठावा ।
 तियें मूळि टेंकति पांडवा । वाढतीं ज्ञानें ॥ २०० ॥
 ह्मणौनि ब्रह्मेशाना परौतें । वाढणें नाहिं जीवातें ।
 तेथौनि मग वरौतें । ब्रह्म चि किं ॥ १ ॥
 परि हें असो ऐसें । ब्रह्मादिक तें आंगवसें ।
 उर्ध्वमूला सरिसे । न तूकति गा ॥ २ ॥
 आणिक हिं शाखा उपरता । जिया सनकादि नामें विख्याता ।
 तिया फळिं मूळि नाडलतां । भरलिया ब्रह्मि ॥ ३ ॥
 ऐसीं मनुष्या लागौनि जाणावी । उर्ध्व ब्रह्मादि शेष पालवी ।
 शाखांची वाढि बरवी । उंचावे पै ॥ ४ ॥
 पार्था उर्ध्वचेया ब्रह्मादि । मनुष्यत्व चि होए आदि ।
 ह्मणौनि इयें अधि । ह्मणितलीं मूळें ॥ ५ ॥

न रूपमस्येह तथोपलभ्यते । नान्तो न चादि न च संप्रविष्टः ॥
 अभ्युत्थमेनं सुविरूढमूलं । असंगशस्त्रेण दृढेन छित्वा ॥ ३ ॥

एवं तुज अलौलिकु । हा अधोर्धशाखु ।
 सांघितला भवरुंखु । उर्ध्वमूल ॥ ६ ॥
 आणि अधिचीं हीं मूळें । उपरतिं दाविलीं सविवलें ।
 आतां परियसैं उन्मूले । कैसेनि हा ॥ ७ ॥
 परि तूझा हान पोटी । ऐसें गमेल किरीटी ।
 जे एवढें झाड उत्पाटी । ऐसें काइ असे ॥ ८ ॥
 कें ब्रह्माचक्षा सेवट वेन्हीं । उर्ध्व शाखांची थोरी ।
 आणि मूळें तयं निराकारि । उर्ध्व असे ॥ ९ ॥
 हा स्थावरां हिं तलिं । फांकतसे अधिचा डालिं ।
 माजि धांवतसे दूजां मूळि । मनुष्यरूपि ॥ २१० ॥
 ऐसा गाढा आणि अफाटु । कोण करी यया सेवटु ।
 तरि ज्ञानें हा हलवटु । धरिंसी भाऊ ॥ ११ ॥

पै हा उन्मळावेया दोखें । सायास चि काइसे ।
 काइ बाला बागुल्ल देशें । देव्हडा वाहे ॥ १२ ॥
 गंधर्वदुर्ग कां न पाडावे । काइ शशविषाण मोडावें ।
 होआवें मग तोडावें । खपुष्प किं ॥ १३ ॥
 तैसा संसार हा वीरा । रंखु नाहिं साचोकारा ।
 मा उन्मूलनिं दरारा । काइसा तन्हीं ॥ १४ ॥
 आझीं साधितली जे परी । मूलडाहालांची उजिरी ।
 ते वांझेचें घर भारिं । लेंकुरुवें जैसीं ॥ १५ ॥
 कां कीजति चेइलेपणीं । स्वमिचिं तियें बोलणीं ।
 जैसी जाण ते काहाणी । दुबलेयाची ॥ १६ ॥
 झणौनु पै धनंजया । आझीं वानिली ते रूपगाया ।
 कासविएचेनि तूपें राया । उगारिलें ॥ १७ ॥
 मूल अज्ञान तें चि लटिकें । मा तयाचें काज केतुकें ।
 झणौनु संसाररंखु सतिकें । वाउ चि पै ॥ १८ ॥
 आणि अंतु यया नाहिं । ऐसें वाखाणिजे जें काहिं ।
 ते हिं साच चि पाहिं । परी एकी ॥ १९ ॥
 तरि प्रबोध जवं नोहे । तवं नीदे काइ अंतु आहे ।
 किं राति सरैल पाहे । तेया आरौतें ॥ २० ॥
 तेविं जवं पार्था । विवेकु नुधवी माथा ।
 तवं अंतु नाहिं अश्वत्था । भवरूपा एया ॥ २१ ॥
 तैसें चि हा अनादि । ऐसी आहे शाब्दी ।
 ते आलुकी नोहे नुरोधि । बोलातें एया ॥ २२ ॥
 जन्मे ना होए । ऐसेयां सांघों कव्हणी माए ।
 एया लागि नाहिंपणें आहे । अनादि हा ॥ २३ ॥
 आदि ना अंतु स्थिति । ना रूप ययासि आधि ।
 काइसी कुंथाकुंथी । उन्मूलनीं गा ॥ २४ ॥

आपुलेया अज्ञाना साठि । नन्हतां थांवला किरीटी ।
 तारि आत्मज्ञानाचेनि लोटि । खाडेनि गा ॥ २५ ॥
 वांचौनि ज्ञानेन विण एके । उपाये कारिसि तेतुके ।
 तिहि गुंपसि आधेके । रुंखिं इयें ॥ २६ ॥
 मग केतिकां खांदोखांदि । येया हिंडावें उधि अधि ।
 ह्मणौनि मूल चि अज्ञान छेदीं । सम्यग्ज्ञानें ॥ २७ ॥
 यन्हविं दोरिएचेया उरगा । डांगा मेलवितां पै गा ।
 तो वा३० चि फारु गा । केला होए ॥ २८ ॥
 तरावेया मृगजलाची गंगा । डोणी लागि धांवतां दांगा ।
 माजि वाहलें बुडिजे पै गा । साचें जेविं ॥ २९ ॥
 तेविं नाथिलेयां संसारा । उपाइ जाचतेया वीरा ।
 आपणपें लोपें वारा । विकोपि जाए ॥ ३० ॥
 ह्मणौनि स्वप्निचेया घाया । ३०खदे चें ३० धनंजया ।
 तेविं अज्ञानमूला यया । ज्ञान चि खड्ग ॥ ३१ ॥
 परि तें चि लीला परजवें । तैसें वैराग्याचें नीच नवें ।
 अभंग बल होआवें । बुद्धीसि गा ॥ ३२ ॥
 उठिलेनि वैराग्यें एणें । त्रिवर्गु हा कैसा संडणें ।
 जैसें वमौनियां सुणें । आतां चि गेलें ॥ ३३ ॥
 हा ठा३० पांडवा । पदार्थजातीं आघवा ।
 विटंबी तो होआवा । वैराग्यलोटु ॥ ३४ ॥
 मग देहअहंतेचें दलें । सांडुनि एके वेलें ।
 प्रत्यग्बुद्धिकरवालें । हातवसावें ॥ ३५ ॥
 निसले विवेकुसाहाणें । जें ब्रह्मास्मिबोधें सणाणें ।
 मग पुरतेन बोधें उठणें । एकलें चि ॥ ३६ ॥
 परि निश्चयाचिये मुठी बल । होआवेया एकि दोनि बेल ।
 मग तुलावै अतिचोखाल । मनन वेन्ही ॥ ३७ ॥

पाठि हातियरां आपणेयां । निदिध्यासें एक जालेयां ।
 पुढां नुरेल घाया । पुरते गा ॥ ३८ ॥
 ते आत्मज्ञानाचें खाडें । अद्वैतप्रभेचेनि वाडें ।
 नेंदील उरों कव्हणी कडे । भवरुंखासि ॥ ३९ ॥
 तेव्हलें उर्ध कां उर्ध मूल । ना अधिचें हान शाखाजाळ ।
 तें कहीं चि न दीसे मृगजळ । चांदिणां जेवि ॥ २४० ॥
 ऐसेन गा वीरनाथा । आत्मज्ञानाचिया खड्गलता ।
 छेदौनियां भवाश्वत्था । उर्धमूलते ॥ ४१ ॥
 मग इदंतेसि वाललें । मीपणें विण डाहारलें ।
 तें रूप पाहिजे आपुलें । आपण चि ॥ ४२ ॥
 पारि दर्पणाचेनि आधारें । एक चि करुनि दूसरें ।
 मुख पांति गावारें । तैसें नका हो ॥ ४३ ॥
 आपण चि आपणेयातें । पाहिजे जें अद्वैतें ।
 तें ऐसें होए निरुतें । बोलिजतु असे ॥ ४४ ॥

ततः पदं तत्परिमार्गितव्यं । यस्मिन्गता न निवर्त्तन्ति भूयः ॥
 तमेवचाद्यं पुरुषं प्रपद्ये । यतः प्रवृत्तिः प्रसृता पुराणी ॥ ४ ॥

जें पाहिजेतेन विण पाहिजे । कांहि नेणतां चि जाणिजे ।
 आद्यपुरुखु झणिजे । जेया ठायते ॥ ४५ ॥
 तेथ उपाधिचा बोधंबा । घेउनि श्रुती धांवति जीभा ।
 मग नावारूपाचां बडंबा । करिती वायां ॥ ४६ ॥
 पै भवस्वर्गा उबगले । मुमुक्षु योगज्ञान वळघले ।
 पुडुतीं नैयो इया निगाले । पैजा जेथ ॥ ४७ ॥
 संसाराचेयां पायां पुढां । पलती वीतराग होडां ।
 उलंडौनि ब्रह्मपदाचा कर्मकडा । घालति मागां ॥ ४८ ॥
 अहंतादिभावां आपुलेयां । झाडा देउनि आघवेयां ।
 पत्र घेंति ज्ञानिये जेया । मूलबरासि ॥ ४९ ॥

जिये कां वस्तुचें नेणणें । आणिलें जगा थोर जाणणें ।
 नाहिं तें चि नांदविलें जेणें । मी तूं जमिं ॥ २५० ॥
 पै जेथौनि हे एव्हडी । विश्वपरंपरेची वेलांडी ।
 बाढती आस जैसी कोरडी । निदैवाची ॥ ५१ ॥
 पार्था तें वस्तु पहिलें । आपणपें पै आपुलें ।
 पाहिजे जैसैं हिवलें । हिवं हिवें ॥ ५२ ॥
 आणिक हिं एक तेया । उल्लखणें असे धनंजया ।
 तरि जेया कां भेटलेयां । एणें चि नाहिं ॥ ५३ ॥
 परि तेया भेटति ऐसैं । जें ज्ञानें सर्वत्र सरिसैं ।
 महाप्रलयांबुचें जैसैं । भरलेपण ॥ ५४ ॥

निर्माणमोहाजितसंगदोषा अध्यात्मनित्या विनिवृत्तकामाः ॥

ब्रह्मे विमुक्ताः सुखदुःखसंगै र्गच्छन्त्यमूढाः पद्मव्ययं तत् ॥ ५ ॥

जेयां पुरुषांचें मन । संडौनि गेलें मोहमान ।
 वरिखा अंतिं जैसे घन । आकाशातें ॥ ५५ ॥
 निकवडेया निष्ठुरा । उबगिजे जेविं सोइरा ।
 तैसे नांगवति विकारां । वेटालें जे ॥ ५६ ॥
 फळती केलि उन्मले । तैसी आत्मलामें प्रबलें ।
 तेयांची क्रिया ढालें ढालें । गळती आहे ॥ ५७ ॥
 आगि लागलेयां रुंखिं । देखौनि सैरा पलति पक्षी ।
 तैसैं सांडिलें असेखिं । विकल्पि जे ॥ ५८ ॥
 आइकें सकलदोषतृणीं । अंकुरैजति मेदिनी ।
 तिये भेदबुद्धिची काहाणी । नाहिं जेयांतें ॥ ५९ ॥
 सूर्योदया सरिसी । राति पलौनि जाए आपैसी ।
 गेली देहाहंता तैसी । अविचे सवें ॥ २६० ॥
 आयुष्यहीना जीवातें । देह संडी जेविं अवचितें ।
 तेवि निदसुरें दैतें । संडिले जे ॥ ६१ ॥

लोहाचें सांकडें परिसा । न जोडे आंधार रवि जैसा ।
 द्वैतबुद्धिचा तैसा । जेयां दुकळ ॥ ६२ ॥
 आगा सुखदुःखाकारें । द्वंद्वें देहियां जियें गोचरें ।
 तियें जेयां समोहरें । होति चि ना ॥ ६३ ॥
 स्वप्निचेया राज्य कां मरण । नोहे हर्षशोकासि कारण ।
 प्रबोधलेयां जाण । जिया परी ॥ ६४ ॥
 तैसें सुखदुःखरूपि । दंदि जे पुण्यपार्षि ।
 नेघपिजति सर्पि । गरुडु जैसा ॥ ६५ ॥
 आणि अनात्मवर्गु नीर । संझनि आत्मरसाचें क्षीर ।
 चरताति जे सविचार । राजहंस ॥ ६६ ॥
 जैसा वरिखौनु भूतलिं । आपुला रसु अंशुमाली ।
 माधुता आणी रश्मिजालिं । बिंबासि चि ॥ ६७ ॥
 तैसें आत्मभ्रांति साटिं । वस्तु विखुरली बारें वाटिं ।
 ते एकवटिति आत्मदृष्टि । अखंड जे ॥ ६८ ॥
 किंबहुना आत्मेयाचां निर्द्वारिं । जेयां विवेकु शुद्ध अंतरिं ।
 गंगेचा उज्व सागारिं । बुडाला जैसा ॥ ६९ ॥
 पै आघवें चि जालेपणें । नुरे चि जेयां अभिलाखणें ।
 जैसें एथौनि पन्हां जाणें । नाहिं आकाशासि ॥ ७० ॥
 जैसा आगिचा डोंगर । नेघे कोण्हीं बीजें अंकुर ।
 तैसा मनि जेयां विकार । उदैजे नां ॥ ७१ ॥
 हें केती बोलों असंघडें । जेवि परमाणु नुरे वायू पडें ।
 तैसें विषयांचें नावडे । नावं जेयां ॥ ७२ ॥
 एवं जे जे कोण्हीं ऐसे । केले ज्ञानहुताशें ।
 तेथ मिलति ते तैसे । हेमिं हेम ॥ ७३ ॥
 तेथ ह्याणिजे कोण्हीं ठांड । ऐसें प्रसशील जन्हि काहिं ।
 तान्हि तें तें पद नाहिं । वेचु जेया ॥ ७४ ॥

दृश्यपणें देखिजे । कां ज्ञेयत्वं जाणिजे ।
 अमुकें ऐसें ह्मणिजे । तें जें नोहे ॥ ७५ ॥
 पै दीव्यांचेयां बंबालि । कां चांदु हान उजली ।
 हें काइ बोलें अंशुमाली । प्रकाशी जें ॥ ७६ ॥
 तें आघवें चि दीसणें । जेयातें कां नेदखणें ।
 विश्व आभासतसे जेणें । लपालेनि ॥ ७७ ॥
 जैसैं सिंपीपण हारपे । तवं तवं खरें होए रूपें ।
 कां दोरी लोपतां सांपे । फारां होइजे ॥ ७८ ॥

न तद्भासयते सूर्यो न शशांको न च पावकः ॥

यद्गत्वा न निवर्त्तते तद्धाम परमं मम ॥ ६ ॥

तैसिं चंद्रसूर्यादि थोरें । इयें तेजें जियें फारें ।
 तियें जेयाचेनि आधारें । प्रकाशति ॥ ७९ ॥
 ते वस्तु किं तेजोराशि । सर्वभूतात्मक सरिसी ।
 चंद्रसूर्याचां मानसीं । प्रकाशे जे ॥ ८० ॥
 ह्मणौनि चंद्रसूर्य कडवसां । पडाति वस्तुचेया प्रकाशा ।
 यया लागि तेज जें तेजसां । तें वस्तुचें आंग ॥ ८१ ॥
 आणि जेयाचेयां प्रकाशि । जग हारपे चंद्रार्कैसिं ।
 चांदिं ऋखें जैसिं । दिनोदई ॥ ८२ ॥
 नातारि प्रबोधलिए वेले । स्वप्नर्डिब मालवे ।
 कां नुरे चि सांजोले । मृगतृष्णिका ॥ ८३ ॥
 तैसा जेया वस्तुचां ठांइ । कोणही चि कां आभासु नाहिं ।
 तें माझें निजधाम पाई । पाटाचें गा ॥ ८४ ॥
 पुडुतीं जेथ गेले । नेघति चि कां माघौतीं वाडलें ।
 महोदधी मीनले । स्रोत जैसे ॥ ८५ ॥
 कां लवणाची कुंजरी । सूदली साती सागरीं ।
 होए ना माघारी । परतौनु गा ॥ ८६ ॥

नाना गेलिया अंतरालां । न एंति चि वन्हिज्वाला ।
 नाहिं तसलोहौनि जला । निगणें जेंसें ॥ ८७ ॥
 तेविं मजसि एकवट । जालेन ज्ञानें चोखट ।
 तेयां पुनरावृत्तिची वाट । मोडोनु ठेली ॥ ८८ ॥
 एथ प्रज्ञापृथिवियेचा राउ ॥ पार्थु ह्मणे जी जी पसाउ ॥
 विनतिए एकिए देउ ॥ चित्त देंतु ॥ ८९ ॥
 तरि देवेंसिं स्वयें एक होति । माघौतें जे नैयंति ।
 ते देवेंसिं भिन्न आधि । अभिन्न वा ॥ ९० ॥
 जन्ही भिन्न चि अनादिसिद्ध । तन्हि नैयंति हें असंबद्ध ।
 जे फुलीं लागले षड्पद । काइ फुलें चि होतु ॥ ९१ ॥
 पै लक्ष्याह्मनि अनारिसे । बाण लक्ष्य सिवौनि जैसे ।
 माघौतें पडति तैसे । एंति चि ते पै ॥ ९२ ॥
 ना तारि तूं चि ते स्वभावे । तरि कन्हणें कन्हणासिं मिळावें ।
 आपणेयांसिं चि रूपावें । शस्त्रें केविं ॥ ९३ ॥
 ह्मणौनि तुजसिं अभिन्नां जीवां । तूझा संयोगु वियोगु देवा ।
 नेए बोलों अवेवां । शरीरेंसिं ॥ ९४ ॥
 आणि जे सदा वेगले तुजसिं । तेयां मिलणें नाहिं कोणें देशि ।
 मा यंति नयंति हे कायिसी । वाया बुद्धि ॥ ९५ ॥
 तरि कोण गा ते तूतें । पावौनि नैयंति माघौतें ।
 हें विश्वतोमुखा मार्तें । बुझाविं जी ॥ ९६ ॥
 एयां आक्षेपीं अर्जुनाचां । तो शिरोमणि सर्वज्ञांचा ।
 तोखला बोधु शिष्याचा । देखौनियां ॥ ९७ ॥
 मग ह्मणे गा महामती । मार्तें पावौनि नैयंति पुढुतीं ।
 ते भिन्न अभिन्न पै रीती । दोनी आहाति ॥ ९८ ॥
 जे विवेकें खोलें पाहिजे । तरि मीं चि ते साहाजें ।
 ना आहाचवाहाच दूजे ॥ ऐसे गमति ॥ ९९ ॥

जैसे पाणियां हिं वेगले । आपजतां दीसति कह्योले ।
 यन्हविं तरि निखलें । पाणीं चि तें ॥ ३०० ॥
 कां सुवर्णां होउनि आनें । लेणीं गमति भिन्नं ।
 मग पाहिजे त्वं सोनें । आववें चि तें ॥ १ ॥
 तैसें ज्ञानाचिये दीठी । माझि अभिन्न चि ते किरीटी ।
 एर भिन्नपणें ते उठी । अज्ञाना तव ॥ २ ॥
 साचोकारेनि वस्तुविचारें । कैचें एकासिं मज दूसरें ।
 जें भिन्नाभिन्नव्यवहारें । उमसिजैल ॥ ३ ॥
 आववें चि आकाश सूनि पोटी । बिंब चि जें आते खोटी ।
 तें प्रतिबिंब कै उठी । कै रश्मि सिरें ॥ ४ ॥
 कां कल्पांतिचेया पाणियां । काइ उन्त भरताति धनंजया ।
 ह्यणौनि कैचे अंश अविक्रिया । एका मज ॥ ५ ॥
 परि उन्वाचेनि मेलें । पाणीं उजू परि वांकुडें जालें ।
 खी दूजेपण आलें । तोयबगें ॥ ६ ॥
 व्योम किं चौफल वाटौलें । हें ऐसें काइसेया हिं मिले ।
 परि घटमठिं वेंटाललें । तैसें हिं आधि ॥ ७ ॥
 हांगा नीदेचेनि आधारें । काइ एकलेनि जग न भरे ।
 स्वप्निचेनि जें अवतरे । रायेपणें ॥ ८ ॥
 कां मीनलेनि कीडालें । वात्तिभेदासि ए सोलें ।
 तैसा स्वमाया वेटालें । शुद्ध जै मीं ॥ ९ ॥
 तें अज्ञान हें रूढे । तेणें कोहंविकल्पाचें मांडे ।
 मग विवरौनि कीजे फुडें । देहो मीं ऐसें ॥ ३१० ॥

ममैवांशो जीवलोके जीवभूतः सनातनः ॥

मनःषष्ठार्नीन्द्रियाणि प्रकृतिस्थानि कर्षति ॥ ७ ॥

ऐसें शरीरा चि एवडें । आत्मज्ञान वेगलें पडे ।
 तो माझा अंशु ऐसें आवडे । थोडेपणें ॥ ११ ॥